

SIO MAISOSIA NO ATATA

sani Lukas Ikanure

Anahatana Iapusa'a Yesus Roe Noi'yaha

1 ¹ Teofilus, we neta.

Tau we surate mataano'e usima runa pusire waroni Yesus iunare runa iatuhetere ² rotu-tu Anahatana iapusa'ai roe noi'yaha. Naone Yesus iaisosi ne maisosia wasoni ininiso na sio oakahaiki. Iaisosiso runa kawasa rerihoni Anahatana Ne Inaha. ³ Yesus imatai, oyo tau onona hutu ate iatu-atuhete ruai osi ne maisosia na sio oanei ia-ia ata waini iamahaiki honu. Sio onooi, oyo ianamana rerihoni sapani na Anahatana irime tuniai reini.

⁴ Taue isa, tau Yesus waini iaiki ikataso, iaisosiso sanrei, "Pene oeu oarihoni kota Yerusalem reini. Napa mai kota reini rotu-tu Anahatana irui sae wani itotoe iruiki sani naone uasau osimo rei. ⁵ Yohanes isohu heu mo rosau tau tihu ne nesie onona ina oyo, Anahatana inusu Ne Inaha osimo."

⁶ Reiso tau sio wasoni okata Yesus, oasei tanui, "Upu. Ano nanie ahiti ia Israel tau aia sani masuae, na pene ia rakane isa irime ita nea?"

⁷ Iahata, "Amaku ruai ihete umetene. Ne itapi omi oaneiki tewa. ⁸ Ne mka osupu kawasa. Anahatana Ne Inaha mka ihokai tanumo, oyo osima runa au mai kota Yerusalem reini, sui otoa Yudea pusiki, poe otoa Samaria, rotu-tu tuniai reini nene rurue." ⁹ Iasau sanrei oyo, Anahatana iapusa'ai roe noi'yaha noi sio mata kahutua. Oyo yahu erenetei reiso onooi tewa nea.

¹⁰ Sio wasoni oamrou roe nante asi onooi isaai, oyo sira tau sio ua oausahu papi putia wasoni oooso mai nusuo. ¹¹ Sio rei oasei, "He, omi rerihoni otoa Galilea. Omi wani ooomo oamrou roe nante, nanie taa hae? Yesus rei, Anahatana mato iapusa'ai roe noi'yaha, mka ihokai honu sani sinasi omi onooi isaai rei tea."

Sio Ohiti Matias Ikati Yudas

¹² Sio maisosia onuniso roe kota Yerusalem oarihoni pupue wani nanae Zaitun. Pupue rei haineke kilo osa rerihoni Yerusalem. ¹³ Ohoka roe Yerusalem oyo, ohokaso mai numa wani sio oararane tanui, samatoro osaaso roe kamar roe naue. Sio maisosia rei wasoni:

Petrus,
Yohanes,
Yakobus,
Andreas,
Filipus,
Tomas,
Bartolomeus,
Mateos,
Alfeus anai waini nanai Yakobus,
Yakobus anai waini nanai Yudas,
runa Simon. Ia rei ipenei tau sio rakana orime ne niane.

¹⁴ Sio oamanouso na oanamana runa Anahatana sui'osa sio anoo osa. Oamanouso runa sio pinau umau sani Yesus inai waini nanai Maria. Yesus nea waniu okataso oi.

¹⁵ Tau sio wasoni oamanouso, Petrus ihitioi roe, nanie ianamana osiso. Sio rei, sio utuni hutu ua. Reiso Petrus iasau sanrei, ¹⁶ "Wea kakau, wea waniu. Masuae

sio okanu tau Anahatana ne anamanaya ata Anahatana Ne Inaha iuna aia Daud isima runa pani muie mka sapani runa Yudas. Daud isima, oyo ereeu sani iasau rei sirinia. Yudas sahoro iautunu sio oaresi Yesus. ¹⁷ Yudas, ia mo, naone ikata ita. Yesus ihitiki na ikata ita na pusita inana tanei osi Anahatana.”

¹⁸ (Yudas isupu tuamane nea tau keperi waroni sio oruire osiki tau ne kahatene rei. Poe tuamane rei, iamnahui, oyo imatai, tiai wapisai, oyo apui unue erehokai. ¹⁹ Sio pusiso sui Yerusalem oatinu tau rei, reiso oaoi tuamane rei tau Akeldama tau sio no sou. Nene manariti ‘Tuama Nasi’.)

²⁰ Oyo Petrus iasau honu, “Ia sahoro ikanu Surate Ahinaya ikanu sanrei,

‘Tapi ne numa huie;
Pene ia isa iruei tanui.’

Ikanu honu ata,

‘Tapi ia tamene isa ikatiki.’

^{21–22} Reiso kahurae inini ia isa na ikatata na isima ata inoo Yesus waini iamahaiki honu. Ia rei, kahurae naone ikata-kata ita tau ipusu Upuri Yesus. Kahurae ia rei ikatata on Yohanes isohu heu no rosau rotu-tu Anahatana iapusaa Yesus roe noiyaha rerihoni ita.”

²³ Reiso oatinu tau rei, onini sio ua. Sio reimo wasoni Matias runa Yusuf Barsabas, oaoiki tau Yustus oi. ²⁴ Oyo oainisi sanrei, “Upu. Ano aanei pusiso anoo nea. Autuu na asima ia seia rerihoni sio ua reini sahoro ano aniniki ²⁵ na ikati Yudas. Ikatiki na iuna ia maisosie na inana tanei osia. Yudas iarihoniki nea. leui noi naniai nea.” ²⁶ Oyo okanu uaso nanao tau hatu, samatoro oapataure pani kawei anoe. Apataure, samatoro okainisu kawei rei rotu-tu hatu sio erehokai. Hatu wani sio okanu Matias nanai erehokai, reiso oahata ia osa runa sio maisosia hutusa rahana osa tamena.

Anahatana Ne Inaha Irui Kawasa Osi Sio Wasoni Oparisaa

2 ¹ Tau umete mainae rei sio oaoiki tau Pentakosta oyo, sio wasoni oparisaa oamanouso tau numa osa. ² Sira tau oatinu tinunue on roe noiyaha. Tinunue rei sani ihu mainae erehoka. Sio wasoni orueso pani numa rei, oatini sui numa anoe rei pusiki. ³ Oyo onoo sani usa nene itana waroni rahori numa anoe rei. Rahori oyo, rakahuuso sana osa-osa. ⁴ Anahatana Ne Inaha irui kawasa osi pusiso, oyo oanamana tau sou waroni sio ruao oaneire tewa.

⁵ Tau muie reini sio Yahudiu panesi ohokaso on noi niana pusire mai tuniai reini. Sio wasoni oararane mai kota Yerusalem. Sio rei opusu Anahatana ne maunauna. ⁶ Sio panesi rei oatinu tinunue rei, oyo oamanouso. Taa oatinu sio wasoni oparisaa rei oanamana tau sio ruao no sou, osira. ⁷ Osira naiosa reiso osaa, “Ira oe. Sio wasoni oanamana sanrei, sio pusiso on poe otoa Galilea tea. ⁸ Sapani na au uatinu sio oanamana tau ruaku we sou? Ne sio rei honu oatinu sio oanamana tau sio ruao no sou. ⁹ Ita reini rerihoni:

otoe Partia,
otoe Media,
otoe Elam,
otoe Mesopotamia,
otoe Yudea,
otoe Kapadokia,
otoe Pontus,
otoe Asia,
¹⁰ otoa Frigia,
otoe Pampilia,

otoe Mesir,
 otoa pani Libia haineke nia Kirene,
 sio umau wasoni okata ita rerihoni kota Roma oi.

¹¹ Sio umau wasoni sio Yahudiu, sio umau tewa ne onusu Yahudi nea. Sio umau honu wasoni on nau nusa Kreta runa otoe Arab. Au uatinu sio oanamana tau ruaku we sou. Sio rei honu oatinu sio oanamana tau ruao no sou. Sio rei wasoni osima runa Anahatana iuna sae runa ne kawasa.”

¹² Sio osira, reiso oasei tau umau, “Ira oe. Areini mo nene manariti sapani?”

¹³ Ne sio umau honu oaumaniso, reiso oahata, “Oninu, reiso omukeso.”

Petrus Iatuheteso Rerihoni Anahatana Ne Inaha Sapani

¹⁴ Petrus ihitioi roe ikata sio maisosia hutusa rahana osa tamena, oyo ianamana nioi mainae osi sio panesi rei. Iahata, “Omi Yahudiu. Pusimo utumo wani oruemo mai kota Yerusalem. Au nanie uatuhetemo tau rei, reiso oatinu ia-ia. ¹⁵ Omi oahata ami reini mo, amukema. Aikee amukema tewa. Ranie mato erehiti-hiti, reiso amukema tewa, tea. ¹⁶ Ne areini sani masuae ia mamsima runa Anahatana ne anamanaya waini nanai Yoel isima runa pani muie mka sapani. lasau sani Anahatana iasau sanrei,

¹⁷ Mka tuniai reini haineke tihoniki,
 oyo urui-rui We Inaha osi sio pusiso.

Reiso moa hehuka mka oaunauso tau we anamanaya,
 Sio honua onoo masasua rerihoni au,
 Au mka uuna sio mtuana oneke oamnii.

¹⁸ Osi we manorina iae, sio hanaia runa sio pinau pusiso, mka urui-rui We
 Inaha osiso tau umetene reinau
 na oaunauso tau we anamanaya.

¹⁹ Mka au uuna sima-simana na sio osira. Mka onoo roe nante.

Mka au uuna sima-simana tau we kawasa mai tuniai reini na onoo nasi, usa,
 runa wenue kapitorone.

²⁰ Mka ranie erepumono.

Hunane, sio onoo msinae sani nasi,
 samatoro umete mainae rei erehokai.

Tau umetene rei mka uatuheteso tau we kawasa mainae. Mka uapasana sio
 pusiso.’

²¹ Ne ia seia mani iainisi na uapuhaiki,
 mka uapuhaiki sirinia.

²² Omi Israel! Oatinu tau we anamanaya rai! Anahatana iatuhete osi omi ata ihiti Yesus waini on pani nia Nasaret. Oaneiki nea tau Anahatana irui kawasa osiki na iuna sima-simana tau matamo kahutua. ²³ Aikee orui Yesus osi sio umau ohunui, oyo omi otapi sio kahatena opakui roe hini wani renienei. Reiso omi ohunui. Ne areini erepusu Anahatana ne kaheute. Ianeiki naone. ²⁴ Omi ohunui oyo, Anahatana iapuhaiki honu rerihoni sio matana. Inanai na pene sinsarai runa sio matana. Ia mka imatai rotu-tu ria supani tewa. ²⁵ Masuae aia Daud isima runa ruai tewa. Ne isima runa pani muie mka Yesus iamahaiki honu. lasau sanrei,

‘Uno-noo Upuku haineke,
 waini ikataku.

Reiso ukaitau tewa.

²⁶ Akataku reiso anoku miri-mirike.

Roe hohaku uainaa runaya.

Unapa anoku kaie runa tinaiku.

²⁷ Tau sae, ano atapiku tewa

na mka umataku rotu-tu ria supani.

Atapiku tewa

na au wani au manisate onate, tinaiku erekopui.

²⁸ Ano aatuheteku nea tau arena na uamahaiku rotu-tu ria supani.

Anoku mirike mainae tau ano akata runaku.'

²⁹ Wea kakau, wea waniu. Unina na oanei ia-ia rerihoni upuri waini nanai aia Daud. Daud imatai, okaniki nea. Ia ne kupuro wani asi. ³⁰ Masuae Anahatana itotoe osi Daud ata mka ihiti upui tau natu. Daud waini ia mamsima runa Anahatana ne anamanaya. ³¹ Ianei mka Anahatana iuna sae on iunai tewasi. Reiso iaunutuanoi ata mka la Anahatana Iratiki lapuheuso imatai, oyo iamahaiki honu. Daud iasau sanrei,

'Anahatana itapiki

na ikata sio matana rotu-tu potuina tewa.

Itapiki rotu-tu tinaini erekopui tewa.'

³² Yesus rei, Anahatana iapuhaiki honu. Ami ruama anoo ata waini iamahaiki nea. ³³ Anahatana iapusaai roe noiyaaha. Wairo isupu muirani manetane rerihoni Anahatana nea, reiso waini iruei hae hanai wanane. Anahatana irui Ne Inaha osiki nea sani masuae itotoe. Oyo Yesus iruiki osima sani omi wani onoo runa oatinu reini. ³⁴ Daud ruai isaa roe noiyaaha tewa, reiso ianamana rerihoni ruai tewa. Ne iaunutuanoi rerihoni Yesus iasau sanrei,

'Anahatana iasau osi Upuku.

Rue hae hanaku wanane

³⁵ rotu-tu aheta tau me nisau.'

³⁶ Reiso omi Israel pusimo utumo kahurae oanei manisate ata Yesus mo, omi opakui roe hini wani renienei, ne Anahatana ihitiki tau Upuri runa la Anahatana Iratiki lapuheuso nea."

³⁷ Sio panesi rei oatinu tau rei, oyo oatamisi. Reiso oasei tau Petrus runa sio maisosia tamena. "Mania kakau, mania waniu. Kahurae ami auna sae?"

³⁸ Iahata, "Arihoni mo rosau, oyo ami asohu heure sana osa-osa na sio oanei ata anomo osa runa Yesus Kristus. Aarihoni mo rosau na Anahatana iuna heure. Oyo asupu Anahatana Ne Inaha waini Anahatana iruiki osia. ³⁹ Tau sae, Anahatana itotoe nea. Nanie irui Ne Inaha osia runa mea upu runa sio wasoni hainau. Itotoe osi sio pusiso sahoro mka ianaha runaso."

⁴⁰ Petrus iaunauso tau anamanaya panesi. Iaisosiso sanrei, "Tapi Anahatana iapuheua na pene iapasanaya tau mka iapasana napisi sio wasoni no kihatene reini. Iapuheua na aamahaia rotu-tu ria supani."

Sio Wasoni Oparisaa Tau Yesus

⁴¹ Sio panesi oparisaa tau Petrus ne maunauna rai, reiso sio mampusua osohu heu no rosau. Tau ranie hatae rei, sio nihi tonu ouna osa runa sio wasoni oparisaa nea. ⁴² Sio opusu-pusu sio maisosia no maunauna, oama-amanouso tau osa. Oai poroti tau osa anoo rapeka runa Yesus imatai. Oanamana runa Anahatana tau osa.

⁴³ Anahatana irui kawasa osi sio maisosia na ouna sima-simana suiosa, reiso sio pusiso osira. Okaitau. ⁴⁴ Sio wasoni oparisaa rei, oamanouso tau osa suiosa. Osama no apia osi umau. ⁴⁵ Reiso taue isa, oaheni no tuamane isa te? No apia te? Oyo osama kepeni waroni osupure rei osi sio wasoni no apia tewa, no muaio tewa.

⁴⁶ Anoo miri-mirika. Oamanane osama no muaina osi umau. Reiso oamanouso ranie hatae isa ereeu mai poua tonu rei oamanouso honu suiosa pani Anahatana ne numa mainisie oai poroti sui no numau tau osa anoo rapeka runa Yesus imatai.

⁴⁷ Sio oainaa runa Anahatana. Sio pusiso oahata sio iaka. Ranie hatae isa ereeu

mai poua tonu rei Upuri iapuheu sio umau na oamahaiso rotu-tu ria supani. Reiso ouna osa runa sio wasoni oparisaa nea.

Petrus Isuisene la Waini Italai

3¹ Petrus runa Yohanes wasoni oeuso roe Anahatana ne numa mainisie tau ranie manne pannuhu sio oanamana runa Anahatana. ²Roe ne numa rei, onoo sio wasoni orori ia waini italai isa. Ia rei, italai on ia iamrai asi. Ranie hatae isa ereeu mai poua tonu rei oautuei haineke mitanunue wani nanae, "Mitanunu lake" na iainisi kepeni rerihoni sio wasoni onusu pani Anahatana ne numa mainisie nusue. ³Ia waini italai rei inoo ata Petrus runa Yohanes nanie onusu pani Anahatana ne numa nusue, oyo iainisi sanrei, "Samaku tau kepeni inate isa ee." ⁴Uaso ono-nooi, oyo Petrus iasau osiki, "Masi anoo mai." ⁵Reiso iariniiiso iahata kani nanie orui kepeni osiki. ⁶Oyo Petrus iasau, "Au we kepeni inate isa tewa. Ne nanie urui sae isa honu osia. Tau Yesus Kristus waini on pani nia Nasaret ne kawasa, masi ruamu aeu."

⁷Oyo isota hanai wanane, iakahaiki ihitioi roe. Iakahaiki ihitioi roe oyo, mata hun tewa oyo, ia waini italai rei aini atua makaya nea. ⁸Oyo isomani roe, samatoro ruai ieui suru ria, suru nau. Oyo inusui pani Anahatana ne numa mainisie ikata sio ua rei. Ieui isoman-somani iainaa runa Anahatana. Iahata, "Anahatana, ano mo, ano iake tunne naiosa. Ano asuiseneku nea rotu-tu ueu iake reini. Ano me kawasa mainae." ⁹Sio pusiso onoo ata waini ieui iainaa runa Anahatana. ¹⁰Sio oationai tau ia iru-ruei iainisi kepeni haineke Anahatana ne numa mainisie nene mitanunue wani nanae "Mitanunu lake." Reiso osira hun ruao onoo ia sapani nea rei.

Petrus Iaunaso Roe Anahatana Ne Numa

¹¹Ia waini naone italai rei waini ikata Petrus runa Yohanes asi, oyo sio pusiso oruma oamanouso mai tanuso tau sio wasoni mai teune wani oaoiki tau "Salomo Ne Teune." Sio pusiso osira. ¹²Petrus inooso, oyo iasau osiso sanrei, "Omi Israel. Osira tau rei, nanie ta hae? Oasumatama, nanie ta hae? Oahata ia reini waini ieui tau ami ruama mani kawasa te? Tau ami manisata onate te?" ¹³Anahatana waini Abraham, Ishak, Yakub, runa rea momou rea upu pusiso oainaa runai iuna mainae tau Yesus, ia ne manorine nea. Yesus rei, omi oruiki osi sio wasoni no kawasa ohunui. Pilatus nanie ialapasiki ne omi openemo. ¹⁴Ia rei, ia manisate. Ia manisate onate. Ne omi openemo tanui oyo oainisi na Pilatus ihoka ia mamhunue osimo. ¹⁵Reiso ohunu ia waini iapuhaiso. Ne Anahatana iapuhaiki honu rerihoni sio matana. Ami anoo ata waini iamahaiki honu, reiso asima osimo. ¹⁶Tau ami aparisaa tau Yesus, Yesus iuna ia waini naone italai iamkona nea waini omi onoo iuna oationai. Tau ami aparisaa tau Yesus runa ne kawasa, isuisenei. Waini ieui raka nea inoo tau matari kahutue.

¹⁷Wea kakau, wea waniu. Uanei nea ata omi runa sio ona Yahudiu ouna sanreini mo, tau oanei tewa ata Yesus waini la Anahatana Iratiki Iapuheuso. ¹⁸Ne Anahatana itapi sanrei sani naone sio mamsima runa Anahatana ne anamanaya oasau ata mka pani muie sapani. Oasau ata mka la Anahatana Iratiki Iapuheuso sinsarai. ¹⁹Reiso oarihoni mo rosau. Onunimo mai Anahatana na iuna heure, ²⁰na Upuri ihokai tanumo na oahana mo inahau honua. Mka iaisosi Yesus ihokai tanumo honu. Yesus rei, waini la Anahatana Iratiki Iapuheuso. Naone ihitiki nea. ²¹Kahurae iruei roe noiyaha rotu-tu Anahatana iuna pusire sani naone iuna sio mamsima runa ne anamanaya wasoni manisata onate oasau. ²²Oarihoni mo rosau. Tau sae, naone Musa iasau osi sio Israel sanrei,

'Upumo Anahatana mka iaisosi ia mamsima runa ne anamanaya isa osimo rerihoni ruamo mo mansiau.

la rei, sani au sirinia.

Saka oatinu tau ne anamanaya pusire waroni iasau osimo.

²³ Sio sahoro oatinu tau ia tewa, sio rei, sio osa runa Anahatana ne mansiau tewa nea.’

²⁴ Oarihoni mo rosau. Tewa mo, Samuel runa sio mamsima runa Anahatana ne anamanaya wasoni ohokaso tau muie pusiso osima runa mka sapani pani muie runa napisi reini. ²⁵ Sio mamsimana oasau ata Anahatana itotoe irui la Waini Iratiki lapuheuso. Osupui nea. Anahatana itotoe osi rea opu. Iruiki osi omi nea. Iasau osi Abraham sanrei, ‘Pusu upumu, mka au urui iake osi sio pusiso mai tuniai reini.’ ²⁶ Reiso Anahatana inini Yesus tau ne manorine, oyo iaisosiki ihokai mai tanumo naone na irui iake osimo. Irui iake rei tau iunamo oarihoni mo arena kahatena rai.”

Petrus Runa Yohanes Oamanane Sio Ona Yahudiu

4 ¹ Petrus runa Yohanes wasoni oanamana osiso asi, oyo sio mamkenu makapanau osi Anahatana, no ia polisi tau Anahatana ne numa mainisie runa sio Sadukiu umau ohokaso mai tanuso. ² Sio rei oakapuku tau sio ua rei tau sio wasoni oatuheteso ata Yesus waini iamahaiki honu rerihoni sio matana. Arei nene manariti sio matana mka oamahaiso honu. ³ Reiso osotaso, samatoro onususosio pani pui anoe. Pumono nea reiso osakaso pani pui anoe rotu-tu manahane. ⁴ Ne sio panesi sahoro oatinu no maunauna oparisaa. Reiso sio nihi nima wasoni oparisaa nea.

⁵ Hanu roe oyo, sio onata tau sio wasoni okenu makapanau osi Anahatana, sio matuhete Musa ne maunauna runa sio ona Yahudi nesia rei oamanouso mai kota Yerusalem. ⁶ Oamanouso runa ia mamkenu makapanau aihuhue waini nanai Hanas runa Kayafas, Yohanes, Aleksander, runa ia ona aihuhue rei ne enau umau honu. ⁷ Oyo orori sio ua rei oamananeso, samatoro oasei tanuso sanrei, “Ia seia irui kawasa osimo na osuisene ia waini naone italai rei? Ohete ia seia nanai?”

⁸ Oyo Petrus isupu kawasa rerihoni Anahatana Ne Inaha reiso iasau sanrei, “Omi ona Yahudiu. ⁹ Omi wani oasei tanuma ranie hatae reini tau ami auna iake. Aakahai ia waini naone italai rei. Reiso nanie oanei sapani na asuisenei rotu-tu ia iake nea. ¹⁰ Reiso kahurae omi runa sio Yahudiu pusimo oanei ata ia rei waini ioo iamananemo mai rei tinaini iake nea, tau Yesus Kristus, ia waini on pani nia Nasaret rei, ne kawasa. Yesus reimo, omi orerei roe hini wani reniene. Ne Anahatana iapuhaiki honu. ¹¹ Yesus rei, sio oanamana tanui tau Anahatana ne anamanaya sanrei,

‘Hatu tinipae wani sio mamnana numa openeso tanui ereuna hatu mataano. Ereuna numa makae nea.’

¹² Yesus ruai mani pisa iapuheuta na iamahaita rotu-tu ria supani. Mai tuniai reini pusiki mo, ia isa iae ne kawasa iapuheu na iamahaita tewa. Hasae Yesus sahoro ne kawasa.” ¹³ Sio onata oatinu ata Petrus runa Yohanes uaso okaitau oanamana tewa. Masike sio mainaya tewa, okaitau tewa. Masike sio isikola tewa, okaitau tewa. Reiso osira. Oyo sio anoo rapeka runa naone uaso okata-kata Yesus. ¹⁴ Ne sio mka oasau sapani? Ia waini naone italai rei waini ioo iamananeso ikata Petrus runa Yohanes. Ia waini ieui iake nea. ¹⁵ Reiso sio onata oaisosi uaso ohokaso onapa pani manahane na sio ruao oanamana osi umau. ¹⁶ Oyo oasei tau umau, “Kahurae ita iuna sae runa sio ua rei? Sio pusiso mai kota Yerusalem reini oanei nea ata sio ouna sima-simane rei. Sapani na ita iauhaa? ¹⁷ Ne mai, ita iputa isauso na pene oanamana osiso ohete Yesus nanai nea na pene sima-simane rei, sio panesi oatinu rerihoniki honu.

¹⁸ Reiso sio oanaha runa uaso na onususosio honu, oyo osopo uaso na pene ohete Yesus nanai nea runa pene oatuheteso rerihoni Yesus.

¹⁹ Ne Petrus runa Yohanes oasau sanrei, “Ruamo oarinii. Nene manisate tau Anahatana matai usena wani sapani? Apusu omi mo maunaune te apusu Anahatana ruai ne maunauna?” ²⁰ Ami aarihoni iake tewa. Kahurae asima rerihoni ruama anoo sae runa aatinu sapani.” ²¹ Sio onata rei osupu manaete isa tewa nea na oapasanaso. Reiso oputa osauso honu, oyo ohokaso. Tau sae, sio pusiso mka openeso tau rei. Sio wasoni oainaa runa Anahatana tau sima-simane rei. ²² Ia waini naone italai rei wani ia iake nea tau sima-simane rei, ne musum hutu ate nesi nea.

Sio Wasoni Oparisaa Oainisi Na Pene Sio Okaitau

²³ Sio onata ohoka Petrus runa Yohanes aarihoni pui anoe, samatoro uaso onuniso pani no netau wasoni oparisaa rei. Hoka pani, oyo osima runa sio onata tau sio mamkenu makapanau osi Anahatana runa sio ona Yahudi nesia rei oasau sapani. ²⁴ Satinu tau no anamanaya rai, oyo oainisi tau Anahatana anoo osa. Oahata, “Mania Upu. Ano ahaye tau nante, runa tuniai reini, runa nuae runa pusire waroni. ²⁵ Tau Me Inaha, auna mania upu aia Daud, ia rei waini me manorine, aunai iasau sanrei,

‘Sio wasoni oationa Anahatana tewa anoo ranuku-nuku ranaka-naka, nanie ta hae?

Sio tumatau ouna kaheuta nanie ohunui. Aikee kaheuta rai, raeu tewa, nanie ta hae?

²⁶ Sio aiau mai tuniai reini mo osaka nanie oapuo manahitane.

Sio onata oamanousou nanie onesi Upuri runa la Anahatana Iratiki lapuheuso.’

²⁷ Poe oyo, ereeu sani iasau rei sirinia. Herodes runa Pontius Pilatus oamanousou mai kota reini nea. Oamanousou runa sio wasoni oationa Anahatana tewa runa sio Israel oi. Oamanousou nanie otuntana runa me manorine, Yesu waini ia manisate onate rei. Ia rei, ano ahitiki tau la Anahatana Iratiki lapuheuso nea. ²⁸ Oamanousou na ouna pusire waroni ano aanuture tau me kawasa runa me kaheute naone na ereeu sanrei. ²⁹ Reiso, Upu, muie reini mo, masi aatinu sapani na oputa osauma. Aakahaima, me manorina rei, na aanauso tau Sou lake rerihoni Yesu na pene akaitau. ³⁰ Aatuhetesou rerihoni me kawasa sapani. Asuisene sio kupua, auna sima-simana tau me kawasa runa sima-simana raasirasou runa kawasa rerihoni ahete Yesu nanai. Yesu me manorine waini manisate onate.”

³¹ Oainisi pusi oyo, naniaou manoune rei erekoka. Oyo Anahatana Ne Inaha irui kawasa osiso na osima runa Anahatana ne maunauna. Okaitau tewa.

Sio Wasoni Oparisaa Osama No Apia Osi Umou

³² Sio pusiso wasoni oparisaa, oarinii sani sio osa, anoo osa. Ia isa iasau tewa ata, “Au we apia rei, osi au ruaku mani.” Ne osama no apia pusire osi umou.

³³ Tau kawasa mainae, sio maisosia osima osiso ata Yesu waini iamahaiki honu. Anahatana irui iake osiso. ³⁴ Waini ia isa tewa rerihoni sio rei waini ne apia tewa, ne muaine tewa. Tau sae, sio pusiso sahoro no tuamana, no numau, taue isa oahenire, oyo orori kepeni waroni osupure. ³⁵ Ororire oyo, oruire osi sio maisosia na osamare osi sio wasoni no apia tewa, sio wasoni no muaio tewa.

³⁶ Sani rei oi runa Yusuf. Sio maisosia oaoiki tau Barnabas (nene manariti ‘Ia Sahoro launau Sio Wasoni Anoo Mtinta’). Ia ne ipane Lewi. Iamrai nau nusa wani nanae Siprus. ³⁷ Ia rei, iaheni ne tuamane isa, oyo irori kepeni waroni isupure na iruire osi sio maisosia. Iruire na osamare osi sio wasoni no apia tewa, sio wasoni no muaio tewa.

Anahatana Ihunu Ananias Runa Safira Tau Sio Oakarotai

5¹ Ia hanaie isa waini nanai Ananias. Ia runa sahai, waini nanai Safira, uaso, oaheni no tuamane otoa isa oi. ² Kepeni waroni isupure rai, inana umau osi ruai, umau honu iruire osi sio maisosia. Luna sanrei, sahai ianeiki oi. ³ Reiso Petrus iasei tanui, "Ananias, sapani na atapi ia aia sakahatene inusu anomu pusiki rotu-tu aakarota Anahatana Ne Inaha. Tewa mo, aauhuni ata anana kepeni umau waroni asupure tau tuamane rei?" ⁴ Tuamane rei, ruamu me tuamane on aaheniki tewasi? Oyo aaheniki ne kepeni rai waroni asupure rei, ano me kepeni tea? Ruamu apusu me maue tau kepeni rai, iake. Auna kahatene rei nanie ta hae? Ano aakarota tumata tewa. Ne aakarota Anahatana." ⁵ Ananias iatinu tau rei, oyo iamnohoi imatai. Reiso sio pusiso wasoni oatinu tau rei, okaitau hunu ruao. ⁶ Reiso sio honua umau ohokaso, oyo oopa Ananias ne hatae samatoro ororiki poe manahane. Ororiki poe manahane nanie okaniki.

⁷ Oyo yam tonu ereniku nea oyo, Ananias sahai ihokai. Ianei tewasi ata sahai imatai nea. ⁸ Petrus iasau osiki, "Masi aasau, tuamane reimo wani oaheniki, osupu hunonie sanrei sirinia?" Iahata, "E-e. Hunonie wani sani ano aasau rei."

⁹ Iahata, "Sapani na ano runa sahamu oheu, nanie orea Anahatana Ne Inaha? Atinu! Sio sahoro okani sahamu wasoni ohokaso nea. Mka orori ano poe manahane oi." ¹⁰ Mata huni oyo, iamnohoi imatai mai Petrus uai anoe. Sio honua onususo, oyo osupui imatai nea. Reiso ororiki poe manahane samatoro okaniki. Okaniki poe sahai nusui. ¹¹ Reiso sio pusiso wasoni oparisaa rei, runa sio tamena pusiso wasoni oatinu tau rei. Oatinu oyo, okaitau hunu ruao.

Sio Maisosia Ouna Sima-simana Panesi

¹² Sio panesi onoo sio maisosia ouna sima-simana waroni ratuhete ata no kawasa rerihoni Anahatana panesi runa sima-simana waroni raasiraso panesi. Sio pusiso wasoni oparisaa oamanouso anoo osa pani Salomo Ne Teune roe Anahatana ne numa mainisie. ¹³ Masike sio tamena okaitau oamanouso runa sio wasoni oparisaa rei, sio panesi oamuiraso. ¹⁴ Sio panesi honu oparisaa tau Yesu, oyo oamanouso runa sio wasoni sinasi rei. Tau sio panesi rei wasoni mansia hanaha runa sio pinau oi.

¹⁵ Reiso orori sio kupua roe naniao te roe no kinoa na oautueso sui arenau. Oautueso na munata Petrus ieui sui arena rei, onoi eresahuso. ¹⁶ Mansia panesi ohokaso on noi niana waroni haineke Yerusalem. Ohokaso orori sio kupua runa sio wasoni sakahatena rasuniso. Osuisene sio pusiso.

Sio Onata Osota Sio Maisosia Honu

¹⁷ Ne ia mamkenu makapanau osi Anahatana no ia ona aihuhue runa ne mansiau oanana. Ne mansiau reimo wasoni rerihoni sio tikane Sadukiu. ¹⁸ Reiso osota sio maisosia. Osotaso oyo, onususo pani pui osi sio kahatena. ¹⁹ Ne nene pumono pani sanrei oyo, ia maisosie on roe Upuri isa iheka pui nene mitanunua pusire. Ihekare oyo, iautunu sio maisosia pani manahane. Ia maisosie on roe noiyahei rei iasau sanrei, ²⁰ "Masi oeumo roe Anahatana ne numa mainisie, oyo oanauso rerihoni sapani na Anahatana iapuhaiso rotu-tu ria supani."

²¹ Reiso tau kinoke, ohokaso roe Anahatana ne numa rei, oyo oautuhete sani ia maisosie iaaisosio rei.

Ia aihuhue tau sio mamkenu makapanau osi Anahatana runa ne mansiau ohokaso nanie oapisara. Reiso oanaha runa sio ona Yahudi nesia pusiso, samatoro oaisosi sio umau oeu onana sio maisosia na oasei tanuso. ²² Ne ohokaso poe pui, oyo osupu sio maisosia tewa nea. Osupuso tewa, reiso onuniso roe sio

onata, samatoro osima osiso sanrei, ²³“Ahokama poe pui, samatoro anoo ata sio okatunepa mitanunua pusire ia-ia nea. Sio mamsakaya wasoni osaka mitanunue. Ne aheka mitanunue rei oyo, asupu ia osa-sa pani pui anoe tewa nea. Pui rei huie nea.” ²⁴Sio onata tau/rerihoni sio mamkenu makapanau osi Anahatana runa no ia ona polisi oatinu sanrei, oyo oasei pani anoo, “Tutuso tewa. Sio rei, kaneta wasoni sui supa, omi?” Anoo rauponu runa mka sapani. ²⁵Oyo ia isa ihokai iasau sanrei, “Masi atinu. Sio rei, omi onususo pani pui, ne wasoro oatuhete roe Anahatana ne numa mainisie nea.” ²⁶Reiso ia ona polisi rei runa ne mansiau oeu onana sio maisosia rei. Ne otentene tanuso tewa. Tewa mo, okaitau sio panesi roe rei. Mka sio rei orauso tau hatu nanie ohunuso.

²⁷Sio orori sio maisosia poe sio onata, oyo oaisosiso ooo oamananeso. Ooo oamananeso oyo, ia aihuhue tau sio mamkenu makapanau osi Anahatana iaunauso sanrei, ²⁸“Ami asopo na pene oatuhete rerihoni ia rei nea. Ne oatuhete sui Yerusalem pusiki. Samatoro nanie opasanama oasau ata ami ahunui.”

²⁹Oyo Petrus runa sio maisosia tamena oasau sanrei, “Anahatana mo, kahuraa apusu ia naone. Apusu tumata tewa. ³⁰Anahatana waini rea upu oainaa runai iapuhai Yesus honu. Yesus rei, omi ohunui tau opaku roe hini wani reniene. ³¹Ia rei, Anahatana irui muirani manetane runa kawasa mainae osiki nea na iuna Natu runa la Sahoro lapuheuso. Iuna sanrei na sio Israel oarihoni no rosau na Anahatana isiru heure. ³²Anoo runa asima runa rai pusire. Anahatana Ne Inaha waini Anahatana iruiki osi sio wasoni opusu ne maunauna isima runare oi.”

³³Sio onata oatinu tau rei, oyo anoo ranuku-nuku ranaka-naka. Reiso nanie ohunu sio maisosia rei. ³⁴Ne ia onate isa waini nanai Gamaliel. Ia rei, ihitio roe, oyo iaisosiso orori sio maisosia onapa poe manahane mka-mka. Ia onate rei waini ia onate rerihoni akama Yahudiu. Ia waini ia matuhete Musa ne maunauna isa. Sio pusiso oamuirai. ³⁵Reiso sio maisosia ohokaso oyo, iasau osi sio onata sanrei, “Omi Israel. Ainati. Oarinii ia-ia rerihoni nanie ouna sae runa sio reini. ³⁶Naone ia isa waini nanai Teudas ihokai iahata ruai ia mainae, nanie iatana runa kupania. Sio utuni ate opusui. Ne ohunui, oyo ne mampusua orumaso sakakau, oyo ne maunauna tihonire. ³⁷Ita tau sio wasoni orekeni tau tumatau, ia isa waini nanai Yudas ihokai, nanie iatana runa kupania oi. Ia rei, ia rerihoni oteo Galilea. Iaunauso rotu-tu sio panesi opusui oi. Ne sio ohunu ia rei oi, oyo ne mampusua orumaso sakakau. ³⁸Reiso muie reini mo, tau parakana rei, au we maunaune sanrei. Pene ouna sae isa osiso. Sio ruao. Tau sae, munata sio no maunauna runa no taneiu rai, osupure rerihoni tumata mka tihonire. ³⁹Ne munata Anahatana sahoro iaisosiso, omi mka otentene tanuso na oarionire tewa. Mka onoo ata omi wani oatana runa Anahatana ruai.”

Oyo sio onata oapamata sou na opusu Gamaliel ne maunaune. ⁴⁰Reiso oanaha runa sio maisosia ohokaso honu, oyo osapuso. Osapuso oyo, osoposo na pene oatuhetesio rerihoni Yesus nea. Oyo sio onata ohokaso. ⁴¹Reiso ohokaso oarihoni sio onata rei. Oeuso anoo miri-mirika. Tau sae, Anahatana iahata sio iaka, reiso itapiso ouna sinsaraso noso Yesus. ⁴²Ranie hatae isa ereeu mai poua tonu rei suiosa sio oatuhete runa oaunauso tau Sou lake ata Yesus waini la Anahatana Iratiki lapuheuso. Oaunauso pani Anahatana ne numa mainisie, oaunauso sui sio no numau.

Sio Ohiti Sio Itu Na Oakahai Sio Maisosia

6¹Tau muie rei, sio panesi honu ouna sio mampusua sana ua-ua, sana wanu-wanu. Oyo sio Yahudiu wasoni oanamana tau sou Yunani oakarupu rerihoni sio Yahudiu wasoni oanamana tau sou Yahudi. Oahata, “Ta osama sio pina uhanu mo, osama ami ma sio pina uhanu tewa.” ²Reiso sio maisosia hutusa

rahana ua oanaha runa sio mampusua pusiso, oyo oasau sanrei, “Mania kakau, mania waniu. Ami aarihoni aanauso tau Anahatana ne anamanaya na asama sio tau muaine, areimo iake tewa. ³Reiso nene iake, omi onini sio itu rerihoni omi reini. Nini sio wasoni oanei ata Anahatana Ne Inaha irui kawasa osiso nea. Kahurae oanei sae wani iake, sae wani iake tewa. Oyo ami ahitiso na onana tane rei. ⁴Ne ami ruama aanamana runa Anahatana runa aanauso tau Anahatana ne anamanaya.”

⁵Oatinu tau rei iake, reiso onini:

Stefanus. Ia rei, iparisaa mainae. Anahatana Ne Inaha irui kawasa osiki.

Filipus,

Prokhorus,

Nikanor,

Timon,

Parmenas,

Nikolaus. Ia rerihoni kota Antiokhia. Iamrai, ia Yahudi tewasi, ne inusu Yahudi nea.

⁶Oyo oautue ituso mai sio maisosia, oyo sio maisosia oainisi tau Anahatana runa oahusieso, nanie ohitiso tau sio makahaia.

⁷Sio panesi honu oatinu Anahatana ne anamanaya, reiso sio mampusua sui Yerusalem okikasi oasinena rotu-tu sio panesi honu. Sio mamkenu makapanau osi Anahatana panesi oi oparisaa tau Sou lake rerihoni Yesus.

Sio Ona Yahudiu Osota Stefanus

⁸Stefanus rei, Anahatana irui iake osiki. Irui kawasa osiki, reiso iuna sima-simana waroni rasiraso runa sima-simana waroni retuhete ata ia ne kawasa on roe Anahatana. Sio panesi onoo. ⁹Ne sio umau nanie otuntana runai. Sio rei rerihoni numa manoune osi sio Yahudiu wani sio oaoiki tau numa manoune osi sio manianeu wasoni naone rei. Sio rei wasoni sio Yahudiu on pani nia Kirene runa nia Aleksandria, runa sio on poe otoa Kilikia runa otoa Asia. Reiso sio rei otuntana runai. ¹⁰Ne okuai tewa. Tau sae, Anahatana Ne Inaha irui anamana iaka osiki. ¹¹Reiso oanamana oahuni runa sio umau onana anoo. Oawaruso na osima oakarota. Oahata, “Ami aatinui ianamana khatene rerihoni Musa runa Anahatana.”

¹²Reiso onana sio rei anoo, oawaruso. Oawaru sio matuhete Musa ne maunauna runa sio ona Yahudi nesia rei oi. Oyo osota Stefanus, samatoro ororiki iamanane sio ona Yahudiu. ¹³Hoka roe oyo, osupu sio umau osima oakarota runa Stefanus. Oahata, “Ia rei, ianamana khatene rerihoni Anahatana ne numa mainisie wani monne tau Anahatana waini tanui. Ianamana khatene rerihoni maunauna waroni Musa isupure rerihoni Anahatana oi. ¹⁴Ami aatinui. Iahata, “Yesus mo, ia waini on pani nia Nasaret rei, mka ikuka Anahatana ne numa rei, oyo ipesi pusi re monna rairo waroni isupure arihoni Musa.”

¹⁵Sio onata pusiso oroui, oyo onoo uai anoe sani ia maisosie on roe noiyaha uai anoe.

Stefanus launau Sio Onata

7¹Oyo ia aihuhue tau sio mamkenu makapanau osi Anahatana iasei tau Stefanus, “Oasau sanrei, areimo manisate te tewa?”

²Iahata, “Wea amau, wea kakau, wea waniu. Masi oatinu! Anahatana waini ne rinane wani ita-itane eresita iatuhete ruai osi upuri Abraham tau ia waini iruei ria otoa Mesopotamia asi. Isuka irura niane wani nanae Haran tewasi. ³Iasau osiki iahata, ‘Aeu arihoni me niane rei runa me enau pusiso. Aeu pani tuamane otoa

isa mka uatuhetei osia.’⁴ Reiso Abraham ieu iarihoni otoa Kasdim, oyo isuka irura Haran. Iruei ria Haran rotu-tu amai imatai. Amai imatai oyo, Anahatana iaisosiki isuka mai tuamane reini, ita wani irueta tanui.⁵ Ne Anahatana irui tuamane otoa osi Abraham ruai tewa. Tuamane mkane iae, iruiki tewa. Ne Anahatana iahata, “Mka urui tuamane rei pusiki osi ano runa mea upu.” lasau sanrei, masike ne hehuka tewasi oi.⁶ Ne Anahatana iasau osiki ata, ‘Mea upu mka orueso sani sio rakana tau sio umau no tuamane. Sio wasoni no tuamane rei, mka onanaso tau manianeu oyo ounaso eresuniso rotu-tu musum utuni ate.’⁷ Ne au mo, mka uapasana sio rakana rei wasoni onanaso tau manianeu. Oyo mea upu rei oeu oarihoni sio wasoni no tuamane reipa, oyo oainaa runa au mai tuamane reini. Sio mka oainaa runa au sanrei, ‘Anahatana, ano iake naiosa. Ano arori ami anunima mai tuamane rei honu. Reiso ano iake tunne naiosa.’⁸ Itotote sanrei oyo, iaunutu akakiniae. Tau akakiniae rei, kahurae orehi nea upu pusiso. Orehiso na sio pusiso oanei ata oamanaku opusu sae wani Anahatana itotote rei. Reiso Ishak, Abraham anai, iamrai poe, oyo onona wanu oyo, orehiki. Ita Ishak iarehi anai Yakub oi. Ita Yakub ne hehuka, sio hutusa rahana ua. Sio rei wasoni rea upu mataanoe.

⁹ Rea upu mataanoe rei, sio osaturuu oanana noa wani Yusuf, reiso oaheniki na iuna maniane pani otoa Mesir. Ne Anahatana iakahaiki.¹⁰ Inana ne susau pusire rerihoniki. luna ia natu Mesir iahata ne hali iake. Tea mo, Anahatana iunai ianei pusire iake. lasau pusire iake. Reiso ia natu rei, ihitiki tau mansia mainae. Irui kawasa osiki na isaka Mesir runa ne numau pusire.

¹¹ Oyo pani Mesir runa otoa Kanaan pusire, osupu muaine tewa nea. Reiso eresuniso panesi. Rea upu osupu muaine tewa nea.¹² Yakub iatinu ata pani Mesir muaina waropa. Reiso iaisosi ne hehuka, rea upu rei, oeu pani mataanoe.¹³ Ita oeu honu, samatoro Yusuf isima runa ruai osi nea kakau ata ia mo, ia Yusuf. Oyo ia natu Mesir rei mato ianei rerihoni Yusuf nea enau.¹⁴ Oyo Yusuf iaisosiso oeu oanaha runa amai Yakub runa ne enau pusiso na osuka orura Mesir. Sio pusiso sio hutu itu rahana nima.¹⁵ Reiso Yakub sio osuka orura Mesir. Oru-rueso pani rei rotu-tu Yakub runa rea upu pusiso omataso pani Mesir.¹⁶ Oyo tau muie orori no hataya poe nia Sikhem honu, oyo okaniso poe hatu nohue wani naone Abraham ianei rerihoni Hemor ne ipane poe Sikhem. Isenui tau kepeni.

¹⁷ Haineke nea Anahatana nanie irui sae wani itotote osi Abraham. Rea upu okikasi oasinena pani Mesir nea.¹⁸ Oyo ohiti ia natu honue na iuna natu pani Mesir. Ia rei, iationa Yusuf tewa.¹⁹ Iakarota rea upu. luna mtinte tanuso. Itentene tanuso na opesi sio ikina wasoni mato oamrai mai tuniai. Opesiso pani manahane na omataso.²⁰ Tau muie rei, Musa iamrai. Ia ikine rei ia iake tunne naiosa. Inai runa amai opakananai pani no numa hunana tonu,²¹ oyo oahuniki. Oahuniki oyo, ia natu rei anai pina isupui, oyo ihetei roe. Ihetei roe oyo, ipakananai sani ia ruai anai.²² Oatuhete Musa tau pusire waroni sio Mesir oaneire. Isupu kawasa na ianamana iake runa iuna pusire iake.

²³ Musa ne musum hutu ate oyo, iapamata sou pani anoi, nanie inoo ne mansiau, sio Israel.²⁴ Hoka poe oyo, inoo ia Mesir isa iuna eresuni-suni ia Israel isa, reiso inetei. Ihita hunu ia Mesir rei.²⁵ Iahata ne mansiau oanei ata Anahatana waini iaisosiki na ialapisiso. Ne oanei tewa.²⁶ Ita hanroe honu inoo sio Israel ua oatanaso. Inina na osota hanao na ohunu nisa, reiso iasau, ‘Omi mo, omi kaka wani. Omi oatanamo, nanie ta hae?’²⁷ Ne ia waini ihita ne neta iruru Musa hae nusui, oyo iasei, ‘Ia seja ihiti ano na aaisosima? Ia seja ihitia na aapasinama?’²⁸ Ano nanie ahunu au oi sani potusi ahunu ia Mesir rei?’²⁹ Musa iatinu tau rei, oyo irumai iarihoni Mesir. Irumai rotu-tu ihokai pani otoa Midian. Hoka pani oyo, iausahai pani rei. Ne hehuka, sio ua.

³⁰ Musum hutu ate oyo, ia maisosie on roe noiyaha iatuhete ruai osiki pani oteo huie haineke tinetae wani nanae Sinai. Ia maisosie rei, iatuhete ruai osiki pani ai pukune, wani nooi sani usa ereai tanui. ³¹ Musa inoo ai rei, oyo isira. Reiso ihainekei, nanie inooi ia-ia. Oyo iatinu Upuri nioi. Iahata, ³² 'Au wani Anahatana tau mea upu. Au Anahatana wani Abraham, Ishak runa Yakub oainaa runaku.' Musa ikaitau hunu ruai, reiso ikana-kananunui. Ikaitau reiso ipenei inoo ai rei nea. ³³ Oyo Anahatana iasau honu, 'Nosu me sanraliu rai. Tuamane rei, ano wani aheta tanui, monne. Tau sae, au wani tanui. ³⁴ Unoo nea sapani na sio Mesir ouna mtinte tau we mansiau. Uanei nea sapani na eresuniso. Reiso ukaisunu nea nanie ualapasiso. Reiso mai. Au wani uaisosia anunia poe Mesir.

³⁵ Musa reini mo, sio Israel openeso tanui, reiso oasau sanrei, 'Ia seia ihiti ano na aaisosima. Ia seia ihitia apasanama?' Aikee Anahatana iaisosiki na iautunu sio Israel na iapuheuso. Ia maisosie on roe noiyaha waini iatuhete ruai osiki pani ai pukune wani usa ereai tanui rei iakahaiki. ³⁶ Musa reini mo, iautunu sio Israel ohokaso oarihoni Mesir tau iuna sima-simana waroni rasiraso runa sima-simana waroni retuhetesu ata ne kawasa on roe Anahatana. Iuna sima-simana rai pani Mesir, nau Nua Msinae, pani oteo huie rotu-tu musum hutu ate. ³⁷ Musa reini sahoro iasau osi sio Israel, 'Anahatana mka iaisosi ia mamsima ne anamanaya osimo rerihoni ruamo mo mansiau. Ia rei, sani au. Mka iapuheumo na oamahaimo rotu-tu ria supani.' ³⁸ Musa reini mo, iautunu sio Israel tau sio wasoni oeu ohoi pani oteo huie. Ia maisosie on roe noiyaha ianamana osiki roe tinetae wani nanae Sinai, oyo Musa iatuhete ne anamanaya rai osi rea upu. Isupu Anahatana ne maunauna waroni rakawana oyo iatuhetere osi ita oi.

³⁹ Ne rea upu openeso oatinu tau Musa. Openeso tanui, nanie onuniso pani Mesir mani. ⁴⁰ Reiso oasau osi Harun, 'Nana siaie na ami aainaa runai na erekata runama. Tea mo, Musa waini iautunuma aarihoni Mesir waini sui supa nea?' ⁴¹ Reiso tau muie rei onana anahatana wani titue tewa isa. Nitae sani koropou anae nene siaie. Onanai oyo, ohunu makapanau, nanie oainaa runa siaie rei. Oyo anoo mirika onoo sae wani sio ruao onanai, reiso ouna karisaa. ⁴² Reiso Anahatana ipenei tanuso. Ieu iarihoniso na oainaa runa oneu roe nante sani naone ia mamsima runa Anahatana ne anamanaya waini nanai Amos ikanu tau ne surate. Ikanu sani Anahatana ianamana sanrei,

'He omi Israel! Tau omi wani pani oteo huie rotu-tu musum hutu ate rai omi orehi makapanau osi au tewa.

⁴³ Ne omi onana oyo orori-rori Molok nene naniae runa one wani nanae Repan nene siaie. Molok runa Repan waroni sio rakana anahatanau waroni titue tewa.

Uare, omi onanare runa oainaa runare.

Reiso mka uanenamo hainau pani nia Babel pani hae.'

⁴⁴ Tau rea upu wasoni pani oto huie rei, orori numa unte wani Anahatana iasau ata iruei tanui. Numa unte rei, onanai sani Anahatana iaisosiso osi Musa. Ounai opusu siaie wani Anahatana iatuhetei osi Musa. ⁴⁵ Oyo tau muie honu, rea upu runa Yosua orori numa unte rei rotu-tu mai tuamane reini. Ororiki mai tau sio wasoni onana tuamane rei rerihoni sio niana. Anahatana waini inei sio niana rai oanaoneso. Numa unte rei wani mai rei rotu-tu aia Daud ne naene. ⁴⁶ Anahatana anoi iake tau Daud, reiso ialinisi nanie inana numa osi Anahatana waini Yakub iainaa runai. ⁴⁷ Ne anai Salomo waini ikatiki tau aia sahoro inana numa rei osiki.

⁴⁸ Ne Anahatana ia aihuhue iruei tau numa wani tumata inanai tewa. Masuae ia mamsima runa Anahatana ne anamanaya waini nanai Yesaya isupu anamanae isa rerihoni Anahatana sanrei,

⁴⁹ 'Au uuna natu on roe noiyaha.

Au uuna natu osi sio pusiso poe tuniai.
 Ano nanie auna numa nitae sae osiku?
 Naniaku uaranahaku wani sui supa?

⁵⁰ Au ruaku mo, uhaye tau pusire uture, tea?'

⁵¹ Omi mo, unumo onata. Omi sani sio wasoni oationa Anahatana tewa.

Openemo oatinu tau Anahatana. Omi sani moa upu oatana runa Anahatana Ne Inaha suiosa. ⁵² Moa upu ouna sinsara sio mamsima runa Anahatana ne anamanaya pusiso. Ohunu sio wasoni oasau ata mka pani muie ia waini anoi manisate naiosa ihokai. Muie reini mo omi mato oruiki osi sio ohunui. ⁵³ Sio maisosia on roe noiyaha orui Anahatana ne maunauna osimo nea. Ne omi reini mo openemo opusure."

Sio Orau Stefanus Tau Hatu Nanie Ohunui

⁵⁴ Sio onata rerihoni akama Yahudi oatinu Stefanus oasau ata ohunui, oyo anoo ranuku-nuku ranaka-naka. ⁵⁵ Ne Stefanus isupu kawasa rerihoni Anahatana Ne Inaha, oyo iamrou roe nante. Iamrou roe nante oyo, inoo Anahatana ne rinane wani ita-itane eresita. Inoo Yesus waini ioo hae Anahatana hanai wanane. Naniai rei nene manariti ia ne kawasa. ⁵⁶ Iahata, "Masi onoo! Unoo noiyaha erehekai. Ia Tumata Rei, Anahatana Ihitiki waini ioo hae Anahatana hanai wanane."

⁵⁷ Sio onata rei onopa tinao ukuna. Oakapona na pene oatinu Stefanus ianamana rerihoni Yesus sanrei. Oyo pusiso oruma oamanouso mai Stefanus.

⁵⁸ Onesai hae kota nene muie. Onesai rerihoni kota rei oyo, orai tau hatu nanie ohunui. Sio wasoni osima oakarota rei nanie orai, reiso oautue no papita osa-osa osi ia honue waini nanai Saulus. ⁵⁹ Tau sio wasoni orau-raui, Stefanus iainisi tau Yesus sanrei, "Upuku Yesus, aararuma we inaha." ⁶⁰ Oyo irike tune. Irike tune oyo, iakapona nioi mainae, "Upuku, asiru heu sio no rosa rei!" lasau sanrei, oyo imatai.

8 ¹ Ohunui, oyo Saulus anoi iake.

Saulus luna Sio Wasoni Oparisaa Sinsaraso

Ranie hatae rei oimo sio ouna sio wasoni oparisaa roe Yerusalem sinsaraso mainae naiosa. Reiso sio wasoni oparisaa rei oruma pusiso. Orumaso sui otoa Yudea runa otoa Samaria pusire. Hasae sio maisosia sahoro oruma tewa. ² Sio umau wasoni ouna-una sae waroni Anahatana ne suka okani Stefanus orani anoo rapunoko ruao.

³ Ne Saulus mo iuna rea sio wasoni oparisaa rei thioniso. Ihori no numau pusire inesa sio pinau, sio hanaia pusiso pani manahane, oyo inususo pani pui anoe.

Filipus launaso Poe Samaria

⁴ Sio wasoni oparisaa orumaso oyo, oaunaso tau Sou lake rerihoni Yesus sui supani-supani. ⁵ Filipus ieu poe niane isa poe Samaria, oyo iaunau rerihoni la Anahatana Iratiki Iapuheuso. ⁶ Sio oatinu Filipus ianamana, onooi iuna sima-simana, sio panesi oatinui ia-ia. ⁷ Tau sae, sakahatena panesi rahoka rerihoni sio panesi nea. Sio reimo oakapona, oyo sakahatena rahoka rerihoniso. Isuisene sio wasoni otalaso runa sio panesi wasoni oeu seu-seu oi. ⁸ Reiso sio poe niane rei anoo mirika naiosa.

Simon Waini Ne Kawasa Rerihoni Ia Aia Sakahatene

⁹ Poe niane rei waini ia isa nanai Simon. Sio pusiso poe Samaria osira potuina nea tau ne kawasa rerihoni ia aia sakahatene. lasau osiso iahata, "Au mo, au mansia mainae." ¹⁰ Sio mainaya, sio ikina, pusiso sui niane rei oatinui ia-ia. Oahata, "Ia reimo, isupu Anahatana ne kawasa waini sio oaoiki tau 'Kawasa Mainae.'"

¹¹ Potuina nea osira tau ia ne kawasa, reiso oatini ia-ia. ¹² Ne Filipus iaunauso tau Sou lake rerihoni sapani na Anahatana iuna natu mai tuniai reini. Iaunauso rerihoni Yesus, la Anahatana Iratiki lapuheuso. Oparisaa tau Filipus ne maunauna rai, oyo isohu heu no rosau. Isohu sio hanaia, sio pinau pusiso. ¹³ Simon oi iparisaa. Sio osohui, oyo ieu ikata-kata Filipus. Isira tau inoo Filipus iuna sima-simana runa sima-simana waroni retuheteso ata ne kawasa on roe Anahatana.

¹⁴ Sio maisosia roe kota Yerusalem oatini ata sio Samariau oparisaa tau Anahatana ne anamanaya nea, oyo oaisosi Petrus runa Yohanes uaso oeu poe tanuso. ¹⁵ Hoka poe oyo, uaso oainisi na sio Samariau rei osupu Anahatana Ne Inaha. ¹⁶ Tau sae, Anahatana Ne Inaha isipu inusui tanuso tewasi. Hasae sio osohu heu no rosau on oparisaa tau Upuri Yesus. ¹⁷ Reiso uaso oahusieso, oyo sio rei osupu Anahatana Ne Inaha.

¹⁸ Simon inoo ata Anahatana irui Ne Inaha osiso pusu sio maisosia oahusieso, reiso irori kepeni osiso. ¹⁹ Iahata, "Rui kawasa reini mo osi au oi, na uahusieso oi, oyo osupu Anahatana Ne Inaha."

²⁰ Ne Petrus on poe iasau, "Masi amataya aarihoni tuniai reini runa me kepeni raino. Ano ata mka asenu tau kepeni, oyo auna Anahatana Ne Inaha ihokai tanuso? ²¹ Ano me kawasa tewa na apusu tau ami mani tanei rei. Anomu katopue tewa tau Anahatana matai usena. ²² Pene aainisi sanrei ne aarihoni me khatene rei runa aainisi tau Anahatana na iuna heu me khatene rei. ²³ Tau sae, au mo, uanei ata ano asaturuu aanana naiosa. Ano me rosau rahehea."

²⁴ Iahata, "Masi oainisi tau Upuri osiku na pene sae isa ereeu sani omi oasau rei."

²⁵ Sio osima runa sae wani oaneiki rerihoni Yesus runa oaunauso tau Upuri ne anamanaya, oyo onuniso roe Yerusalem honu. Sui arena oaunauso tau Sou lake rerihoni Yesus sui niana-niana panesi sui Samaria.

Filipus iaunau la Mainae Isa On Pani Otoe Etiopia

²⁶ Ia maisosie isa on roe Upuri iasau osi Filipus sanrei, "Masi aeu pani na apusu arena on mai kota Yerusalem rotu-tu erehokai nau nia Gaza." Arena rei wapani otoe huie. ²⁷ Reiso ieu. Hoka poe arena tihue rei oyo, isupu ia mansia mainae on pani otoe Etiopia isa. Ia rei isaka Kandake ne kepeni. Kandake waini ia aia Etiopia. Ia reimo, ia pina. Ia ne ia mansia mainae rei mato ieu roe Yerusalem nanie iainaa runa Anahatana. ²⁸ Waini inuniki iru-ruei pani kareta anoe wani nene numa koropou erenesai. Waini inoo Yesaya, ia mamsima runa Anahatana ne anamanaya isa, ne surate. ²⁹ Oyo Anahatana Ne Inaha iasau osi Filipus, "Masi aeu ahaineke kareta reinau." ³⁰ Reiso iruma haineke kareta rei oyo, iatinu ia mainae rei ibaca rerihoni Yesaya ne surate. Filipus iasei tanui, "Upu. Abaca surate rei, aanei nene manariti te tewa?"

³¹ Iahata, "Sapani na uaneiki? Ia isa iatuheteku tewasi!" Oyo ianaha runa Filipus na isaa roe tanui na irue ikatai pani kareta anoe rei.

³² Ia waini inoo mamrunie reini rerihoni Anahatana ne anamanaya,

"Ia mo sani rompa wani onesai na ohunui.

Ia mo sani rompa anae wani oatori nene hunua.

Iasau sae isa tewa. Anamanae isa iae iasau tewa.

³³ Orati osohiki ne ia isa inetei tewa.

Imatai iarihoni tuniai reini,

reiso ia seia mka iruni rerihoni nea upu?"

³⁴ Ia mainae rei iasei tau Filipus sanrei, "Masi aasau poe, ia waini iruni reini mo, ianamana rerihoni rompa rei, ia seia? Ianamana rerihoni ruai te ianamana rerihoni ia isa honu?" ³⁵ Reiso Filipus iaunau. Inana mamrunie rei sani aikune nanie iaunau ia rei tau Sou lake rerihoni Yesus. ³⁶ Sio wasoni pani arena tihue, oyo osupu

waene. Reiso ia mainae iasau, “Masi anoo waene reipo. Nesi sae asi na asohu heu we rosau?”

³⁷ Iahata, “Munata aparisaa runa anomu pusiki, au mka usohua.”

Iahata, “Uparisaa ata Yesus Kristus waini Anahatana anai.”

³⁸ Oyo iaisosi kareta rei retaehe samatoro uaso osipuso on roe kareta rei.

Osipuso oyo, oeuuso poe waene rei. Hoka poe oyo, Filipus isohui. ³⁹ Ohokaso on poe waene rei, oyo Upuri Ne Inaha inana Filipus iarihoniki. Ia mainae rei inooi tewa nea. Oyo ieuu honu anoi mirike. ⁴⁰ Mata huni oyo, Filipus waini poe nia Asdod nea. Oyo ieu ihori niana-niana iaunauso tau Sou lake rerihoni Yesus rotu-tu ihokai poe nia Kaisarea.

Saulus Iparisaa Tau Yesus

9¹ Ne Saulus inehu iawana iahata nanie ihunu Upuri ne mampusua, reiso ieuu roe ia aihuhue tau sio mamkenu makapanau osi Anahatana. ² Ieuu roe ia aihuhue rei, nanie iainisi surate na isupu kawasa na ieuu pani kota Damsyik pani sio onata tau numa manouna osi sio Yahudiu pani rei. Nanie isupu kawasa na munata isupu sio wasoni oparisaa tau Yesus, sio pinau te sio hanaia pusiso, ia mka inotaso, oyo iroriso roe Yerusalem. Isupu surate rei, oyo ieuu.

³ Reiso Saulus ieuu pani Damsyik. Hoka pani haineke nea oyo, mata huni oyo, ita-itane wani rinane on roe noiyaha eresita-sita sani isoe erehori Saulus. ⁴ Ita-itane eresita oyo, iamnahui poe tuamane, oyo iatinu ia isa nioni iasau osiki sanrei, “Saulus, Saulus! Ano mo nanie auna sinsaraku, nanie ta hae?”

⁵ Saulus on poe iasei honu, “Upu, ano mo ano seia rei?”

Iahata, “Au reini mo, au Yesus ano wani auna sinsaraku. Auna we mampusua sinsaraso, areimo sani auna au ruaku sinsaraku. ⁶ Ne hanu nea, oyo aeuu poe kota rei. Hoka poe oyo, ano mka aatinu rerihoni kahuraa auna sae.”

⁷ Sio wasoni okata Saulus rei osira, reiso niono tewa, oasau runa sae isa tewa. Oatinu nioke rei, ne onoo ia isa tewa. ⁸ Oyo Saulus ihitio roe, iheka matai usena, ne inoo sae isa tewa nea. Matai usena raputiso. Reiso sio orime tau hanai samatoro oeu oautunui poe Damsyik. ⁹ Inoo mosa tewa runa iai sae isa tewa, ininu sae isa tewa rotu-tu onona tonu.

¹⁰ Poe Damsyik waini ia mampusue isa nanai Ananias. Upuri ianamana osiki tau masasua nea. Iahata, “Ananias!”

Iahata, “Upu, au reini.”

¹¹ Iahata, “Ananias, masi aeuu pani Yudas ne numa, pani arena wani sio oaoiki tau Arena Katopue. Aasei tanuso rerihoni ia isa waini nanai Saulus. Saulus rei iamrai pani nia Tarsus. Waini iainisi tau au. ¹² Ia mo, inoo masasua nea. Inoo ia isa waini nanai Ananias ihokai tanui, oyo iahusiei na inoo honu.”

¹³ Iahata, “Upu, au mo, uatinu sio panesi oruni-runi nea runa sapani na iuna ano me mansiau roe kota Yerusalem sinsaraso. ¹⁴ Muie reini mo ihokai mai runa kawasa rerihoni sio onata tau sio mamkenu makapanau osi Anahatana na isota sio pusiso wasoni oainisi na ano aakahaiso.”

¹⁵ Ne Upuri iasau sanrei, “Masi aeuu. Au mo, unini ia rei nea na ianori runaku.

Mka isima runa au osi sio wasoni oationa Anahatana tewa, osi sio no aiau, runa sio Israel oi. ¹⁶ Au mo, mka uatuhetei sapani na kahuraa sinsarai tau iparisaa tau au.”

¹⁷ Reiso Ananias ieuu pani numa rei. Hoka pani oyo, iahusie Saulus, oyo iasau, “Waniku Saulus, Upuri Yesus waini anooi kua arena tihue rei tau ano wani ahokaya mai, iaisosiku ueuku mai na anoo honu. Mka asupu kawasa rerihoni Anahatana Ne Inaha. ¹⁸ Oyo sae isa, nooi sani ika unaya, rarenu rerihoni matai usena, oyo inoo iake honu. Inoo iake, reiso ihanui, oyo Ananias isohu heu ne rosau. ¹⁹ Ananias isohui oyo, Paulus iaiki, oyo iamkona honu.

Saulus iaunaso Pani Kota Damsyik, Oyo Roe Kota Yerusalem

Saulus iararane ikata sio mampusua pani kota Damsyik rotu-tu onona inasa rai. ²⁰ Ananias isohu heu Saulus ne rosau oyo, mata huni oyo, Saulus ieu iaunaso sui numa manouna osi sio Yahudiu isima iahata, "Yesus mo, ia waini Anahatana anai."

²¹ Sio pusiso osira oatinu tau Saulus. Oasei tau umau sanrei, "Ia reini sahoro ihunu sio pusiso wasoni oparisaa tau Yesus roe Yerusalem, tea? Ihokai mai, nanie isota sio wasoni oparisaa, oyo iroriso roe sio onata tau sio mamkenu makapanau osi Anahatana, tea?"

²² Saulus iaunaso iake, reiso sio wasoni oparisaa rei okikasi oasinena suosia. Iaunaso rei iahata, "Yesus mo, ia waini la Anahatana Iratiki lapuheuso." Iaunaso rotu-tu sio oanei tewa nea otuntana runai sapani.

²³ Onona inasa rai oyo, sio Yahudiu orue oheu nanie ohunu Saulus. ²⁴ Ne Saulus iatinu rerihoni kaheute rei. Osaka-saka kota rei nene mitanunua pusire onone ranie nanie ohunui. ²⁵ Ne taue isa tau pumono, Saulus ne mampusua onanai, oyo oratiki tau pakune on roe, sui kota nene pakelo tinaie.

²⁶ Oyo Saulus ieu roe Yerusalem. Hoka roe oyo, nanie iamanou tau osa runa Yesus ne mampusua. Ne okaitau. Oparisaa tewa ata manisate ia waini ia mampusue nea. Oahata iakarota mani. ²⁷ Oyo Barnabas ihokai noi tanui, oyo iautunui pani sio maisosia. Barnabas iruni osiso runa sapani na Saulus inoo Upuri kua arena tihue. Iruni runa sapani na Upuri ianamana osiki. Isima osiso runa sapani na Saulus iatuhetesou rerihoni Yesus poe Damsyik. Iatuhetesou ikaitau tewa. ²⁸ Reiso Saulus iruei ikataso. Iaunaso rerihoni Upuri sui Yerusalem pusiki. Ikaitau tewa. ²⁹ Ianamana iawaru oi runa sio Yahudiu wasoni oanamana sou Yunani, ne sio onina rea, nanie ohunui. ³⁰ Sio wasoni oparisaa oatinu tau rei, reiso sio oautunu Saulus nau nia Kaisarea, oyo oaisosiki ieu pani nia Tarsus.

³¹ Oyo sio wasoni oparisaa rei sui otoa Yudea, otoa Galilea, runa otoa Samaria sinsaraso tewa nea. Anahatana Ne Inaha iakahaiso reiso okikasi oasinena. Oparisaa ia-ia. No hali oamuiria Upuri.

Petrus Isuisene Eneas Runa Dorkas

³² Petrus ieu ihori iaunau Anahatana ne mansiau sui supani-supani mani. Taue isa ieu nau nia Lida, nanie inoo Anahatana ne mansiau nau niane rei. ³³ Hoka nau oyo, isupu ia hanaie isa waini nanai Eneas. Ia rei ia waini italai. Musum wanu nea inekei mani. Ihanu kua tewa nea. ³⁴ Reiso Petrus iasau osiki, "Eneas, Yesus Kristus waini isuisenea nea. Hanu roe. Aautotu naniamu reino." Mata huni tewa oyo, ihanui. ³⁵ Sio pusiso nau Lida runa otoa Saron onoo Eneas, oyo pusiso oparisaa tau Upuri.

³⁶ Nau nia Yope waini ia pina isa nanai Tabita. Ia pina rei, iparisaa tau Yesus. (Tau sou Yunani, Tabita nene manariti Dorkas, nene manariti maiyanane.) Ia iuna-una iake runa iaka-kahai sio mosokinia. ³⁷ Tau muie rei ikupui, oyo imatai. Imatai oyo, sio osohu tinaini, oyo oautuei roe kakaranae roe naue. ³⁸ Yope runa Lida waroni haineke umau. Reiso sio mampusua nau Yope oatinu ata Petrus waira Lida, oyo oaisosi sio ua oeuo ria tanui. Hoka ria oyo, oasau osiki sanrei, "Masi aeua san-sana nau." ³⁹ Reiso Petrus ihitioi roe, oyo ieu ipususou. Hoka nau oyo, oautunui roe kakaranae rei. Sio pina uhanu wasoni ooo ohoriki orani, oyo oautuhete papita runa apia tamena osiki. Apia rai, Dorkas ihonire on waini iamahaiki asi. ⁴⁰ Oyo Petrus iaisosi sio pusiso ohokaso, oyo irike tune nanie ianamana runa Anahatana. Ianamana runa Anahatana oyo, iuniki inoo ia matane rei, iahata, "Tabita, hanu roe!" Oyo Dorkas iheka matai usena inoo Petrus. Inooi oyo, ihanui iru-ruei. ⁴¹ Oyo Petrus isopa hanai osiki irime ihitioi roe. Ihitioi roe oyo, Petrus

ianaha runa sio pina uhanu runa sio pusiso wasoni oparisaa rei, oyo iatuhete ia pina onate rei osiso. Waini iamahaiki honu. ⁴² Sio panesi sui Yope pusiki oatinu tau rei, reiso sio panesi oparisaa tau Upuri Yesus. ⁴³ Petrus iruei potuina nau Yope. Iruei tau Simon ne numa. Simon mo, ia ne tanei tau makapana unte.

Kornelius Runa Petrus Onoo Masasua

10 ¹ Poe nia Kaisarea waini ia hanaie isa nanai Kornelius. Ia waini ia kapitane tau sio soratatua utuni. Oaoi ne tikane tau, “Tikane Italia.” ² Iamuirā Anahatana. Ia runa ne numa pusiso oainaa runa Anahatana. Iamanane iaka-kahai sio Yahudiu wasoni omosokiniso. Iana-anamana runa Anahatana. ³ Taue isa, tau ranie manne inoo masasua. Inooi manisate. Inoo ia maisosie on roe Anahatana isa ihokai, oyo ioiki. Iahata, “Kornelius!”

⁴ Kornelius inoo ia maisosie rei, ikaitau, oyo iasei, “Sae rei, upu?”

Iahata, “Anahatana iatinu tau me mainisie iake nea. Inoo ata ano aamanane asama sio mosokinia. Reiso anoi erepeka runaya. ⁵ Reiso aaisosi ia isa na ieu pani niane wani nanae Yope na aanaha runa Simon. Nanai naue Simon Petrus. ⁶ Ia waini iararane pani Simon ne numa. Simon rei, ia ne tanei tau makapana unta. Iruei nau nuae nusue.” ⁷ Ia maisosie rei ianamana runa Kornelius suka, oyo ieu. Ieu oyo, Kornelius ianaha runa ne makahaia ua runa ia tantara isa. Ia tantara rei iai-ainaa runa Anahatana. ⁸ Kornelius iruni osiso runa ne masasua rei, oyo iaisosiso oeuo pani Yope.

⁹ Hanr roe oyo, sio wasoni oeuo pani Yope asi. Wasoni haineke nea. Oyo Petrus isaa roe numa hahae tau ranie katopu, nanie ianamana runa Anahatana. ¹⁰ Oyo imakaneai mainae, nanie iaiki. Sio wasoni oatanunu osiki, oyo inoo masasua sanrei. ¹¹ Inoo nante erehekai, oyo sae isa nooi sani nipa hekani, sio oratiki. Nooi sani sio oakananai tau nene susua ate. ¹² Pani nipa anoe isupu makapanau nene ai atua ate nitaya pusire, sae waroni rausu te raeu nene tiaya rahanunu pusu tuamane nitaya pusire. Isupu manu seaya oi. ¹³ Oyo iatinu nioke isa ereasau sanrei, “Petrus, hanu roe. Hunure na aire.”

¹⁴ Petrus on poe iasau, “Upu, au upeneku! Au mo, uai muaine wani repaputiki te monne isa tewasi. ¹⁵ Iahata, “Pene aasau ata sae wani Anahatana iasau ata ano aaike iake, pene aasau ata monne.” ¹⁶ Sani rei nai tonu oyo, Anahatana iapusaa nipae rei roe noiyaha honu.

¹⁷ Petrus iasei pani anoi, “Masasua rei, Anahatana nanie iasau sae osiku pusui?” Waini iarinii asi, oyo sio maisosia on poe Kornelius osupu ne numa. Oasei tau sio umau rotu-tu osupui. Sio wasoni oooso poe mitanunue nea. ¹⁸ Sio ooi, oyo oasei, “Waini ia isa iararane mai numa reini nanai Simon Petrus?”

¹⁹ Petrus waini iarinii ne masasua rei asi, oyo Anahatana Ne Inaha iasau osiki, “Ee, Petrus. Sio tonu wasopo oninaya. ²⁰ Hitio! Sipu poe! Aeu akataso iake. Pene aarinii ata kani apusu ia waini ia Yahudi tewa, apusui iake te tewa. Au sahoro uaisosiso.” ²¹ Reiso Petrus isipui poe, oyo iasau osiso sanrei, “Au reini mo sahoro omi wani oninaku. Ohokamo mai, onina au nanie ta hae?”

²² Iahata, “Kornelius, ia kapitane, iaisosima mai. Ia mo, anoi manisate. Iamuirā Anahatana. Reiso sio Yahudiu pusiso oamuirai mainae. Ia maisosie on roe noiyaha waini ia manisate onate isa iaisosiki na iainisi ata ano aeua pani ne numa na iatinu tau me maunaune.” ²³ Reiso Petrus iaisosiso sanrei, “Mai, onusu mai. Oarananemo mai numa reini mkane.”

Petrus Ieu Poe Kornelius Ne Numa

Hanu roe oyo, Petrus ihanui, oyo ieu ikata sio on poe Kornelius ne numa. Sio umau wasoni oparisaa tau Yesus pani nia Yope rei oeu okatai oi. ²⁴ Oyo nene

hanu roe honu samatoro ohokaso poe nia Kaisarea. Poe rei Kornelius waipo inapa-napaso ikata ne mansiau runa ne netau iaka wasoni ianaha runaso nea. ²⁵ Hoka poe oyo, Petrus inusui pani ne numa. Oyo Kornelius ieu iatapeai, oyo iamnohoi mai Petrus uai anoe iainaa runai. ²⁶ Ne Petrus ihetui ihitioi roe, oyo iasau, "Hitio roe! Au reini mo, au tumata oi sani ano rei tea?" ²⁷ Petrus waini ianamana asi, oyo inusui pani kakaranae isa. Oyo inoo ata sio panesi oamanouso nea. ²⁸ Oyo iasau osiso, "Wea amau, wea kakau, wea waniu. Omi ruamo oanei nea ata ami Yahudiu mani monne eresopo na pene anusu ia tamene ne numa te pene akata ia tamene. Ne Anahatana iatuheteku nea ata au uahata ia sia mani iapaputiki te monne. Uahata sanrei, areimo iake tewa. ²⁹ Reiso ano aanaha runaku, uhokaku mai. Uasau tea ata, 'Upeneku.' Reiso nanie uanei nea. Aanaha runaku, nanie ta hae?"

³⁰ Iahata, "Kakaku Petrus. Onnaha tonusi, ranie sanrei, au wani uanamana runa Anahatana mai numa tau ranie manne. Mata huni oyo, ia hanaie isa waini ioo mai uaku anoe. Ia rei, ne papite erekino-kinoi. ³¹ Iahata, 'Kornelius! Anahatana iatinu me mainisie nea. Anoi erepeka ata ano aamanane asama sio mosokinia. ³² Reiso aaisosi ia isa ieu pani Yoepo na aanaha runa ia isa waini nanai Simon Petrus na ihokai mai iaunaumo. Waini iararane pani ia isa ne numa. Ia rei ne tanei tau makapana unta. Nanai Simon. Ne numa wanau nuae nusue. ³³ Reiso uaisosiso san-sana na oanaha runaya. Anomu mo, anomu iake mainae ahokaya mai. Muie reini mo, aamanouma mai rei na aatinu pusire waroni Anahatana iaisosia aasau osima. Anahatana waini mai rei ikata ita oi."

³⁴ Reiso Petrus iaunauso sanrei, "Wea amau, wea kakau, wea waniu. Muie reini mo, au mato uanei ia-ia ata Anahatana irui osa osi pusita. ³⁵ Anahatana iararuma ia seia mani, rerihoni niane sae mani. Hete sae, iamuirai runa iuna sae wani manisate. ³⁶ Omi oanei nea. Oanei maunauna waroni Anahatana iruire osi ami Israel. Maunauna rai waroni Sou lake rerihoni sapani na Yesus Kristus imatai, oyo ihunu re nisa runa Anahatana. Yesus rei mo, ia Upuri waini irime sio tuniai reini pusiso. ³⁷ Oanei nea sapani pani otoo Yudea pusiki. Yohanes iasau ata isohu heu no rosau, oyo Sou lake rerihoni Yesus nene aikune ria otoo Galilea. ³⁸ Oanei nea ata Anahatana ihiti Yesus, ia Nasaret rei nea. Oanei ata irui Ne Inaha osiki reiso isupu kawasa. Ieu ihori sui supani-supani iuna iake. Isuisene sio pusiso wasoni ia aia sakahatene iakarotaso. Tau sae, Anahatana ikata runai. ³⁹ Ami ruama anoo ne atata pusire pani kota Yerusalem runa ami Yahudiu mani tuamane pusiki. Ne sio opakui roe hini wani reniene reiso ohunui. ⁴⁰ Ne nene pouarei oyo, Anahatana iapuhaiki honu rerihoni sio matana, oyo iatuhetei osi sio umau na onooi. ⁴¹ Sio pusiso onooi tewa. Hasae ami wani Anahatana ininima naone sahoro anooi. Asima osi sio pusiso. Aaima akatai on iamahaiki honu rerihoni sio matana. ⁴² Yesus iaisosima na aanauso runa asima ata ia waini Anahatana ihitiki na iapasana sio pusiso, sio wasoni oamahaiso runa sio wasoni omataso nea. ⁴³ Sio mamsima runa Anahatana ne anamanaya pusiso oanamana rerihoni ia rei. Sio oasau ata sio pusiso wasoni oparisaa tau Yesus, mka Anahatana isiru heu no rosau tau kawasa rerihoni Yesus."

⁴⁴ Petrus waini ianamana asi, oyo sira tau Anahatana Ne Inaha isipu. Isipu oyo, sio pusiso wasoni oatinu tau maunaune rei osupu kawasa. ⁴⁵ Sio Yahudiu wasoni oparisaa tau Yesus wasoni opusu Petrus on pani Yoepo, sio pusiso osira onoo ata Anahatana irui Ne Inaha osi sio wasoni sio Yahudiu tewa oi. ⁴⁶ Tea mo, oatinu sio rei oanamana tau sou waroni ruao oaneire tewa. Sio wasoni oainaa runa Anahatana oahata, "Anahatana! Ano mo, ano iake naiosa! Ano arui Yesus osima na aparisaa tau ia na asiru heu mani rosau. Ano iake tunne naiosa."

Oyo Petrus iasau, ⁴⁷“Masi onoo, sio rei osupu Anahatana Ne Inaha sani ita nea. Sapani na ia isa isopo na pene osohu heu no rosau tau tihu?”

⁴⁸Reiso Petrus iaisosiso na osohu heu no rosau tau sio oparisaa tau Yesus Kristus. Osohuso, oyo oainisi na Petrus iararane ikataso onona inasa rai.

Petrus Isima osi Sio wasoni Oparisaa roe Yerusalem

11 ¹Sio maisosia runa sio wasoni oparisaa sui otoa Yudea pusiki oatinu ata sio wasoni sio Yahudiu tewa oparisaa tau Anahatana ne maunauna nea. ²Petrus ieu roe Yerusalem, oyo sio Yahudiu wasoni oparisaa rei oasau tanui. ³“Aeua poe ia Yahudi tewa waini sio orehiki tewasi ne numa, nanie ta hae? Oyo aai akataso oi.” ⁴Reiso Petrus iatuhetesore rihoni pusire, on mataanoe rotu-tu pusiki. Iahata, ⁵“Wea amau, wea kakau, wea waniu. Taue isa, au mo, au wani uanamana runa Anahatana nau nia Yope, oyo unoo masasua isa. Unoo sae isa sani nipae hekani, noo sani sio oratiki on roe nante. Nooi sani oakatanai tau nene susua ate rei. Oyo retaehei mai nusuku. ⁶Unoo pani nipae anoe ia-ia, oyo unoo makapanau waroni nene ai atua ate, makapanau waroni rasea, sae waroni rausu te raeu nene tiaya rahanunu pusu tuamane runa manua rasea. ⁷Oyo uatinu nioke ereasau sanrei, ‘Petrus, hanu roe. Ahunure na aire.’ ⁸Ne au on poe uasau, ‘Upu, upeneku. Au mo, uai muaine wani repaputiki te monne isa tewasi.’ ⁹Ne uatinu nioke rei on roe nante ereasau honu, ‘Sae wani Anahatana iasau nea ata ano aaike iake, pene aasau ata monne.’ ¹⁰Sani rei nai tonu oyo, Anahatana iapusaa pusire roe noiyaaha honu. ¹¹Mata huni tewa oyo, sio tonu ohokaso on poe nia Kaisarea. Kornelius iaisosiso poe tanuku. Ohokaso poe numa wani uararane tanui. ¹²Oyo Anahatana Ne Inaha iaisosiku ueu ukataso. Ipenei tau au uuna ano-ano ata kani iake te tewa. Sio nome wasoni oparisaa reini mo, opusu oi, rotu-tu poe Kaisarea. Hoka poe oyo, anusuma pani Kornelius ne numa. ¹³Anusu pani, oyo Kornelius isima osima runa sapani na inoo ia maisosie on roe noiyaaha isa ioo pani ne numa, oyo iasau, ‘Aaisosi ia isa ieu pani Yope na aanaha runa ia hanaie isa waini nanai Simon Petrus. ¹⁴Ia mka isima osia runa maunauna rihoni sapani na Anahatana iapuheua na aamahaia rotu-tu ria supani. Ano runa me mansiau pusimo. ¹⁵Au mato uanamana, oyo Anahatana Ne Inaha ikaisunu inusui tanuso sani naone runa ita oi. ¹⁶Oyo anoku erepeka ata naone Upuri iasau sanrei, ‘Yohanes isohu heu mo rosau tau tihu, ne mka Anahatana inusu Ne Inaha osimo.’ ¹⁷Reiso Anahatana irui Ne Inaha osi sio rei, sani iruiki osi ita Yahudiu oi pannuhu ita iparisaa tau Upuri Yesus, ia Anahatana Iratiki lapuheuso. Reiso sapani na usopo Anahatana? Anahatana mato iatuheteku ata ita Yahudiu runa sio wasoni sio Yahudiu tewa, inoo pusita osa.” ¹⁸Sio oatinu tau rei, oyo oasau tanui tewa nea. Oyo oainaa runa Anahatana. Oasau sanrei, “Reiso ita ianei nea ata Anahatana itapi sio wasoni sio Yahudiu tewa oarihoni no rosau runa oamahaiso rotu-tu ria supani.”

Sio wasoni Oparisaa poe Kota Antiokhia

¹⁹Naone sio ohunu Stefanus, oyo ouna sio wasoni oparisaa sinsaraso rotu-tu sio pusiso oruma owena-wenaso. Sio umau orumaso poe otoa Fenisia, sio umau orumaso nau nusa isa wani nanae Siprus, sio umau honu orumaso poe kota Antiokhia. Sio oau-aunau sio Yahudiu mani tau Sou lake rihoni Anahatana. ²⁰Ne sio umau rihoni sio rei wasoni on nau nusa Siprus runa sio rihoni nia Kireneu. Sio rei oeuso poe Antiokhia. Hoka poe oyo, oainuu sio wasoni sio Yahudiu tewa. Oaunau sio rihoni Upuri Yesus. ²¹Upuri irui kawasa osiso reiso sio panesi oparisaa. Orui ruao osi Upuri na opusui.

²²Sio wasoni oparisaa roe Yerusalem oatinu tau rei, reiso oaisosi Barnabas ieu poe Antiokhia. ²³Hoka poe oyo, Barnabas inoo ata Anahatana irui iake osiso, reiso

anoi mirike. Oyo iaunaso na sio rei opusu Anahatana runa anoo pusire. ²⁴ Ia rei, ia waini anoi iake. Isupu kawasa rerihoi Anahatana Ne Inaha na iparisaa mainae tau Anahatana. Sio Antiokhia onoo Barnabas waini sanrei, reiso sio panesi opusu Upuri.

²⁵ Oyo Barnabas ieu nau nia Tarsus, nanie inina Saulus. ²⁶ Hoka nau oyo, isupui, oyo iautunui ria Antiokhia. Reiso hoka ria oyo, sio oamanouso runa sio wasoni oparisaa. Oatuhete sio panesi rotu-tu musum osa. Ria Antiokhia rei sio mato oaoi sio wasoni oparisaa tau sio Kristen.

²⁷ Tau muie rei, sio mamsima runa Anahatana ne anamanaya umau ohokaso poe Antiokhia on roe kota Yerusalem. ²⁸ Ia mamsimane isa waini nanai Agabus iamanou runa sio wasoni oparisaa, oyo ihitioi roe. Isupu kawasa rerihoi Anahatana Ne Inaha na isima runa pani muie mka sapani. Iahata, “Potuina tewa nea, oyo sio pusiso sui tuniai reini mo, osupu muaine tewa nea.” (Poe oyo, ereeu sanrei sirinia pannuhu Klaudius waini ia natu.) ²⁹ Reiso sio mampusua opamata sou nanie oauwatu kepeni osi no netau wasoni oparisaa rei pani oteo Yudea. Sio pusiso orui pusu ruao no kepeni waromo sapani. ³⁰ Ouna sanrei oyo, oaisosi Barnabas runa Saulus orori kepeni rai osi sio onata tau sio wasoni oparisaa pani rei.

Ia Maisosie On Roe Noiyaha Isa Ihoka Petrus On Pani Pui Anoe

12 ¹ Barnabas runa Saulus wasoni poe kota Antiokhia oyo, ia aia Herodes iaisosi sio umau osota sio onata tau sio wasoni oparisaa rei, nanie iunaso sinsaraso. ² Iaisosiso ohunu Yohanes kakai waini nanai Yakobus tau tunue. ³ Herodes inoo ata iuna sanrei, sio Yahudiu okaumini, reiso iaisosiso osota Petrus oi. Osotai tau karisaa sio Yahudiu oai poroti eresaa tewa. ⁴ Osotai, oyo onusui pani pui anoe. Sio tantarau tikana ate osaka-sakai. Tau tikane osa wasoni sio tantarau ate. Herodes ne kaheute nanie inapa rotu-tu karisaa anoo rapeka runa noa upu oarihoni Mesir pusiki, samatoro iasei tanui. Iasei tanui, sio pusiso oasumata. Nanie iasei tanui na ihunui.

⁵ Reiso osaka-saka Petrus pani pui anoe. Ne sio wasoni oparisaa rei, wasoni oai-ainisi runa anoo pusire tau Anahatana osiki.

⁶ Nene hanu roe Herodes nanie iasei tanui, oyo pumono pani sanrei oyo, Petrus waini inekai ikata sio tantarau ua. Petrus waini pakatihue. Okanihooi tau ranteu tau sio tantarau ua rei. Sio tantarau tamena wasoni osaka-saka pui nene mitanunue oi.

⁷ Mata huni oyo, ia maisosie isa on roe Upuri ioo pani rei, oyo rinane eresita sui pui nene kakaranae rei pusiki. Ia maisosie rei ihita Petrus nusui, nanie ihanui. Iahata, “He, hanu san-sana roe!” Oyo ranteu rai suru poe ramnahuso rarihoni hanai atua.

⁸ Oyo ia maisosie iasau, “Ausahu me apia. Kanihoo me sanraliu.” Oyo Petrus iuna sani iasau rei. Oyo iasau honu, “Ausahu me papi titie na aeu mai akataku.”

⁹ Reiso Petrus ieu ipusu ia maisosie rei rotu-tu ihokai pani manahane rerihoi pui anoe rei. Ne Petrus ianei tewa ata manisate waini ihokai rerihoi pui anoe rei. Iahata kani inoo masasua mani. ¹⁰ Sio oniku sio mamsakaya mataano. Ita oniku sio mamsakaya umau honu samatoro ohokaso poe mitanunu mamono wani opusui rotu-tu ohokaso poe kota. Mitanunue rei ruae erehekai, oyo ohokaso samatoro oeso sui arena isa. Mata huni oyo, ia maisosie ieu iarihoni Petrus.

¹¹ Oyo Petrus mato ianei ata manisate ihokai rerihoi pui anoe nea. Iahata, “Muie reini mo, uanei ia-ia nea ata Upuri iaisosi ne maisosie on roe noiyaha na inanaku rerihoi Herodes ne kawasa. Inanaku rerihoi pusire waroni sio Yahudiu nanie ona osiku.”

¹² Petrus ianei nea, oyo ieu ria Maria ne numa. Maria rei sahoro Yohanes inai. Yohanes, sio oaoiki tau Markus oi. Ria ne numa rei, sio panesi oamanouso nea. Sio wasoni oainisi. ¹³ Petrus iakapeti mitanunu pakelo, oyo ia pina makahaie waini

nanai Rode, ihokai, nanie inoo runa ia seia waini iakapeti mitanunue rei. ¹⁴ Iationa Petrus nioni, reiso anoi mirike. Anoi mirike, reiso iheka mitanunue tewa. Ne inusui pani numa rei honu, oyo isima osiso. Iahata, “Petrus waipa manahane.” ¹⁵ Oahata, “Amukea.”

Ne Rode iasau-iasau ata, “Titue, Petrus waipa manahane. Petrus waipa nea.”

Ne sio on poe oasau oahata, “Areimo ne maisosie on roe noiyaha. Naone isakai. Ihokai nea, nanie isima ata Petrus imatai nea.”

¹⁶ Oasau sanrei Petrus waini iaka-kapeti mitanunue sirinia. Reiso oheka mitanunue rei, oyo onooi. Osira hunu ruao. ¹⁷ Petrus isopo tau hanai na oamaturuso, oyo isima runa sapani na Upuri iautunui rotu-tu ihokai rerihoni pui anoe rei. Oyo iahata, “Asima osi Yakobus runa rea kakau rea waniu tamena oi.” Oyo Petrus ieu iarihoni naniai rei, oyo ieui noi naniai tamene.

¹⁸ Nene hanu roe oyo, sio tantarau poe pui rei ouna purie naiosa. Oasei tau umau, “Petrus waini sui supa rei omi?” ¹⁹ Oyo Herodes iatinu tau rei, reiso iaisosiso onina Petrus. Oninai, ne osupui tewa. Reiso Herodes ianaha runa sio mamsaka pui rei, nanie iasei tanuso. Iasei tanuso, oyo iaisosiso ohunu sio mamsaka pui rei.

Oyo Herodes ieu iarihoni otoo Yudea, nanie iararane nau nia Kaisarea mkane.

Herodes Imatai

²⁰ Herodes iakapuku naiosa tau sio nia Tirus runa sio nia Sidon. Reiso oamanouso nanie oeu pani tanui. Hoka pani oyo, oapamanu Blastus na iakahaiso. Blastus rei waini ia mamsaka Herodes ne numa. Oapamanu Blastus na ianamana osi Herodes na sio ruao mka oanamana runai. Ianamana osiki, oyo Herodes iamanaku, oyo oanamana runai, nanie ohunu nisa. Tea mo, sio pusiso noi sio no niana osupu muaine rerihoni Herodes ne niana. ²¹ Tau ranie hatae isa wani ihete umetene, Herodes iausahu api aia, oyo iruei tau katera aia. Iaunau sio pusiso. ²² Oyo sio wasoni oatinui rei, oakapona, “Ia waini ianamana rei, ia Anahatana, ia tumata tewa!” ²³ Mata huni tewa oyo, ia maisosie on roe Upuri iunai ikupui mtinte. Tea mo, itapi sio panesi rei oainaa runai sani ia Anahatana rei. Iaisosiso oainaa runa Anahatana ruai tewa. Reiso nikonaka raai, oyo imatai.

²⁴ Sio wasoni oaunauso tau Anahatana ne maunauna rarihoni Yesus sui supani-supani honu. Reiso sio wasoni oparisaa okikasi oasinena honu.

²⁵ Barnabas runa Saulus orori kepeni pani otoo Yudea osi sio wasoni oparisaa, oyo onuniso on roe kota Yerusalem. Onuni okata Yohanes Markus.

Sio Oaisosi Barnabas Runa Saulus

13 ¹ Tau sio wasoni oparisaa poe kota Antiokhia wasoni sio mamsima runa Anahatana ne anamanaya umau runa sio matuhetena umau. Sio reimo wasoni:

Barnabas,

Simeon (sio oaoiki tau ia metene),

Lukius (ia rerihoni nia Kirene),

Menahem (ia waini ia mainae Herodes ne neta on ia ikine asi),

Saulus.

² Sio wasoni oainisi oainaa runa Upuri runa oamaoni, oyo Anahatana Ne Inaha iasau osiso, “Hiti Barnabas runa Saulus osiku. Nanie uaisosiso ouna sae isa osiku.”

³ Reiso oamaoni runa oainisi suka, oyo oahusie uaso, oyo oaisosiso oeu.

Barnabas runa Saulus Oaunauso nau Nusa Siprus

⁴ Reiso Anahatana Ne Inaha iaisosiso, oyo Barnabas runa Saulus oeuo nau nia Seleukia. Hoka nau oyo, osaa kapane rotu-tu ohokaso nau nusa isa wani

nanae Siprus. ⁵ Hoka nau nia Salamis, oyo ohori sio Yahudiu no numa manouna oounauso tau Anahatana ne anamanaya. Yohanes Markus ieu ikataso oi na iakahaiso.

⁶ Oeu oasawari rotu-tu ohokaso pani nusa rei nene rurue pani nia Papos. Hoka pani oyo, osupu ia Yahudi isa nanai Bar Yesus. Ia reini mo, ianei pakakasi. Iasau iakarota ata waini ia mamsima runa Anahatana ne anamanaya isa. ⁷ Ia reimo ikata ia mainae tau nusa rei. Ia mainae rei waini nanai Sergius Paulus. Ianei pusire iake. Ianaha runa Barnabas runa Saulus nea, nanie iatinu tau Anahatana ne anamanaya rerihoni Yesus. ⁸ Ne Elimas, ia waini ianei pakakasi rei (nanai Yunani wani Elimas), ipenei tau sio ua rei oanamana osiki. Tea mo, ipenei tau ia mainae rei iparisaa tau Yesus nea. ⁹ Ne Saulus (sio oaoiki tau Paulus oi) isupu kawasa rerihoni Anahatana Ne Inaha reiso inoo ia rei, ¹⁰ oyo iasau, "He, ano wani ia aia sakahatene anai! Ano aaka-karota reaso. Auna-una kahatene osiso. Apenea tau sio wasoni ouna manisate. Aaka-karota rerihoni pusire waroni Upuri iunai manisate. Aarihoni aakarota tewa. ¹¹ Mata huni oyo, Upuri mka iapasanaya na matamu usena raputiso. Mka anoo ranie tewa rotu-tu mkane."

Mata huni tewa oyo, inoo relalopo. Iahana sani pumono nea. Reiso iasi-asinaa inina ia isa isota hanai, oyo iautunui. ¹² Ia mainae inoo tau rei reiso iparisaa. Tau sae, isira iatinu maunaune rei rerihoni Upuri.

Barnabas runa Paulus Oaunauso poe Kota Antiokhia poe Otoe Pisidia

¹³ On nau Papos, Paulus sio osaa kapane honu rotu-tu ohokaso nau nia Perga poe otoe Pampilia. Hoka poe oyo, Yohanes Markus ieu iarihoniso, nanie inuniki roe Yerusalem. ¹⁴ Oyo on poe Perga oeso honu rotu-tu ohokaso ria kota Antiokhia ria otoe Pisidia. Hoka ria oyo, tau ranie hatae rei iaranahata, oeu oru-rueso pani numa manoune osi sio Yahudiu. ¹⁵ Ia isa ibaca mkane rerihoni Musa ne surate runa sio mamsima runa Anahatana ne anamanaya no surata. Oyo sio onata tau numa manoune rei oaisosi ia isa na iasau osi Paulus sio sanrei, "Mania kakau, mania waniu. Munata omi mo maunaune isa osi sio reini, na maunaune reini mo rekahaiso na oparisaa ia-ia, masi oasau poe." ¹⁶ Reiso Paulus ihitioi roe, oyo isopo tau hanai na sio oamaturuso. Iahata,

"Wea kakau, wea waniu. Omi Israel runa omi tamena wani oamuiru Anahatana! Masi oatinu tau rei! ¹⁷ Anahatana waini sio Israel oainaa runai inini noa upu nea. Au reini mo, au Israel oi, tea. Anahatana iuna sio Israel okikasi oasinena runa irui kawasa osiso tau sio wasoni oru-rueso pani otoe Mesir sani sio rakana. Oyo tau ne kawasa mainae iautunuso na ohoka oarihoni Mesir. ¹⁸ Isakaso pani otoe huie rotu-tu musum hutu ate. ¹⁹ Iakahaiso ohunu sio panesi rerihoni sio niana itu wasoni oru-rueso tau otoe Kanaan, oyo irui no tuamane osi sio Israel rei na ereuna sio ruao no tuamane. ²⁰ Rea upu oru-rueso pani Mesir runa ohori otoe huie rotu-tu musum utuni ate hutu nima samatoro osupu tuamane rei.

Oyo Anahatana ihiti mansia mainaya na oasau sae wani titue, sae wani titue tewa. Ihitiso osiso sana osa-osa na opusui, samatoro ihiti Samuel tau ia mamsima runa Anahatana ne anamanaya. ²¹ Oyo oainisi na Anahatana ihiti aia isa osiso. Reiso ihiti Saul, Kis anai, rerihoni Benyamin ne ipane, oyo iuna aia rotu-tu musum hutu ate. ²² Oyo Anahatana ineiki. Ita ihiti Daud tau aia honu. Anahatana ianamana tanui sanrei, 'Unoo nea ata Daud, Isai anai, iuna sani au we suka sio ouna. Ia rei ipusu au we maue.' ²³ Daud upui sahoro Anahatana ihitiki tau Ia Waini lapuheuso osi sio Israel. Ia reimo waini Yesus. Reiso Anahatana iuna pasi nea sani itotoe rei. ²⁴ Ne Yohanes mo, iaunau sio Israel pusiso na oarihoni no rosau samatoro isohu heure. Yohanes iaunauso sanrei samatoro Yesus iaunauso. ²⁵ Yohanes ne tanei haineke pusiki nea, oyo iasau osiso sanrei, "Au reini mo, au seia? Au wani

la Anahatana Iratikī Iapuheuso tewa. Au wani ia sahoro onapa-napai tewa. Ne oatīnu, ia reimo mka ihokai tau muie. Ia waini ia mainae naiosa reiso uakahaiki sani ukanahata, oyo unosu ne sanraliu rerihoni aini atua iae iake tewa.”

²⁶Wea kakau, wea waniu. Abraham nea upu runa omi tamena wani oamuiira Anahatana! Anahatana iauwatu maunaune rerihoni ia rei waini iapuheuso na oamahaiso rotu-tu ria supani. Iauwatu maunaune osi ita nea. ²⁷Ne sio ona Yahudiu runa sio pusiso wasoni oru-rueso roe Yerusalem oanei tewa ata ia rei waini la Anahatana Iratikī Iapuheuso rei. Sio mo, oanei tewa sio mamsima runa Anahatana ne anamanaya no maunauna rerihoni Yesus. Aikee maunauna rai, obaca tanure tau ranie hatae rei iaranahata suiosa. Oanei tewa, reiso nanie ohunui. Ne oaisosiso ohunui sanrei, areimo nene manariti ouna sani sio mamsimana oounutu anoo naone. ²⁸Masike osupu sae isa tewa iae na ohunui, oainisi na Pilatus, ia waini ia ne kawasa tau otoo reimo, iaisosi sio umau ohunui. ²⁹Oaisosiso ohunui, reiso ouna pusire osiki nea waroni sio mamsimana okanure tau Anahatana ne anamanaya, oyo sio umau honu oaputunui on roe hini wani reniene, samatoro oounutui pani hatu nohue. ³⁰Ne Anahatana mo, iapuhaiki honu rerihoni sio matana. ³¹Oyo iatu-atuhete ruai osi sio wasoni okatai on poe otoo Galilea rotu-tu ohokaso roe kota Yerusalem. Iatu-atuhete ruai rotu-tu onona inasa rai. Sio wasoni onooi rei, muie reini mo, wasoni osima runa ia rei osi sio Yahudiu pusiso.

³²Reiso ami wani asima runa Sou lake rei osimo, ata sae wani Anahatana itotoe osi rea upu ata mka iunai, ³³areimo iunai nea osi ita, noa upu pusita. Luna sanrei, iapuhai Yesus rerihoni sio matana nea. Masuae, tau aia Daud ne surate ahinae ikanu sani Anahatana iasau osi anai Yesus sanrei,

‘Ano anaku,

Ranie hatae reini au uapuhaia honu, reiso sio pusiso oanei nea ata au reini mo, au amamu.’

³⁴Rerihoni iapuhaiki honu rerihoni sio matana runa imatai tewa nea, Anahatana iasau osiki sanrei,

‘Mka urui osia sae wani utotoe osi Daud.’

³⁵Samatoro Daud ruai ikanu tau ne surate ahinae tamene sanrei,

‘Ano atapiku tewa ata au wani au manisate onate, tinaiku erekopui.’

³⁶Daud ianamana rerihoni ruai tewa. Tea mo, ianori runa Anahatana sani iaisosiki tau waini iamahaiki, oyo imatai. Imatai oyo, sio okaniki runa nea upu, oyo tinaini erekopui. ³⁷Ne ia sahoro Anahatana iapuhaiki honu mo, tinaini erekopu tewa nea.

³⁸Reiso wea kakau, wea waniu. Kahurāe omi oanei. Oanei ata ami wani aasau osimo ata Anahatana mka isiru heu mo rosau pusu Yesus imatai, oyo iamahaiki.

³⁹Tau ne atate rei, sio pusiso wasoni oparisaa, Anahatana ialapasiso rerihoni no rosau pusire. Rosau rai, Anahatana ialapasiso rerihonire pusu Musa ne maunauna ruare tewa. ⁴⁰Reiso ainati. Oatīnu tau we maunaune reini. Tea mo, Anahatana iapasanamo sani ia mamsima runa Anahatana ne anamanaya isa iasau. Iahata,

⁴¹‘Oatīnu ia-ia omi wani oanamana kahatene rerihoni Anahatana ne anamanaya!
Mka osira, oyo omatamo!

Tau sae, tau napisi rei, au mka uunamo sinsaramo mainae rotu-tu oparisaa tewa

nea.

Masike oatuhetemo tanui iae, oparisaa tewa.”

⁴²Paulus runa Barnabas nanie ohokaso rerihoni numa manoune rei nea, oyo oainisi iturei tau ranie hatae iaranahata rei ohokaso honu na oounauso honu rerihoni rei. ⁴³Sio onata oaisosi sio wasoni pani numa manoune rei onuniso, oyo sio Yahudiu panesi runa sio panesi wasoni onusu Yahudi nea opusu uaso. Sio

wasoni onusu Yahudi rei oainisi oainaa runa Anahatana. Opususo, oyo uaso oapa-apamanu na sio opari-parisaa ata Anahatana iakahaiso runa irui iake osiso.

⁴⁴ Iturei tau ranie hatae rei iaranahata honu, oyo haineke sio pusiso wasoni orueso tau kota rei oamanouso, nanie oatinu maunauna rerihoni Upuri. ⁴⁵ Sio Yahudiu onoo sio panesi rei runa sio wasoni Yahudiu tewa panesi, oyo oanana. Reiso oasau oahata, “Paulus mo, ia makarotane.” Omakaniai oi. ⁴⁶ Ne Paulus runa Barnabas oaunauso okaitau tewa. Oahata, “Anahatana iaisosima aaunaumo tau ne anamanaya rerihoni Yesus naone. Ne openemo oparisaa. Tau rei, oasau ata oamahaimo haineke Anahatana rotu-tu ria supani iake tewa. Reiso ami nanie aeu aarhonimo oyo aeuma noi sio wasoni sio Yahudiu tewa. ⁴⁷ Tau sae, Upuri iaisosima sanrei,

‘Uhitia nea

na ano aatuhete sio wasoni sio Yahudiu tewa rerihoni au

sani kamane itane erezita retuheteso tau sae isa

na tau omi oaunauso, uapuheu sio pusiso mai tuniai reini na oamahaiso rotu-tu ria supani.”

⁴⁸ Sio wasoni sio Yahudiu tewa oatinu tau rei, sio anoo mirika. Reiso oainaa runa Anahatana sanrei, “Upuma, Anahatana. Ano me maunaune rei rerihoni Yesus wani iake naiosa. Reiso ami aainaa runaya.” Sio pusiso wasoni Anahatana ininiso na oamahaiso rotu-tu ria supani oparisaa tau Yesus.

⁴⁹ Sio wasoni oparisaa ochori otoa rei oaunau sio panesi honu tau Upuri ne maunauna. ⁵⁰ Ne sio Yahudiu ouna sio mainaya tau kota rei runa sio pina mainaya wasoni oamuiria Anahatana onesi uaso. Reiso ouna uaso sinsaraso, oyo oneiso oarhoni otoa rei. ⁵¹ Reiso uaso oasamau ouna heu tapuna rerihoni aio atua na sio oanei ata sio Yahudiu rei wasoni sani sio wasoni oationa Anahatana tewa. Oyo oeuso pani nia Ikonium. ⁵² Sio mampusua poe kota Antiokhia anoo mirika. Osupu kawasa rerihoni Anahatana Ne Inaha sirinia.

Paulus runa Barnabas Oaunauso pani Nia Ikonium

14 ¹ Hoka pani nia Ikonium oyo, Paulus runa Barnabas uaso onusoso pani sio Yahudiu no numa manoune sirinia. Pani rei oaunauso iake, reiso sio panesi oparisaa tau Yesus, sio Yahudiu runa sio wasoni sio Yahudiu tewa. ² Ne sio Yahudiu umau openeso oparisaa tau Yesus, reiso oapamanu sio wasoni Yahudiu tewa na ouna sio rei anoo rasaa tau sio wasoni oparisaa. ³ Reiso uaso orueso potuina pani rei. Oaunauso rerihoni Upuri, okaitau tewa. Upuri iatuheteso ata sio no maunauna rerihoni sapani na irui iake osiso areimo manisate. Iatuheteso tau irui kawasa osiso na ouna sima-simana waroni retuhete ata no kawasa rerihoni Anahatana runa sima-simana raasiraso. Sima-simana sani osuiseneso runa onei sakahatana. ⁴ Sio Ikonium wasoni osamaso tau ua. Sio umau opusu sio Yahudiu na openeso oparisaa tau Yesus, sio umau opusu sio maisosia uaso.

⁵ Oyo sio wasoni sio Yahudiu tewa, sio Yahudiu, runa sio ona Yahudiu oheu, nanie ouna uaso sinsaraso. Nanie orauso tau hatu. ⁶ Ne uaso oatinu rerihoni kaheute rei, reiso orumaso nau nia Listra, nia Derbe runa otoa Likaonia pusiki. ⁷ Tau otoa rei, oaunauso tau Sou lake rerihoni Yesus.

Paulus runa Barnabas Oaunauso nau Nia Listra

⁸ Paulus runa Barnabas ohokaso nau nia Listra, oyo osupu ia isa waini ieu ise-ise. Ia reimo iamrai sanrei. On iamrai ieu tau aini tewasi. Aini atua manna.

⁹ Waini iru-ruei iatinu Paulus iaunauso. Paulus iroui, oyo ianei ata iparisaa ata Anahatana imaha iunai iake. ¹⁰ Reiso Paulus iasau osiki nioni mainae, “Hitio roe. Aoo katopu!” Oyo isomani roe, oyo ieu.

¹¹ Sio hutue rei wasoni oatinu tau Paulus ne maunauna onoo Paulus ne sima-simane rei, oyo oakapona tau sio no sou, areimo sou Likaonia. Oahata, “Sio wasoni ita iainaa runaso okaisunuso mai tuniai reini nea! Ouna tumatau nea!”

¹² Oyo ohete Barnabas nanai tau Zeus. Ohete Paulus nanai tau Hermes. Tau sae, sio Litra oainaa runa Zeus runa Hermes sani sio Yahudiu oainaa runa Anahatana. Ohete Paulus nanai tau Hermes. Tea mo, ianamana iake. Hermes iae ianamana iake. ¹³ Reiso ia waini isaka ianori runa Zeus iatinu tau rei. Ia rei isaka Zeus ne numa hae niane muie. Tau numa rei, sio oainaa runa Zeus. Reiso inesa koropou hanaiya runa irori kupako mai kota rei nene mitanunua. Oyo ia runa sio hutue rei, nanie orehire osi Paulus runa Barnabas oainaa runaso.

¹⁴ Sio maisosia, Barnabas runa Paulus, oatinu tau rei, oyo okiha no papita na sio oanei ata openeso tau sio Litra oainaa runaso. Oruma kua sio hutue rei tihue oakapona sanrei, ¹⁵ “He, omi wani ouna sanrei, nanie tau sae? Ami reini mo, ami tumatau oi, tea? Ami sani omi reino oi. Ami wani asima runa Sou lake rerihoni Yesus osimo. Ami wani aasau osimo ata kahurae oarihoni oainaa runa sae wani remahaiki tewa, sani Zeus runa Hermes. Kahurae oainaa runa Anahatana waini iamahaiki. Anahatana sahoro ihaye nante, runa tuamane, runa nuae runa pusire waroni tuniai reini. ¹⁶ Masike naone Anahatana itapiso opusu ruao no maue, ¹⁷ iatuheteso rerihoni ruai oi. Iatuheteso pusu irui iake osiso. luna uane osi pusita. luna atuhu ruruhu. Tau musum tinou, iuna atuhu huaya. Reiso irui muaine osita. luna anori mirika.” ¹⁸ Ne masike oaunauaso sanrei iae, mtinte oapamanuso na pene orehire koropou rai osiso. Ne poe oyo, orehire tewa.

¹⁹ Oyo sio Yahudiu umau ohokaso mai Litra on ria kota Antiokhia ria otoa Pisidia runa otoa Ikonium, oyo oanamana osi sio panesi rotu-tu oapamanu orau Paulus tau hatu. Reiso orau, oyo onesai pani niane muie oahata imatai. ²⁰ Ne sio mampusua ohoriki, oyo ihitio roe, oyo inusui pani niane rei honu.

Hanu roe oyo, ieui pani nia Derbe ikata Barnabas.

Paulus runa Barnabas Onuniso pani Kota Antiokhia pani Otoa Siria

²¹ Hoka pani nia Derbe oyo, Paulus runa Barnabas uaso oaunauaso tau Sou lake rerihoni Yesus rotu-tu sio panesi ouna Yesus ne mampusua. Oyo uaso onuniso poe nia Litra, nia Ikonium runa kota Antiokhia poe otoa Pisidia honu. ²² Sui niana rai, oakahai sio mampusua na oparisaa ia-ia. Oaunauaso na oparisaa asi. Oahata, “Kahurae sinsarata panesi naone, samatoro ipusu tau Anahatana irime tuniai reini.”

²³ Ohiti sio onata tau sio wasoni oparisaa no tikana pusire. Oyo oahusieso oainisi tau Upuri waini sio oparisaa rei na Upuri ikata runaso. Oahusieso, oainisi, oamaoni.

²⁴ Oyo uaso oeuaso honu onikusio poe otoa Pisidia rotu-tu ohokaso nau otoa Pampilia honu. ²⁵ Hoka nau oyo, oauunauaso tau Anahatana ne anamanaya nau nia Perga, oyo oeuaso nau nia Atalia. ²⁶ Hoka nau oyo, osaa kapane, nanie onuniso pani Antiokhia. Sio Antiokhia sahoro oahusieso runa oainisi na Anahatana irui iake osiso na sio oauunauaso runa ouna sima-simana. Ouna sanrei nea.

²⁷ Hoka pani oyo, uaso oanaha runa sio pusiso wasoni oparisaa, nanie osima runa Anahatana iuna sae pusu sio. Oruni rerihoni sapani na Anahatana iheka arena na sio wasoni sio Yahudiu tewa oparisaa tau Yesus. ²⁸ Oyo uaso orue tau kota rei potuina okata sio mampusua.

Sio Maisosia runa Sio Onata Oapisara roe Yerusalem

15 ¹ Sio Yahudiu umau wasoni oparisaa tau Yesus nea ohokaso on roe otoa Yudea. Ohoka poe kota Antiokhia, oyo oatuhete sio wasoni oparisaa tau Yesus. Sio Antiokhiaui rei wasoni sio Yahudiu tewa, reiso oatuheteso sanrei, “Munata sio orehimo pusu Musa ne maunauna tewa Anahatana mka iapuheumo

na oamahaimo rotu-tu ria supani tewa.”² Paulus runa Barnabas openeso tau maunaune rei, reiso otuntana mainae runa sio rei. Sio ohunu anamanae nanie oaisosi Paulus runa Barnabas runa sio umau honu oeuo roe Yerusalem na oanamana rerihoni masana rei runa sio maisosia na sio onata tau sio wasoni oparisaa roe rei.

³ Reiso sio wasoni oparisaa poe Antiokhia oaisosi Paulus sio, oyo Paulus sio oeu ohori oteo Fenisia runa oteo Samaria. Pani rei sio osima runa sapani na sio wasoni sio Yahudiu tewa oparisaa tau Yesus nea. Sio wasoni oparisaa pani rei oatinu tau rei, oyo anoo mirika.⁴ Oyo oeuo roe Yerusalem. Hoka roe oyo, sio maisosia, sio onata tau sio wasoni oparisaa runa sio wasoni oparisaa pusiso oatapeaso iake. Oatapeaso oyo, uaso osima osiso runa pusire waroni Anahatana iakahaiso ouna osi sio wasoni sio Yahudiu tewa.⁵ Ne sio umau rerihoni tikane sio onata rerihoni akama Yahudiu ohitio roe, oyo oasau, “Masike sio oparisaa tau Yesus nea, kahurae sio orehu sio wasoni sio Yahudiu tewa. Kahurae sio opusu Musa ne maunauna.”

⁶ Oyo sio maisosia runa sio onata tau sio wasoni oparisaa oamanouso, nanie ohunu anamanae rerihoni masana reini.⁷ Sio ohunu anamanae potuina, oyo Petrus ihitio roe, oyo iasau, “Wea kakau, wea waniu! Omi ruamo oanei ata naone Anahatana inini au rerihoni pusita na uaunau sio wasoni sio Yahudiu tewa. Uaunauso na sio iae oatinu Sou lake rerihoni Yesus runa oparisaa.⁸ Anahatana waini iationa tumata anoi pusiki iatuheteta nea ata anoi runa sio oi. Iatuheteta tau irui Ne Inaha osiso sani iruiki osi ita oi.⁹ Pusita osa. Anahatana inoo sio ruao, ita ruari tewa. Luna heu sio no rosau pusu sio oparisaa tau Yesus sani ita oi.¹⁰ Omi nanie na sio Yahudiu tewa wasoni oparisaa opusu Musa ne maunauna pusire ouna mtinte tau sio, nanie ta hae? Ita ruari rea upu opusu maunauna pusire iake tewa. Omi nanie oaisosiso opusure oi? Pene ouna tinkaei tau Anahatana.¹¹ Pene. Ita iparisaa ata Anahatana iapuheuta na iamahaita rotu-tu ria supani pusu Upuri Yesus irui iake osita. Sio oi, Anahatana iapuheuso pusu Yesus. Kahurae sio opusu Musa ne maunauna pusire tewa.”

¹² Sio pusiso wasoni oamanouso pani rei oamaturuso. Oyo oatinu Barnabas runa Paulus osima runa sapani na Anahatana irui kawasa osiso na sio ouna akakinaya na sio oanei ata sio no kawasa on roe Anahatana runa sima-simana raasiraso. Sio ouna sima-simana sani osuisene sio kupua runa onei sakahatena kua sio wasoni sio Yahudiu tewa tihue, reiso ita ianei ata Anahatana anoi runa sio oi.¹³ Sio osima pusi, oyo Yakobus, ia mainae tau sio wasoni oparisaa roe Yerusalem, iasau sanrei, “Wea kakau, wea waniu! Masi oatinu tau au.¹⁴ Simon Petrus mato iatuhetemo sapani na mataanoe Anahatana iatuhetei. Iatuhetei ata anoi runa sio wasoni sio Yahudiu tewa. Inini sio umau rerihoni sio rei oi na sio ouna ne mansiau.¹⁵ Maunaune rei runa sio mamsima runa Anahatana ne anamanaya no maunauna, uare osa. Ia mamsimane isa ikanu ata Anahatana iasau sanrei,

¹⁶ “Mka au uhokaku honu,

oyo uhiti honu Daud tau aia tau niana waroni naone iuna aia tanure.

Uhitiki honu sani ia isa inana honu numa wani watikohui honu.

¹⁷ Au uhitiki na sio tamena oninaku

runa sio wasoni sio Yahudiu tewa wasoni uanaha runaso nea na sio ouna we mansiau.

¹⁸ Au mo, omi moa Upu, uasau sanrei. Mka au uuna sani masuae au uuna sio oasau.

¹⁹ Yakobus iasau honu, “Reiso uahata kani nene iake ita pene iaisosiso opusu Musa ne maunauna pusire iuna mtinte tau sio wasoni sio Yahudiu tewa wasoni nanie ouniso opusu Anahatana.²⁰ Ne kahurae ita ikanu surate osiso runa iaunauso na hasae pene sio oai muaine wani sio oruiki osi anahatana wani titue tewa, pene

oamanea, pene oai henate rerihoni makapanau waroni sio oakinenere, runa pene oai makapana nene nasie. ²¹ Sio oanei nea ata ita Yahudiu ipeneta tau rei. Tau sae, Musa ne maunauna waroni rasopore, sio opaca tanure suiosa potuina nea tau ranie hataya rai iaranahata sui numa mananouna osi sio Yahudiu.”

Sio Maisosia Runa Sio Onata Oauwatu Surate Osi Sio Wasoni Sio Yahudiu Tewa

²² Reiso sio maisosia, sio onata tau sio wasoni oparisaa runa sio pusiso wasoni oparisaa roe Yerusalem rei, oapamata sou nanie onini sio umau rerihoni ruao, oyo oaisosiso oeu okata Paulus runa Barnabas poe kota Antiokhia. Reiso onini Silas runa Yudas, sio oaoiki tau Barsabas oi. Sio ua rei wasoni sio onata rerihoni sio mamparisaa. ²³ Sio maisosia runa sio onata tau sio wasoni oparisaa okanu surate oi oyo oruiki osi ateso na ororiki. Sio okanu sanrei,

“Osi mania kakau, mania waniu wasoni sio Yahudiu tewa poe kota Antiokhia runa otoa Siria runa otoa Kilikia.

Tapea on roe ami maisosia runa ami onata pusima.

²⁴ Ami aatinu ata sio umau rerihoni ami reini oeuo poe tanumo nea, oyo ouna anomo mtinta runa anomo rauponu runa sio no maunauna. Aikee ami aaisosiso tewa. ²⁵ Reiso pusima aapamata sou nanie anini sio umau, oyo aaisosiso poe tanumo okata Barnabas runa Paulus wasoni anoma runaso. ²⁶ Sio ua reini oamanane sio wasoni nanie ohunuso nea tau oanori runa Upuri Yesus Kristus. ²⁷ Reiso ami aaisosi Yudas runa Silas osimo. Mka sio ruao oasau osimo. Sio no anamanaya rai runa surate rei nene anamanaya, uare osa. ²⁸ Anahatana Ne Inaha runa ami pusima aapamata sou na pene aaisosimo opusu Musa ne maunauna pusire ouna mtinte tanumo. Hasae maunauna mkana rai kahurae omi opusure. ²⁹ Areimo pene oai muaine wani oruiki osi anahatana wani titue tewa, pene oai makapana nene nasie, pene oai henate rerihoni makapana wani sio oakinenei, runa pene oamanea. Munata omi ouna atata raini tewa, omi ouna iake.

Hasae rei mani, tapea!”

³⁰ Reiso sio oaisosiso oeuo poe Antiokhia. Hoka poe oyo, oanaha runa sio pusiso wasoni oparisaa, oyo orui surate rei osiso. ³¹ Sio opaca tanui, oyo anoo kaia. Maunaune rei rekahaiso. ³² Yudas runa Silas wasoni sio mamsima runa Anahatana ne anamanaya oi, reiso oaunau sio wasoni oparisaa rei rotu-tu potuina runa oakahaiso tau no maunauna runa oakahaiso oparisaa ia-ia. ³³ Yudas runa Silas oru-rueso poe rei potuina mkane, oyo sio wasoni oparisaa poe Antiokhia oauhaaso, oyo oaisosiso onuniso roe Yerusalem roe sio roe rei wasoni oaisosi uaso. ³⁴ Ne Silas iapamata sou nanie iruei poe Antiokhia asi. ³⁵ Paulus runa Silas oi orueso potuina poe Antiokhia na oatuheteso runa oaunauso tau Upuri ne anamanaya. Uaso runa sio panesi honu oatuheteso.

Paulus Runa Barnabas Oeu Osakakau

³⁶ Onona inasa rai oyo, Paulus iasau osi Barnabas, “Mai, inunita noi niana waroni naone iaunauso tau Upuri ne anamanaya runa inoo rea kakau, rea waniu na inoo sio sapani.” ³⁷ Barnabas inina na Yohanes Markus ikataso, ³⁸ ne Paulus ipenei. Iahata nene iake pene Markus ipusui. Naone ieu iarihoniso poe otoa Pampilia. Ikataso rotu-tu no tanei pusiki tewa. ³⁹ Uaso otuntana mainae, reiso sio oeu osakakau. Barnabas isaa kapane, nanie ieu nau nusa Siprus ikata Markus. ⁴⁰ Paulus inini Silas, oyo sio wasoni oparisaa poe Antiokhia orui uaso osi Upuri na irui iake osiso, samatoro uaso oeuo. ⁴¹ Oeu ohori otoa Siria runa otoa Kilikia na Paulus iakahai sio wasoni oparisaa na oparisaa ia-ia.

Timotius Ieu Ipusu Paulus Runa Silas

16¹Paulus ieu ikata Silas honu rotu-tu ihokai poe nia Derbe, oyo ieu poe nia Listra. Hoka poe oyo, isupu ia mampusue isa nanai Timotius. Inai, ia Yahudi. Iparisaa tau Yesus nea. Ne amai, ia Yunani. ²Sio wasoni oparisaa poe Listra runa Ikonium oahata Timotius mo, ia iake. ³Paulus inina na Timotius ieu ikatai, reiso irehiki. Tau sae, sio Yahudiu sui otoa rei oanei ata amai, ia Yunani. Sio oanei ata sio orehiki tewasi. Reiso Paulus irehiki. ⁴Oeu ohoi niana sui otoa Galatia osima osi sio wasoni oparisaa runa maunauna on roe sio maisosia runa sio onata tau sio wasoni oparisaa roe kota Yerusalem. Sio oaunauso na opusu maunauna rai. ⁵Reiso sio wasoni oparisaa, oparisaa ia-ia. Ranie hatae isa, ereeu mai poua tonu rei sio okikasi oasinena suiosa.

Paulus Inoo Masasua Nau Troas

⁶Anahatana Ne Inaha isopo na pene Paulus sio oaunauso tau Anahatana ne anamanaya nau otoa Asia. Reiso oeuso ria otoa Frigia runa otoa Galatia. ⁷Hoka ria haineke nenene wani eresama otoa Misia runa otoa Bitinia, oyo nanie onusu otoa Bitinia. Onusu rea, ne Yesus Ne Inaha isoposo honu. ⁸Reiso oniku Misia, oyo oeuso nau nia Troas. ⁹Hoka nau oyo, nene pumono pani sanrei oyo, Paulus inoo masasua. Inoo ia Makedonia isa iooi hainekei iainisi runa anoi pusiki sanrei, "Aeua mai otoa Makedonia na aakahaima." ¹⁰Paulus inoo masasua rei, oyo isima osi au, Lukas, runa ne netau tamena. Mata hun tewa oyo, ami aautotu apia, nanie aeuma nau Makedonia. Tau sae, ami aapamata sou ata Anahatana iaisosima aangunau sio nau rei tau Sou lake rerihoni Yesus.

Lidia Iparisaa Tau Yesus Ria Niane Filipi

¹¹Ami aeu aarihoni nia Troas asaa kapane rotu-tu ahokama nau nusa Samotrake. Hoka nau oyo, hanu sanrei ahokama nau nia Neapolis. ¹²Hoka nau oyo, aeuma ria Filipi, niane isa ria otoa mataanoe pani Makedonia. Sio Romau sahoro onana kota rei. Ami aararane onona inasa rai. ¹³Tau ranie hatae rei iaranahata ahokama rerihoni niane rei nene mitanunue. Ahokama pani mui, oyo aeuma pani waene nusue. Tau sae, ami ata pani rei mka asupu sio Yahudiu naniao na oainisi tanui. Asupui, oyo ami aru-ruema aanamana runa sio pinau wasoni oamanouso pani rei. ¹⁴Ia isa rerihoni sio rei nanai Lidia. Iaheni nipa msinaya. Nipaya rai hunoni mainaya. Ne niane wani Tiatira. Ia Yunani ne iainisi iainaa runa Anahatana sani sio Yahudiu. Reiso Anahatana irue anoi na ianei Paulus ne maunauna runa iparisaa. ¹⁵Sio oriti heu Lidia runa sio pusiso wasoni orue tau ne numa no rosau, oyo iainisi tau ami sanrei, "Wea amau, wea hotau. Munata omi oahata titue au uparisaa tau Yesus nea, mai, oararanemo mai au we numa." Oyo iapamanuma, reiso aararane tau ne numa rei.

Sio Onusu Paulus Runa Silas Pani Pui Ria Niane Filipi

¹⁶Taue isa ami wani aeuma pani naniama wani aamanouma na aaisisi, oyo asupu ia pina maniane isa. Ia pina rei, sakahatene ererui kawasa osiki na iuna nau, oyo iasau pani muie mka sapani. Luna nau, oyo sio wasoni oaisosiki osupu kepeni panesi. ¹⁷Ia pina rei ieu ipusu-pusu Paulus runa pusima iaka-akapona, "Sio reino mo, sio wasoni Anahatana waini ia mainae nai osa ne manorina. Sio wasoni osima osimo runa sapani na Anahatana iapuheumo na oamahaimo rotu-tu ria supani."

¹⁸Luna sanrei rotu-tu onona ate te nima sanrei, oyo Paulus iakapuku. Ikuai iapamese ruai tewa nea. Reiso iuniki, oyo iasau osi sakahatene rei, "Tau Yesus ne kawasa, au uaisosia na ahokaya aarihoni ia pina reini."

Oyo sira tau erehokai rerihoni ia pina rei. ¹⁹ Sio wasoni oaisosiki oanei ata mka sio osupu kepeni tewa nea rerihoni ia pina rei. Reiso osota Paulus runa Silas onesa uaso pani niane tihue wani huie na sio onata tau niane rei oasei tanuso. ²⁰ Orori uaso na oamanane ia natu Kaisar ne mansia mainaya, oyo oasau, “Mania amau, sio reini mo, sio Yahudiu. Reiso sio wasoni ouna sio panesi otuntana runa umau mai ita re niane reini. ²¹ Ita wani ia natu Kaisar ne mansiau. Sio onina na ipusu no monna waroni re natu rei isopo na pene iunare.”

²² Oyo sio hutue pusiso nanie ohitaso nea. Reiso sio onata oaisosiso okiha uaso no papita, oyo onosure. Onosure oyo, osapu-sapuso tau ai anaya.

²³ Osapu-sapuso mainae, oyo onususosio pani pui. Sio oaisosio ia mamsaka pui na isakaso ia-ia. ²⁴ Reiso ia mamsaka pui inususosio pani kamar hainau pani pui anoe, oyo ikanihoo aio atua rapanaha hini na pene nisuo.

²⁵ Tau saa monon tihu sanrei oyo, Paulus runa Silas wasoni oainisi, wasoni ohete ahinaya oainaa runa Anahatana. Sio tamena wasoni sio osakaso pani pui oatunu. ²⁶ Sira tau isu mainae rotu-tu tuamane wani sio onana pui tanui erekoka. Pui mitanunua pusire rahekasosio runa ranteu waroni sio okanihoosio runare, ranosusio pusire. ²⁷ Ia mamsaka pui rei imaranae. Imaranae oyo, inoo pui mitanunua rahekasosio pusire. Reiso isaru ne tunue nanie ihunu ruai. Iahata sio pusisosio wasoni isakaso pani pui orumasosio nea. Ikaitau mka sio oasau isakaso ia-ia tewa, oyo ohunui. ²⁸ Ne Paulus iakapona nioni mainae, “Pene ahunu ruamu! Ami pusimosio ami wani sirinial!”

²⁹ Iainisi kamana, oyo irumai pani pui anoe. Ikana-kananunui, oyo iamnohoi mai Paulus runa Silas uaso ua anoa, nanie iainisi sae isa. ³⁰ Oyo iautunusio uaso ohokasosio, oyo iasei, “Wea upu, kahurao au uuna sae na Anahatana iapuheuku na uamaiauku rotu-tu ria supani?”

³¹ Sio on poe oasau sanrei, “Parisaa tau Upuri Yesus Kristus, oyo Anahatana iapuheua. Ano runa sio pusisosio wasoni oruesosio tau me numa.”

³² Oyo sio oatuhetesio ia mamsaka pui runa sio wasoni noi ne numa pusisosio tau maunauna rerihoni Upuri Yesus. ³³ Oyo nene pumonosio pani sanrei oyo, ia mamsakasosio rei iautunusio uaso, oyo isohu no apata. Isohu no apata, oyo sio osohu heu no rosau, ia mamsakasosio rei runa sio wasoni noi ne numa pusisosio. ³⁴ Oyo iautunusio uaso roe ne numa nanie ipanasosio. Ipanasosio oyo, ia runa sio wasoni noi ne numa pusisosio anoo miri-mirika tau sio oparisaa tau Anahatana nea.

³⁵ Hanroesio tau omnanoesio oyo, ia natu Kaisar ne mansia mainaya oaisosiosio sio polisiosio oesosio pani ia mamsaka pui oaisosiososio oasau, “Ahoka sio ua rei.” ³⁶ Reiso ia mamsakasosio isima osi Paulus sanrei, “Ia natu Kaisar ne mansia mainaya oaisosiosima nea na ahokamosio. Reiso onunimosio. Oeu ia-ia.”

³⁷ Ne Paulus iasau osi sio polisiosio rei, “Masikesio sio osupu mani isanae isa tewa iae, ia natu Kaisar ne mansia mainaya oaisosiososio ohitamosio runa sio pusisosio onooi. Masike ami mani kawasa sani ia natu Kaisar ne mansiau iae, sio ohitamosio, oyo onusumasio pani pui anoe. Ne muie reini mo, sio nanie oaisosiosima anunimosio aahunimosio? Ami apenemasio. Aaisosiosio sio mainaya rei ruao ohokasosio na oatunumasio ahokamosio.”

³⁸ Sio polisiosio oeu osimasio runa anamanayasio rai osi sio mainaya. Sio mainaya oatunu ata Paulus runa Silas sani ia natu Kaisar ne mansiau, oyo okaitau hun ruao. ³⁹ Reiso oesosio pani pui rei oripakokosio tau uaso. Oyo oatunusosio ohokasosio rerihoni pui anoesio rei oai-ainisosio na sio oeu oarihoni kota rei. ⁴⁰ Uaso ohokasosio rerihoni pui anoesio rei, oyo oesosio pani Lidia ne numa. Hoka pani oyo, oamanousosio runa sio wasoni oparisaa pusisosio. Oakahaisosio tau no maunauna, oyo oeu oarihoni niane rei.

Sio Una Paulus Runa Ne Netau Kahi-kahiso Poe Kota Tesalonika

17 ¹ Paulus runa Silas oesosio honu oniku nia Amfipolis runa nia Apolonia rotu-tu ohokasosio poe kota Tesalonika. Poe kota rei, sio Yahudiu no numa

mananouna isa wapo. ²Hoka poe oyo, Paulus inusu numa mananouna rei sirinia. Inusui tau ranie hatae rei iaranahata, rotu-tu onona itu honu ita inusu honu rotu-tu nai tonu. Inusui, oyo ihunu anamanae runa sio pani numa mananouna rei pusu Anahatana ne anamanaya. ³latuheteso sanrei, "Anahatana ne anamanaya raasau ata mka la Anahatana Iratiki lapuheuso sinsarai, oyo iamahaiki honu iarihoni sio matana. Yesus rei, au wani usima osimo, ia waini la Anahatana Iratiki lapuheuso rei." ⁴Sio Yahudiu umau oparisaa tau maunaune rei, oyo okata Paulus runa Silas runa sio Yunaniu panesi wasoni oamuiira Anahatana panesi runa sio pina onata panesi oi.

⁵Sio Yahudiu umau opusu Paulus sio, reiso sio Yahudiu tamena oanana. Oposu sio rei tewa nea. Reiso oamanou sio kahatena umau wasoni oru-rueso ria pasar. Oamanou sio rei, oyo pusiso ouna purie ohoi sui kota rei. Sio oruru umau otentene na onusu pani Yason ne numa onina Paulus runa Silas, nanie oautunuso oamanane sio hutue. ⁶Ne osupu uaso tewa. Reiso onesa Yason runa sio wasoni oparisaa umau honu, oyo ororis oamanane sio mainaya tau kota rei. Hoka pani oyo, oakapona sanrei, "Sio rei ouna sio pusiso ouna purie sui supani-supani mani mai tuniai reini. Muie reini mo, sio ohokaso mai kota reini oi. ⁷Yason iapusaaso pani ne numa nea. Sio pusiso openeso opusu ia natu Kaisar ne maunauna. Sio oasau ata waini ia natu tamene waini nanai Yesus." ⁸Sio oasau sanrei, oyo sio hutue runa sio mainaya tau kota rei ano rauponu. ⁹Reiso sio mainaya oaisosi Yason runa sio wasoni oparisaa osenu kepeni umau. Osenure na pene ouna sio hutue ouna purie nea. Osenure, samatoro oalapisiso.

Paulus launaso Poe Niane Berea

¹⁰Pumono pani sanrei oyo, sio wasoni oparisaa oaisosi Paulus runa Silas oeuso poe nia Berea. Hoka poe oyo, onusu pani sio Yahudiu no numa mananouna. ¹¹Sio Berea oatinu tau maunau honue iake erenesi sio Tesalonika. Reiso sio no suka oatinu maunaune rerihoni Yesus. Ranie hatae isa, ereeu mai poua tonu rei sio oari-arinii Anahatana ne anamanaya suiosa na onoo ta kani Paulus ne maunaune rei, pannuhu runa Anahatana ne maunauna te tewa. ¹²Reiso sio panesi oparisaa runa sio pina ona Yunaniu panesi runa sio hanaiya oi.

¹³Sio Yahudiu pani Tesalonika oatinu ata Paulus waini iaunau sio poe Berea oi, oyo sio umau ohoka poe, nanie ouna sio poe rei ouna purie runa openeso tau Paulus. ¹⁴Reiso sio wasoni oparisaa oaisosi Paulus sio oeuso san-sana nau nuae. Ne Silas runa Timotius orueso ria Berea asi. ¹⁵Sio umau oautunu Paulus rotu-tu ohokaso poe kota Atena, oyo onuniso pani Berea. Paulus iaissosiso oasau osi Silas runa Timotius sanrei, "Oeu san-sana mai."

Paulus launaso Poe Kota Atena

¹⁶Paulus waini inapa Silas runa Timotius poe kota Atena, oyo anoi mtinte. Tau sae, inoo anahatanau waroni titue tewa tika onata sui kota rei. ¹⁷Reiso ihunu anamanae runa sio Yahudiu na sio tamena wasoni oamuiira Anahatana pani numa mananouna osi sio Yahudiu. Ranie hatae isa, ereeu mai poua tonu rei ihunu anamanae suiosa runa sio wasoni isupuso poe pasar oi. ¹⁸Sio matuhetena wasoni oanei panesi rerihoni tikane Epikuros runa tikane Stoa ohunu anamanae runai oi. Sio umau oasau sanrei, "Ia reini mo, ianei sae? lasau ata ianei sae isa. Aikee iasau sae isa tewa wani iake." Sio umau honu oahata, "Kani waini isima runa sio rakana no anahatanau?" Sio oasau sanrei tau iaunaso rerihoni Yesus runa sapani na iamahaiki honu iarihoni sio matana. ¹⁹Reiso sio ororiki roe mananoue runa sio onata roe pupue wani nanae Areopagus. Hoka roe oyo, oasau osiki, "Ami nanie aatinu rerihoni ano me maunau honue rei wani ano aatuhete. ²⁰Ano aatuhetema

tau maunau honue rei, ami asira aatinui. Reiso ami nanie aatinu. Areimo sapani?"
²¹ (Sio Atenau pusiso runa sio rakana wasoni orue poe Atena pusiso oru-rueso oanamana runa oatinu rerihoni maunau honua mani. Onana tanei tewa. Ohunu anamanae rerihoni maunau honue mani.)

²² Reiso Paulus ihitio roe, iamanane sio wasoni oamanouso roe Areopagus rei, oyo iasau, "Omi Atenau! Unoo ata omi oamaira anahatanau panesi. ²³ Tau sae, au ueu uhori omi mo kota rei, oyo unoo naniamo oainaa. Unoo naniamo isa, sio okanu sanrei tau naniamo rei, 'Osi anahatana wani ami aational tewa.' Reiso Anahatana rei, waini omi oainaa ne oationai tewa, ia reimo, waini au usima osimo rei. ²⁴ Anahatana rei sahoro ihaye tuniai reini runa pusire waroni. Ia waini ia natu tau sio pusiso roe noiyaha runa sio pusiso mai tuniai reini. Iruvei pani numau waroni tumatau onanare tewa. ²⁵ Erehanaki inina sae isa rerihoni tumatau tewa. Kahuræ tumatau oakahaiki tewa. Ia sahoro iapuhai tumatau. Iapuhaiso runa irui pusire osiso. ²⁶ Ihaye sio niana pusiso rerihoni ia osa mani na sio orueso sui supani-supani mani mai tuniai reini. Naone iasau inasa oamahaiso runa orueso supa samatoro oamahaiso. ²⁷ Ihaye tumatau na sio oninai. Kani oninai, oyo kani osupui? Aikee Anahatana waini hainau rerihoni ita sana osa-osa tewa. ²⁸ Anahatana sahoro iapuhaita, iuna ita nisuri, runa wani mai tuniai reini. Areimo sani omi mo mamsimana umau oasau ata, 'Ita pusita ne hehuka.' ²⁹ Reiso ita mo, ita Anahatana ne hehuka. Reiso iake tewa kani ita iahata Anahatana mo, sani siaie rerihoni hunahane te? Sanaa te? Hatu te? Siaie, sio ounai pusu tumata ianei mani. ³⁰ Naone sio oanei Anahatana ne maue tewa, reiso Anahatana iapasanaso san-sana tewa. Ne muie reini mo, iaisosi sio pusiso mai tuniai reini oarihoni no rosau. ³¹ Tau sae, ihete umetene nea na mka iapasana sio tuniai reini pusiso manisate. Ia mka iapasanaso, Anahatana ihitiki nea. Anahatana iapuhaiki honu rerihoni sio matana nea na ita ianei mka iapasanata."

³² Sio oatinu Paulus iasau ata Anahatana iapuhaiki honu rerihoni sio matana, oyo sio umau oaumaniki. Ne sio uamu honu oasau, "Ami nanie aatinu ano aanamana rerihoni rei honu." ³³ Oyo Paulus ieu iarihoni sio rei. ³⁴ Ne sio umau okata Paulus, oyo oparisaa tau Yesus. Tau sio rei wasoni Dionisius, ia onate isa runa sio Areopagus, runa ia pina isa waini nanai Damaris runa sio umau honu.

Paulus Iaunaso Poe Kota Korintus

18 ¹ Oyo Paulus ieu iarihoni kota Atena. Ieu rotu-tu ihokai poe kota Korintus. ² Hoka poe oyo, isupu ia Yahudi isa nanai Akwila. Ia ne niane wanau otoa Pontus. Akwila mato ihokai on nau otoa Italia ikata sahai Priskila. Tau sae, ia natu Roma waini nanai Klaudius iaisosi sio Yahudiu pusiso oeu oarihoni kota Roma nea. Roma wani kota inae pani Italia. Reiso Paulus ieu inoo uaso, ³ oyo iruei ikataso. Tau sae, pusiso no tanei osa. Tonuso onana numau rerihoni makapana unte na oahenire, reiso onana tanei okata umau. ⁴ Tau ranie hatae rei iaranahata iaunaso pani numa mananouna osi sio Yahudiu suiosa, nanie iapamanuso na sio Yahudiu runa sio wasoni sio Yahudiu tewa pusiso oparisaa ata Yesusi waini Ia Anahatana Iratiki lunaso lapuheuso.

⁵ Silas runa Timotius ohokaso poe Korintus on pani otoa Makedonia, oyo Paulus iaunaso tau maunaune rerihoni Yesus mani. Inana numau rerihoni makapana unte tewa nea. Iaunaso sio Yahudiu iasau ata Yesus waini Ia Anahatana Iratiki lapuheuso rei. ⁶ Ne sio Yahudiu onesiki, oyo omakaniai. Reiso isihotata tapuna rarihoni ne papite na sio oanei ata ipenei tau sio nea. Oyo iasau, "Mka Anahatana iapasanamo, omi ruamo osana. Au mo usana tewa. On ranie hatae reini mo, au ueu uaunau sio wasoni sio Yahudiu tewa." ⁷ Oyo ieu iarihoni sio rei, oyo ieu pani numa isa wapani numa mananouna nusue. Numa rei wani Titius Yustus ne numa.

la Yahudi tewa ne iainaa runa Anahatana sani sio Yahudiu. ⁸ Ne Krispus, ia mainae tau numa mananoune rei, runa ne numa matae pusiso oparisaa tau Upuri Yesus. Sio Korintus panesi honu oatinu tau Paulus ne maunauna, oyo oparisaa tau Yesus, oyo sio oriti heu no rosau.

⁹ Nai osa tau pumono Paulus ineke masasua. Tau ne masasua rei, Upuri iasau osiki, "Pene kaitau! Aaunauo sirinia. Pene amaturua. ¹⁰ Tau sae, au wani ukata runaya. Reiso ia isa iae, mka iuna kihatene tau ano tewa. Tau sae, mai kota reini wasoni sio panesi mka ouna we mansiau." ¹¹ Reiso Paulus iruei poe Korintus rotu-tu musum, hunana nome iatuhetesu tau Anahatana ne maunauna.

¹² Galio waini ia ne kawasa tau otoa Akhaya, oyo sio Yahudiu osota Paulus, nanie ororiki pani ia ne kawasa iapasanai. ¹³ Hoka pani oyo, oasau, "Ia reini mo, waini iapumanuso na oainaa runa Anahatana pusu sae waroni Musa ne maunauna rasopo."

¹⁴ Paulus nanie ianamana, ne Galio iasau osi sio Yahudiu sanrei, "Oatinu omi Yahudiu! Sinana omi oamanaru tau ipusu maunau kupania tewa te iuna kihatene, mka au uatinu tanumo. ¹⁵ Ne omi otuntana rerihoni anamanaya, nanao, runa ruamo mo maunauna. Reiso kahurao omi ruamo ohunu anamanae. Upeneku uasau sae wani titue, sae wani titue tewa." ¹⁶ Oyo ineiso ohokaso rerihoni naniai iapasanaso rei. ¹⁷ Oyo sio osota Sostenes, ia mainae tau numa mananoune rei, oyo ohitai pani naniai iapasanaso roe uae. Ne Galio iuna sae isa tewa.

Paulus Ieu Ihori Rotu-tu Inuniki Pani Kota Antiokhia

¹⁸ Oyo Paulus iruei potuina poe kota Korintus, oyo iauhaa sio wasoni oparisaa poe rei. Iauhaaso, oyo isaa kapane ikata Priskila runa Akwila, nanie ieu nau otoa Siria. Ne nau nia Kengkrea iatori unui ipusu monne naone. Isopa osi Anahatana, reiso iatori unui na sio oanei ata ipamanisa sae wani isopa rei nea. ¹⁹ Oyo osaa kapane rotu-tu ohokaso nau kota Efesus. Hoka nau oyo, Paulus ieu iarihoni Priskila runa Akwila, oyo inusui pani numa mananoune osi sio Yahudiu, nanie ihunu anamanae runa sio Yahudiu. ²⁰ Sio oainisi nanie iruei potuina runa sio. Ne ipenei. ²¹ Ne iauhaaso sanrei, "Mka uhokaku honu, hete sae Anahatana ne maue sanrei." Iauhaaso sanrei, oyo isaa kapane ieu iarihoni Efesus.

²² Hoka nau nia Kaisarea oyo, Paulus isipui, samatoro ieu roe kota Yerusalem, nanie iatapea sio wasoni oparisaa roe rei. Iatapeaso, oyo ieu honu rotu-tu ihokai poe kota Antiokhia. ²³ Hoka poe oyo, iruei hunane sanrei, samatoro ieu honu. Ieu ihori niana sui otoa Galatia runa otoa Frigia na iakahai sio wasoni oparisaa na oparisaa ia-ia.

Apolos Ianauso Poe Kota Efesus Runa Nau Kota Korintus

²⁴ Ia Yahudi isa waini nanai Apolos ihokai mai kota Efesus. Ne niane wani Aleksandria. Ianei ianamana iake. Ianei Anahatana ne anamanaya ia-ia. ²⁵ Sio oatuhetei nea rerihoni Upuri ne arena. Anoi mirike runa iatuhetesu pannuhu rerihoni Yesus. Ne hasae ianei ata Yohanes iriti heu no rosau mani. ²⁶ Hoka mai oyo, mataano e inusui pani numa mananoune osi sio Yahudiu, oyo iaunauso. Ikaitau tewa. Priskila runa Akwila oatinui iatuhetesu, oyo ororiki poe sio no numa. Hoka poe oyo, oatuhetei pannuhu rerihoni Anahatana ne arena na iapuheuso na oamahaiso rotu-tu ria supani pusu Yesus. ²⁷ Oyo Apolos nanie ieu nau otoa Akhaya. Reiso sio wasoni oparisaa poe Efesus oakahaiki tau no maunauna, oyo okanu surate osi sio wasoni oparisaa nau Akhaya na sio oararumai iake.

Reiso ieu nau Akhaya. Hoka nau oyo, iakahai panesi sio wasoni oparisaa. Anahatana irui iake osiso nea, reiso oparisaa tau Yesus nea. ²⁸ Apolos iakahaiso tau ituntana mainae runa sio Yahudiu rotu-tu ikuaso. Sio panesi oatinui. Ikuaso tau

iatuheteso rerihoni Anahatana ne anamanaya ata titue, Yesus waini la Anahatana Iratiki lapuheuso.

Paulus iaunaso Poe Kota Efesus

19¹ Apolos waipo kota Korintus asi, oyo Paulus ieu ipusu arena suru ria rotu-tu ihokai nau kota Efesus. Hoka nau oyo, isupu sio mampusua umau.² Isupuso, oyo iasei tanuso, “Omi osupu Anahatana Ne Inaha nea pannuhu omi oparisaa?”

Sio on poe oasau sanrei, “Tewasi. Ami aatinu tewasi ata Anahatana Ne Inaha waini.”

³ Oyo Paulus iasei honu, “Reiso omi oparisaa tau sae, oyo sio osohu heu mo rosau?”

Oahata, “Ami aparisaa tau Yohanes ne maunauna waroni iatuheteso tanure oyo isohu heu mani rosau.”

⁴ Iahata, “Yohanes isohu sio wasoni oarihoni no rosau. iaunaso ata kahurae sio oparisaa tau ia mka ihokai tau muie. la reimo, Yesus.”

⁵ Sio mampusua rei oatinu tau rei, oyo oparisaa tau Upuri Yesus. Reiso Paulus sio osohu heu no rosau. ⁶ Paulus iahusieso, oyo Anahatana Ne Inaha ihokai tanuso. Ihokai tanuso irui kawasa osiso na sio oanamana tau sou waroni oaneire tewa runa osima runa maunauna on roe Anahatana. ⁷ Sio rei wasoni sio hutusa rahana uasa sanrei.

⁸ Paulus iaunaso ikaitau tewa pani numa mananouno osi sio Yahudiu suosia rotu-tu hunana tonu rai. Iapamanuso na otapi Anahatana iuna aia tau sio. ⁹ Ne sio umau unuo onata reiso openeso oparisaa. Sio omakania Paulus ne maunauna rerihoni sapani na Anahatana nanie ita tumatau iamahaita. Sio omakania ne maunauna, sio panesi oatinu. Reiso Paulus ieu iarihoniso, oyo ieu ikata sio mampusua pani Tiranus ne kakaranae mainae. Hoka pani oyo, iatuheteso suosia. Ranie hatae isa, ereeu mai poua tonu rei iatuheteso. ¹⁰ Iuna sanrei rotu-tu musum ua. Reiso sio pusiso wasoni orueso poe otoa Asia, sio Yahudiu runa sio tamena pusiso, oatinu maunauna rai rerihoni Upuri.

¹¹ Anahatana iuna sima-simana waroni sio onooe panesi tewasi. Iuna sima-simana rai pusu Paulus. ¹² Paulus ne nipae sinte wani iasamau uai anoe tanui te ne nipae wani inene ahai tanui, sio onanare osi sio kupua, oyo sio kupua iaka runa sakahatena waroni rasuniso raeu rarihoniso.

¹³ Wasoni sio Yahudiu umau oeu ohoi onei sakahatena raeu rarihoni sio wasoni sakahatena rai rasuniso. Sio rei ohete rea Yesus nanai na onei sakahatena oasau sanrei, “Au uaisosia ahokaya tau Yesus waini Paulus iaunaso tanui nanai.” ¹⁴ Ia imam onate waini nanai Skewa ne hehuka hanaia, sio itu. Sio ouna sanrei oi.

¹⁵ Ne ia sakahatene wani sio nanie oneiki rei, ereasau sanrei, “Yesus, au uationai. Paulus oi, au uationai. Ne ano mo, ano seia rei?” ¹⁶ Oyo ia waini sakahatene eresuniki rei isomani, oyo inesi ituso. Ihitaso rotu-tu no papita wakihare runa no apata panesi. Oyo oruma sanakuso oarihoni numa rei.

¹⁷ Sio Yahudiu runa sio tamena pusiso wasoni orueso poe Efesus oatinu tau rei, oyo okaitau hun ruao. Reiso Upuri Yesus nanai, sio oamuirai. ¹⁸ Sio panesi wasoni oparisaa tau Yesus nea ohokaso, oyo oamanaku no kahatena na sio panesi oatinu. ¹⁹ Sio wasoni naone ouna pakakasi oamanou no surata pakakasi rai, oyo oakanupure. Oakanupure na sio panesi oasumata. Surata rai nene hunonia mainaya. Pusire sani sanaa inata nihi hutu nima. ²⁰ Reiso sio oounau sio panesi honu runa maunaune rerihoni Upuri Yesus runa sio panesi opusui ia-ia.

²¹ Areimo sanrei, oyo Paulus iapamata sou pusu Anahatana Ne Inaha nanie ieu sui otoa Makedonia runa otoa Akhaya rotu-tu ihokai roe kota Yerusalem. Iasau,

“Mka au uhokaku roe Yerusalem, oyo kahuræ ueuku roe kota Roma oi.” ²² Reiso iaisosi ne makahaia ua. Sio reimo wasoni Timotius runa Erastus. Iaisosiso poe Makedonia, oyo ia ruai iruei mkane honu poe otoa Asia.

Sio Ouna Purie Poe Kota Efesus

²³ Tau muie rei sio umau ouna purie mainæ poe kota Efesus. Tau sæ, sio openeso tau Paulus ne maunauna rerihoni sapani na Anahatana iapuheuta na iamahaita rotu-tu ria supani pusu Yesus. ²⁴ Poe kota rei, ia tukane sanaa (sanaa, nooi sani hunahane ne putie) isa nanai Demetrius waipo. Inana numa ikina osi sio no anahatana wani titue tewa nanae Artemis. Noore sani Artemis ne numa mainæ. Sio mamnana numa ikina rei oahenire, oyo osupu kepeni panesi. ²⁵ Ianaha runa sio mamnana numa ikina rei pusiso runa sio tukana sanaa tamena, oyo iasau osiso, “Wea kakau, wea waniu. Omi oanei ata ita isupu kepeni panesi rerihoni re tanei rei. ²⁶ Ne omi ruamo onoo runa oatinu nea ata Paulus reini mo, iuna sio oparisaa ata anahatanau waroni sio onanare tau hanao waroni titue tewa. Iapamanu sio panesi mai Efesus ruæ runa sio panesi sui otoa Asia pusiki oi. ²⁷ Reiso mka sio omakania ita re tanei. Ne erenesi rei, mka sio oahata Artemis ia aihuhue ne numa wani mainæ tewa nea. Mka sio ouna Artemis, wani sio pusiso mai Asia runa tuniai reini pusiki oainaa runai, mka sio ounai eremnahui.”

²⁸ Sio oatinu tau rei, oyo anoo rasaa, oyo oaka-kapona, “Arue nai-naia Artemis, ita Efesus re anahatana!” ²⁹ Oyo sio rei runa sio panesi honu oeu ouna purie sui kota rei. Sio osota Gayus runa Aristarkhus, sio Makedoniau wasoni oeu okata Paulus, oyo onesa uaso. Oyo pusiso oamanouso tau osa orumaso roe tihue wani sio hutua pani kota rei oamanouso tanui. ³⁰ Paulus nanie inusu ipusu sio hutue rei na ianamana inete ruai tau sio. Ne sio mampusua osopoi. ³¹ Sio onata umau tau otoa Asia oi oaisosi sio umau na oasau osiki na pene ieui roe sio hutue rei. Sio onata rei wasoni Paulus ne netau. ³² Areimo sanrei, oyo sio hutue ouna purie. Ia isa iakapona sanrei, oyo ia isa iakapona tamene. Tau sæ, sio oanei tewa sio hutue wasoni oamanouso tau sarei. Hasæ opusu sio wasoni ouna purie mani. Oarinii tewa. ³³ Sio Yahudiu oruru Aleksander roe uae iamanane sio hutue na ianamana tau sio pusiso. Sio oounai rerihoni mka iasau sapani. Reiso Aleksander isopa hanai na sio hutue oamaturuso, nanie ianamana inete ruai runa sio Yahudiu pusiso tau sio hutue rei. Nanie iasau osiso ata ia runa sio Yahudiu okata Paulus tewa. ³⁴ Ne sio hutue onoo ata ia Yahudi, oyo oaka-kapona nioo osa rotu-tu yam ua sanrei, “Arue nai-naia Artemis, ita Efesus re anahatana!”

³⁵ Oyo ia sekretaris tau kota rei iuna sio hutue rei oamaturuso. Oyo iasau osiso, “Omi Efesus! Sio pusiso oanei ata ita mai Efesus osaka Artemis ia aihuhue ne numa runa hatu monne wani eremnahui on roe nante, tea? ³⁶ Reiso ia seja mka iauhaa ata titue? Reiso oamaturumo. Pene ouna sæ isa oarinii tewasi. ³⁷ Sio ua rei, omi ororiso mai rei. Aikee okimanaka api monne rerihoni ne numa tewa. Oanamana khatene rerihoni re anahatana rei tewa. ³⁸ Munata Demetrius runa sio tukana sanaa tamena nanie oamanaru ia isa, kahuræ sio oopusaa parakana noi sio no kawasa oapasana. Sio ohete umetena nea na sio oatinu tau parakanau. Sio no kawasa oapasana wasoni. ³⁹ Ne munata omi nanie oakarupu honu, kahuræ sio oapamata sou tau loue pannuhu sio onata wasoni no kawasa oamanouso. ⁴⁰ Tau sæ, omi ouna purie sani sinasi rei, mka ita mtinte. Sio onata wasoni no kawasa tau ita mka oasau ata ami atapimo na ouna purie. Ne ami mka aasau sapani?” ⁴¹ Iasau sanrei, oyo iaisosi sio hutue rei onuniso.

Paulus Ieu Ihori Otoe Makedonia Runa Otoe Yunani

20 ¹ Sio ouna purie tewa nea, oyo Paulus ianaha runa sio mampusu Yesus, oyo iakahaiso tau ne maunauna na oparisaa ia-ia. launauso, oyo iauhaaso samatoro ieu iarihoni kota Efesus, nanie ieu poe otoe Makedonia. ² Ieu ihori otoe rei iakahaiso tau ne maunauna. Irui maunauna panesi osiso. Oyo ieu poe Yunani. ³ Hoka poe oyo, iruei hunana tonu. Nanie isaa kapane nau otoe Siria nea, oyo iatinu ata sio Yahudiu oheu nanie ohunui. Reiso iapamata sou na inuniki pani Makedonia honu. ⁴ Sio umau oeu okata Paulus. Sio reimo wasoni:

Sopater, (amai tau Pirus, ia Berea),
 Aristarkhus,
 Sekundus, (ia Tesalonika),
 Gayus, (ia Derbe),
 Timotius,
 Tikhikus, (on pani otoe Asia)
 Trofimus, (on pani otoe Asia oi).

⁵ Ituso oeu oanaone, oyo onapa au, Lukas, runa Paulus pani nia Troas. ⁶ Karisaa sio Yahudiu oai poroti eresaa tewa pusiki nea, oyo ami asaa kapane aeu aarihoni nia Filipi. Oyo nimarei aamanouma honu runa sio rei pani Troas. Oyo aruema pani rei onona itu.

Paulus Iapuhai Eutikhus Pani Troas

⁷ Tau onone mataanoe rerihoni minggu unue rei ami aamanouma runa sio wasoni oparisaa na aai porotiu tau osa anoma rapeka runa Yesus imatai. Hanroe Paulus nanie ieu nea reiso iau-aunauso rotu-tu saa monon tihu. ⁸ Iauauso roe kakaranae roe naue. Roe kakaranae rei, wani ami aamanouma tanui, kamana panesi raai. ⁹ Ia honue isa nanai Eutikhus iruei roe yanela. Paulus iau-aunauso rotu-tu potuina reiso Eutikhus isue-suei mainae rotu-tu inekei munui roe yanela rei. Inekei munui oyo, iamnahui poe tuamane on roe napisi tonu. Sio okaisunu, oyo ohetui. Ohetui, imatai nea. ¹⁰ Ne Paulus ikaisunu oyo ikahahiota roe tinaini iatipuniki. Iasau osiso, "Pene anomo rauponu. Iamahaiki honu." ¹¹ Iasau pusi sanrei oyo, Paulus isaa roe honu samatoro ikuparehi porotiu, oyo isama pusiso na oaiso tau osa. Ita iau-aunauso potuina honu rotu-tu manahane, oyo ieu iarihonisio. ¹² Paulus ieu, oyo sio oeu oautunu ia honue rei waini iamahaiki na inuniki pani numa. Sio oahana anoo iaka nea.

Paulus Ieu On Pani Troas Rotu-tu Ihokai Pani Miletus

¹³ Ami aeuma nau kapane, oyo asaa nanie aeuma pani Asosi naone na asupu Paulus pani rei. Asupui na isaa ikatama. Paulus iautue sanrei nea nanie ieu suru pani, ieu tau aini. ¹⁴ Isupuma pani Asos, oyo isaa roe kapane samatoro pusima asaa nau kota Metilene. ¹⁵ Ita hanroe asaa honu rotu-tu ahokama haineke nusa Khios. Pouarei ahokama nau nusa Samos. Ita tonurei ahokama nau kota Miletus. ¹⁶ Paulus iapamata sou nea nanie isaa iniku Efesus na pene iapuari pani otoe Asia. Nanie ieu rapu na ihokai roe Yerusalem tau ranie hatae mainae rei sio oaoiki tau Pentakosta.

Paulus Iau nau Sio Onata On Pani Efesus

¹⁷ Hoka nau Miletus oyo, Paulus iaisosi ia isa ieu ria Efesus nanie ianaha runa sio onata tau sio wasoni oparisaa. ¹⁸ Sio ohokaso mai tanui oyo iasau osiso, "Wea amau, wea kakau, wea waniu. Omi oanei nea sapani na uamahaiku kua omi tihue on ranie hatae mataanoe uhokaku mai Asia rotu-tu reini. ¹⁹ Masike sio Yahudiu

ouna sinsaraku tau no kaheu kahatena rai, au unana tanei uanori runa Upuri. Uanori runai uhati ruaku tewa. Anoku runamo rotu-tu matakau waena. ²⁰ Omi oanei ata usima pusire osimo nea. Uauhuni maunaune isa rerihonimo tewa wani mka rekahaimo. Au uatuhetemo tau sio pusiso oamanouso. Au uatuhetemo sui mo numau oi. ²¹ Au uaunau sio Yahudiu runa sio wasoni sio Yahudiu tewa pusiso na sio oarihoni no rosau. Oarihoni no rosau oyo, opusu Anahatana runa oparisaa tau Upuri Yesus.

²² Muie reino mo Anahatana Ne Inaha iaisosiku ueuku roe Yerusalem. Reiso nanie ueuku roe rei nea. Au uanei tewa mka roe rei au sapani. ²³ Hasae uanei ata noi niana pusire, Anahatana Ne Inaha isima osiku nea ata mka sio onusuku pani pui anoe runa ouna sinsaraku. ²⁴ Ne ukaitau tewa rerihoni mka umatakau. Hete nanie unana we tanei pusiki wani usupui on roe Upuri Yesus. We tanei rei, areimo uaunauso tau Sou lake rerihoni sapani na Anahatana irui iake osiso.

²⁵ Reiso oatinu. Au ueu uhoru sui omi pusimo usima rerihoni sapani na Anahatana iuna natu mai tuniai reini. Ne au uanei nea ata on ranie hatae reini omi onooku tewa nea. ²⁶ Reiso ranie hatae reini uasau osimo. Kani mka ia isa rerihoni omi reini imatai oyo inusu usa mainae, au usana tewa. ²⁷ Tau sae, au uauhuni Anahatana ne maunaune isa iae tewa. Usima ne maunauna pusire osimo nea.

²⁸ Reiso osaka ruamo runa sio wasoni oparisaa pusiso. Anahatana Ne Inaha ihitimo na osakaso nea. Osaka sio wasoni oparisaa sani ia mamsakae isaka ne rompau. Sio ouna Anahatana ne mansiau pusu anai imatai. ²⁹ Au uanei nea ata mka ueu uarihonimo, oyo sio kahatena umau ohokaso tanumo anoo runamo tewa. Sio sani asu manene anoe runa rompau tewa. ³⁰ Rerihoni omi ruamo oi, mka sio umau osima runa anamanaya waroni titue tewa na ouna sio wasoni oparisaa tau Yesus opusu sio ruao. ³¹ Reiso ainati. Anomo rapeka nna sapani na uarihoni uaunaumo tewa. Uaunaumo tau onone tau ranie rotu-tu musum tonu rai. Uaunaumo anoku runamo rotu-tu matakau waena suiosa.

³² Muie reini mo, uainisi tau Anahatana na isakamo. Uruimo osi Anahatana. Uruimo osi Anahatana ne maunauna rerihoni sapani na irui iake osita na maunauna rai rakahaimo. Pusu omi opusu ne maunauna rai mka irui iake osimo sani iruiki osi sio pusiso wasoni iuna anoo manisata. ³³ Au rotu-tu reini nanie unana ia isa ne kepeni te, papita te, unanare osi ruaku tewa. ³⁴ Omi oanei nea ata au ruaku unana tanei na uhane muaine na pusire osi au ruaku. Uhane osi we netau wasoni okatakau oi. ³⁵ Tau pusire waroni au uuna, uatuhetemo nea ata tau inana taneiu panesi sanrei, kahuraa ita iakahai sio wasoni okua tewa. Kahuraa ita anori rapeka runa Upuri Yesus ne maunaune rei wani iasau, “Anomu iake mainae pusu arui osi sio umau erenesi asupu sae isa osi ruamu.”

³⁶ Iasau pusi sanrei oyo, irike tune. Irike tune oyo, iainisi osiso. ³⁷ Sio pusiso orani. Orani oyo, oatipuniki runa omukiki nanie oauhaai. ³⁸ Sio anoo karaka mainae tau Paulus iasau on ranie hatae reimo sio onooi tewa nea. Oauhaai oyo, oautunuma nau kapane.

Paulus Sio Osa Kapane Nanie Oeuso Roe Yerusalem

21 ¹ Ami aauhaa sio onata rei pani Efesus, oyo aeuma aarihoniso asaa kapane. Kapane rei ereruma katopu rotu-tu ahokama nau nusa Kos. Hoka nau oyo, hanroe ereruma honu rotu-tu ahokama nau namane Rodos. Hoka nau Rodos oyo, kapane ereruma honu rotu-tu remamanui nau nia Patara. ² Hoka nau oyo, asupu kapane isa nanie ereruma nau otoa Fenisia. Reiso ami asaa kapane rei. ³ Asaa rotu-tu anoo nusa Siprus hae pante. Aeu anikui rotu-tu ahokama nau otoa Siria. Kapane ereruma rotu-tu remamanui nau kota Tirus na sio opaki apia rerihoni kapane rei. ⁴ Reiso ami asupu sio wasoni oparisaa tau Yesus umau nau rei, oyo

aruema akataso rotu-tu onona itu. Sio oasau osi Paulus pusu Anahatana Ne Inaha na pene ieu roe Yerusalem nea. ⁵ Ne kahurae aeu aarihoniso, oyo aeuma honu. Reiso sio pusiso, sio hanaia, sio pinau runa ne hehuka pusiso oautunuma rotu-tu ohokama rerihoni kota rei. Oyo arike tune nau nuae nusue samatoro aanamana runa Anahatana. ⁶ Aanamana runa Anahatana pusi, oyo aauhaa umau. Oyo asaa kapane honu samatoro sio panesi rei onuniso.

⁷ Asaa kapane honu on poe Tirus rotu-tu ahokama pani nia Potolemais. Hoka pani oyo, aatapea sio wasoni oparisaa pani rei. Aruema akataso onone osa. ⁸ Nene hanu roe oyo, aeuma honu rotu-tu ahokama pani Kaisarea. Hoka pani oyo, aeuma ria Filipus ne numa. Filipus waini ia mamsima runa Sou lake osi sio wasoni oatinui tewasi. Ia osa waini rerihoni sio makahai sio mamparisaa itu rei wasoni ohitiso roe Yerusalem. ⁹ Ia ne sio pina hehuka ate. Osupu kawasa on roe Anahatana na osima-sima runa ne anamanaya. ¹⁰ Aruema onona inasa rai oyo, ia mamsima runa Anahatana ne anamanaya isa nanai Agabus ihokai on pani Yudea. ¹¹ Ihokai mai tanuma oyo inana Paulus ne koropou unte. Inanai oyo, ikanihoo ruai aini atua runa hanai atua tau koropou unte rei. Oyo iasau, "Anahatana Ne Inaha iasau sanrei, 'Ia ne koropou unte rei, mka sio Yahudiu okanihooi sanrei roe Yerusalem, oyo oruiki osi sio wasoni sio Yahudiu tewa.'"

¹² Ami aatinu sanrei oyo, ami runa sio mamparisaa pusiso wasoni orueso poe rei osopo Paulus, "Pene aeua roe Yerusalem nea." ¹³ Ne Paulus on poe iasau, "Omi wani orani ouna anoku karake na pene ueuku roe Yerusalem, nanie ta hae? Masike sio onusuku pani pui anoe, oyo ohunuku tau upusu Upuri Yesus iae, au nanie ueuku roe rei sirinia." ¹⁴ Paulus ipenei iatinu tanuma. Reiso asopoi tewa nea. Aasau, "Ami aainisi na ereeu pusu Upuri ne maue."

¹⁵ Aruema poe rei onona inasa rai, oyo aautotu mani apia. Aautotu mani apia pusi oyo, aeuma roe Yerusalem. ¹⁶ Sio mampusua umau on poe Kaisarea oeu okatama nanie oautunuma roe Manason ne numa. Nanie aaranema roe ne numa rei. Manason, ia rerihoni nusa Siprus. Iparisaa tau Yesus potuina nea.

Paulus Sio Ohokaso Roe Yerusalem

¹⁷ Hoka roe Yerusalem oyo, sio wasoni oparisaa oatapeama anoo iaka. ¹⁸ Hanroo oyo, Paulus ieu ikatama nanie inoo Yakobus, ia mainae tau sio wasoni oparisaa. Sio onata tau sio wasoni oparisaa nesia rei wasoni oi. ¹⁹ Paulus iatapeaso, oyo isima runa pusire waroni Anahatana iuna pusu ia sui sio wasoni sio Yahudiu tewa. ²⁰ Sio oatinu Paulus isima sanrei oyo, pusiso oainaa runa Anahatana. Oyo oasau osi Paulus sanrei, "Kakaku Paulus. Kahurae ano aanei ata wasoni sio Yahudiu nihi-nihun sanrei oparisaa tau Yesus nea. Sio pusiso orime kuru Musa ne maunauna. ²¹ Sio rei oatinu ata ano aatuhete sio Yahudiu wasoni orueso sui sio tamena na pene opusu Musa ne maunauna. Sio oasau ata ano aanauso na pene orehi sio ikina runa pene opusu no monna tamena. ²² Kani iuna sae? Mka sio oatinu ata ahokaya nea. ²³ Reiso ami mani maunaune sanrei. Sio ate mai ami reini osopa osi Anahatana nea. ²⁴ Aeu akataso runa apusu monne aatipusi runa ateso. Asenu makapanau waroni kahurae ateso ohane na orehire osi Anahatana. Asenure na sio okoma unuo. Mka sio onoo, oyo oanei ata sio oatinu eresana rerihoni ano. Ne sio onoo ata ano apusu Musa ne maunauna sirinia. ²⁵ Ne rerihoni sio Yahudiu tewa wasoni oparisaa tau Yesus nea, ami aauwatu surate osiso nea na asima runa sapani na apamata sou na pene oai muaine wani sio oruiki osi anahatana wani titue tewa, pene oai makapana nene nasie, pene oai henate rerihoni makapana wani sio oakinenei, runa pene oamanea."

²⁶ Reiso Paulus ieu ikata sio ate rei, oyo hanroe iatipusi pusu monne runa ateso. Oyo onusu pani Anahatana ne numa mainisie nanie ohete umetene pannuhu oatipusi pusu monne pusiki na orehi makapanau osa-osa osi Anahatana.

Ia Natu Kaisar Ne Soratata Oaresi Paulus

²⁷ Onona itu rai haineke pusire nea, oyo sio Yahudiu umau on poe otoa Asia onoo Paulus pani Anahatana ne numa mainisie nene nusue. Oyo onua sio hutue onua purie samatoro osotai. ²⁸ Osotai oyo oaka-kapona, “He omi Israel. Masi oeu mai na oakahaima. Ia reini sahoro ieu ihori sui supani-supani mani iatuheteso na openeso tau ita Yahudiu. Iatuheteso na pene opusu Musa ne maunauna. Iatuheteso na pene oamuiru Anahatana ne numa nusue reini. Muie reini irori sio wasoni sio Yahudiu tewa na onusu mai Anahatana ne numa reini na iapaputi ne numa monne nea. Ne numa wani monne tau Anahatana waini tanui.” ²⁹ Sio oasau sanrei tau naone sio onoo Trofimus, ia Efesus, ieu ikata Paulus sui kota rei. Anoo ranoa ata Paulus ieu ikatai mai Anahatana ne numa nusue oi.

³⁰ Sio pusiso sui kota rei anoo rasaa reiso onua purie, oyo pusiso on nau, on ria orumasu tau osa mai Paulus nanie osotai. Osotai oyo, onesai ihokai rerihoni Anahatana ne numa mainisie rei. Mata hun tewa oyo, oraru Anahatana ne numa nene mitanunua pusire. ³¹ Sio hutue ohunu rea Paulus, oyo ia isa isima osi ia mainae tau ia natu Kaisar ne soratata ata sio Yerusalem pusiso wasoni onua purie. ³² Reiso ieu ikata sio soratata runa sio onata umau, oyo orumasu poe sio hutue rei. Sio hutue rei onoo ia mainae runa sio soratata, oyo ohita Paulus tewa nea.

³³ Ia mainae rei ihokai mai Paulus, oyo iaesiki nanie iasei tanui. Oyo iaaisosiso okanihooi tau ranteu ua. Okanihooi oyo, iasei tau sio hutue, “Ia seia rei? Ne masana sae rotu-tu onua sanrei?” ³⁴ Sio umau oakapona sanrei, sio umau oakapona tamene. Sio onua purie reiso ia mainae iatinu sae isa tewa na ianei masana rei sapani. Reiso iaaisosiso orori Paulus roe sio soratata no numa hatu nanie iasei tanui roe rei. ³⁵ Ohokaso poe hantetane aikune, oyo sio hutue oruru umau nanie ohitai rotu-tu sio soratata osiui ororiki. ³⁶ Sio hutue opusu, oakapona, “Ohunui!”

Paulus Ianamana Inete Ruai

³⁷ Sio soratata nanie onusu Paulus pani no numa hatu nea, oyo iasei tau ia mainae tau ia natu Kaisar ne soratata rei, “Au pisa uasau sae isa osia?”

Ia mainae on poe iasei, “Ano aanei sou Yunani oi?” ³⁸ Reiso ano sahoro ia Mesir wani naone auna sio openeso opusu kupania, oyo aautunu sio mamhunua nihiu ate pani otoa huie, tea?” ³⁹ Paulus on poe iasau, “Au Yahudi, uamrai poe kota Tarsus, kota mainae poe otoa Kilikia. Au uainisi na atapiku uanamana osi sio hutue rei.”

⁴⁰ Oyo itapiki ianamana. Paulus ioo roe hantetane, oyo isopo tau hanai na sio oamaturuso. Reiso oamaturuso nea, oyo ianamana osiso tau sou Ibrani. Iasau sanrei,

22 ¹ “Wea amau, wea kakau, wea waniu. Oatinu na uanamana unete ruaku.” ² Sio oatinui ianamana tau sou Ibrani, oyo oamanutuso erenesi wani sinasi rei. Reiso iasau osiso, ³ “Au mo, au Yahudi. Uamrai poe nia Tarsus poe otoa Kilikia. Ne au mo, au mainae mai kota Yerusalem reini. Gamaliel iatuheteku tau Musa ne maunauna waroni isupure pusu rea upu. Upusu maunauna rai ia-ia. Urui ruaku na unana tanei osi Anahatana sani omi mai rei ranie hatae reini. ⁴ Uuna sinsara sio wasoni oparisaa tau Yesus rotu-tu sio umau omataso. Unota sio hanaia runa sio pinau pusiso, oyo unususo pani pui anoe. ⁵ Ia ona mainae rerihoni sio wasoni oakanupu makapanau osi Anahatana runa sio ona Yahudi nesia rei pusiso pisa

osima ata areimo titue. Uakarota tewa. Usupu surata rerihoni sio onata rei osi rea kakau, rea waniu poe kota Damsyik na ueuku poe kota rei, na unota sio wasoni oparisaa tau Yesus poe rei. Unotaso oyo, ukanihooso samatoro uroriso mai Yerusalem na sio oapasanaso.

⁶ Ueuku rotu-tu uhoka poe, haineke Damsyik nea, oyo tau ranie katopu mata sira tau itane mainae on roe nante eresita erehoriku. ⁷ Itane eresita oyo, uamnahuku poe tuamane, oyo uatinu ia isa nioni iasau osiku, 'Saulus, Saulus. Auna sinsaraku, tau sae?'

⁸ Oyo uasei, 'Upu, ano seia rei?'

Iahata, 'Au reini mo, Au Yesus on poe nia Nasaret. Au sahoro ano wani auna au sinsaraku. Auna we mampusua sinsaraso, areimo sani auna au ruaku sinsaraku.'

⁹ Sio wasoni okataku onoo itane rei ne oatinu ia waini ianamana osiku tewa.

¹⁰ Oyo au on poe uasei honu, 'Upu, ano mo anina na au uuna sae?'

Upuku isana sanrei, 'Hanu roe, oyo aeua poe Damsyik. Hoka poe oyo, mka aatinu rerihoni sae waroni Anahatana ihitia na aunare.'

¹¹ Matakua usena raputiso tau unoo itane mainae rei. Reiso sio wasoni okataku orime hanaku. Orimeku oyo, oautunuku rotu-tu ahokama poe nia Damsyik.

¹² Waini ia isa poe rei nanai Ananias. Iainaa runa Anahatana manisate. Ipusu Musa ne maunauna ia-ia. Sio Yahudiu pusiso wasoni orueso poe Damsyik oamuirai. ¹³ Ilohakai mai tanuku, oyo ioo mai nusuku. Ioo mai nusuku oyo, iasau, 'Waniku Saulus, masi anoo honu!'

Mata huni tewa oyo, unooi. ¹⁴ Oyo iasau osiku, 'Anahatana waini rea upu oainaa runai iroma ano nea na aanei ne maue. Iromaya na anoo ia waini Anahatana Iratikii lapuheuso waini anoi manisate, runa aatinu nioni pannuhu ianamana osia. ¹⁵ Ininia na asima osi sio pusiso rerihoni anoo runa aatinu sae nea. ¹⁶ Reiso anapa sae rei? Hanu roe na aainisi na Anahatana iuna heu me rosau oyo osohu heu me rosau rai.'

¹⁷ Reiso ununiku mai Yerusalem. Hoka mai oyo, uainisi roe Anahatana ne numa mainisie, oyo unoo masasua.

¹⁸ Unoo Upuri. Upuri iasau osiku, 'Masi aeua rapu rerihoni Yerusalem. Tau sae, mka sio umau mai rei openeso oatinu tau ano asima rerihoni au.' ¹⁹ Ne uasau, 'Upu, sio oanei sapani na ueuku sui numa mananouna osi ita Yahudiu nanie usota sio wasoni oparisaa tau ano. Usotaso, oyo uhitaso. ²⁰ Sio ohunu Stefanus waini isima runa ano, au oi uooku haineke uahata sio ohunui iake. Au sahoro usaka sio wasoni ohunui no papita.'

²¹ Iahata, 'Masi aeua. Tau sae, au mo, mka uaisosia aeua hainau noi sio wasoni sio Yahudiu tewa.'

Paulus Ne Kawasa Sani Ia Natu Kaisar Ne Mansiau

²² Sio Yahudiu oatinui rotu-tu ianamana rerihoni sio wasoni sio Yahudiu tewa, oyo oakapona, "Ohunui na imatai iarihoni tuniai reini. Iake tewa iamahaiki asi."

²³ Sio anoo rasaa mainae reiso oakapona runa osihotata no papita runa opesi tapuna suru roe. ²⁴ Reiso ia mainae tau ia natu Kaisar ne soratatua rei iaisosiso orori Paulus pani no numa hatu rei. Oyo iaisosi sio soratatua oasei tanui runa osapui tau awane unie. Osapui na ianei sio hutue wasoni oakapona tanui tau ne isanae sae. ²⁵ Sio wasoni okanihooi tau makapana unte nea, oyo Paulus iasei tau ia kapitane tau sio soratatua utuni waini iooi pani rei, "Sio otapia asapu ia waini ne kawasa sani ia natu Kaisar ne mansiau no kawasa on ia waini ne kawasa iapasanai iasei tanui tewasi? Iasau ata isana tewasi?"

²⁶ Ia kapitane iatinu tau rei, oyo ieu roe ia mainae isima osiki sanrei, "Ita isapui sanrei iake tewa. Ia rei waini sani ia natu Kaisar ne mansiau."

²⁷ Reiso ia mainae ieu poe Paulus, oyo iasei, “Masi aasau, titue ano sani ia natu Kaisar ne mansiau?” Paulus iasau ata, “E-e. Areimo titue. Au sani ia natu Kaisar ne mansiau.”

²⁸ Ia mainae iahata, “Au usenu kepeni panesi na uuna sani ia natu Kaisar ne mansiau. Paulus on poe iasau, “Ne au uamrai, au sani ia natu Kaisar ne mansiau nea.”

²⁹ Reiso mata hun tewa oyo, sio soratatua wasoni naone nanie oasei tanui osuka hae muie. Ia mainae oi ikaitau. Tau sae, ianei nea ata iaisosiso okanihoo ia waini sani ia natu Kaisar ne mansiau tau rante.

Paulus Ianamana Inete Ruai Tau Sio Ona Yahudiu

³⁰ Hanroe oyo, ia mainae tau ia natu Kaisar ne soratatua nanie ianei sio Yahudiu oamanaru Paulus, nanie ta hae? Reiso ialapasiki, oyo ianaha runa sio imam onata runa sio ona Yahudiu pusiso na oamanouso. Sio oautunu Paulus na iamananeso.

23 ¹ Paulus iamrou sio onata rei, oyo iasau, “Wea kakau, wea waniu. Rotu-tu reini uarinii rerihoni uamahaiku sapani. Uamahaiku manisate. Upusu Anahatana ne maunauna pusire.” ² Iasau ata ia manisate oyo, ia imam aihuhue Ananias iaisosi sio wasoni ooso mai Paulus nusui oasapana hohai. ³ Oyo Paulus iasau osiki sanrei, “Mka Anahatana iapasana ano. Ano makarotane wani aasau ata ruamu manisate. Aikee ano manisate tewa. Ano sani pakelo watikohui wani sio oanutu sati putie tanui na sio oahata kuati. Ano aruea pani rei nanie aapasanaku pusu Musa ne maunauna. Aikee ano ruamu apusu maunauna rai tewa nanie aaisosiso oasapanaku!”

⁴ Sio mai Paulus nusui oasau, “Ano auna pumaa ia imam aihuhue waini ianori runa Anahatana tau sae rei?” ⁵ Paulus on poe iasau, “Wea kakau, wea waniu. Au uationai tewa. Sinana au uanei ata ia waini ia imam aihuhue mka uasau sanrei tewa. Tau sae, Musa ikanu tau Anahatana ne anamanaya sanrei, ‘Pene ouna pumaa ia mainae waini iaisosi mo mansiau.’”

⁶ Paulus anoi erepeka ata sio onata umau, sio rerihoni tikane Sadukiu runa sio tamena, sio rerihoni tikane sio onata rerihoni akama Yahudi. Reiso iasau osiso sanrei, “Wea kakau, wea waniu. Au wani ia onate rerihoni akama Yahudi. Wea upu, sio onata rerihoni akama Yahudi oi. Omi wani oasei tanuku tau au uparisaa ata Anahatana iapuhai sio matana.” ⁷ Iasau sanrei oyo, sio onata rerihoni akama Yahudiu runa sio Sadukiu otuntana runa umau. Sio osamaso tau ua. ⁸ Otuntana tau sio Sadukiu oahata Anahatana iapuhai sio matana honu tewa. Oahata sio maisosia on roe noiyaha wasoni tewa, inahau waroni tewa. Ne sio onata rerihoni akama Yahudi oparisaa tau rai pusire.

⁹ Paulus iasau sio matana oamahaiso honu, oyo sio onata oakapona umau ouna purie. Sio matuhete Musa ne maunauna umau wasoni sio onata rerihoni akama Yahudi ohitio roe. Ohitio roe oyo, otuntana runa sio Sadukiu. Oasau, “Ami aapamata sou ata ia rei iuna sae isa wani eresana tewa. Munata inaha isa te, ia maisosie on roe noiyaha te, ianamana osiki, areimo iake.” ¹⁰ Sio otuntana mainae naiosa rotu-tu ia mainae tau ia natu Kaisar ne soratatua ikaitau mka sio oakinene Paulus. Reiso iaisosi ne soratatua oeouso poe, onanai rerihoni sio panesi rei, oyo ororiki roe no numa hatu honu.

¹¹ Pumono pani sanrei oyo, Upuri Yesus ihokai iooi mai Paulus nusui. Iahata, “Paulus, aapamese anomu. Ano asima rerihoni au mai kota Yerusalem nea. Asaka asima runa au roe kota Roma oi.”

Sio Yahudiu Oheu Nanie Ohunu Paulus

¹² Hanroe tau omnanoe oyo, sio Yahudiu umau oheu. Sio osopa ruao ata mka oai tewa, oninu tewa on ohunu Paulus tewasi. ¹³ Sio hutu ate nesi oheu sanrei.

¹⁴ Oeuso roe sio imam onata runa sio ona Yahudi nesia rei, oyo oasau, "Ami asopa ruama na aai sae isa tewa on ahunu Paulus tewasi. ¹⁵ Reiso omi runa sio onata tamena oainisi na ia mainae tau ia natu Kaisar ne soratatua iaisosiso oautunu Paulus mai tanumo. Oasau oakarota ata omi nanie oasei tanui ia-ia rerihoni sae waroni sio oamanarui tanure. Mka ami asaka ahunui on ihokai mai tewasi.

¹⁶ Ne Paulus etei (hotai anai) iatinu ata sio oheu nanie ohunui. Reiso ieui roe sio soratatua no numa hatu, oyo isima osi Paulus. ¹⁷ Oyo Paulus ioi ia kapitane tau sio soratatua utuni isa na ihokai. Ihokai oyo, Paulus iasau osiki, "Aautunu ia ikine rei roe ia mainae tau ia natu Kaisar ne soratatua. Nanie isima runa sae isa osiki."

¹⁸ Reiso ia kapitane iautunu Paulus etei rotu-tu ohokaso roe ia mainae rei.

Hoka roe oyo, ia kapitane iasau, "Paulus, ia waipani pui anoe rei, ioiku, oyo iainisi na uautunu ia ikine rei mai tanua. Nanie isima runa sae isa osia.

¹⁹ Ia mainae rei iakahuu ia ikine rei hanai, oyo iautunui na uaso ruao. Sio ruao, oyo iasei, "Ano nanie asima runa sae osiku?" ²⁰ Ia ikine rei on poe iasau, "Upuku. Sio Yahudiu umau opamata sou nanie oainisi na hanroe ano arori Paulus roe sio ona Yahudiu. Mka sio oasau oakarota ata nanie oasei tanui ia-ia rerihoni sae waroni sio oamanarui tanure. ²¹ Ne pene apusu sio no mainisie. Tau sae, sio hutu ate nesi wasoni oauhuniso nanie onotai poe arena tihue. Sio pusiso osopa ruao na oai tewa, oninu tewa on ohunu Paulus tewasi. Muie reini mo, sio wasoni osaka. Onapa ano aamanaku arori Paulus pusu no maue." ²² Oyo ia mainae rei iasau, "Pene asima osi ia seia mani ata ano asima runa no kaheute rei osiku." Iasau sanrei oyo, iaisosiki inuniki.

Sio Oaisosi Paulus Ieui Poe Feliks

²³ Ia mainae tau ia Natu Kaisar ne soratatua ianaha runa sio kapitana tau sio soratatua utuni. Ianaha runa sio kapitana ua. Iaisosiso sanrei, "Aamanou sio soratatua orori tunua utuni ua, sio soratatua osaa naitanana hutu itu, runa sio soratatua orori atienu utuni ua. Aamanou na sio oeuso poe nia Kaisarea mka-mka pumono tau yam sia. ²⁴ Aamanou naitanana osi Paulus oi na isaa naitanane. Oyo oautunui rotu-tu ihokai poe ia waini ia ne kawasa tau otoa nanai Feliks." ²⁵ Oyo ia mainae rei ikanu surate kani ereasau sanrei,

²⁶ "Au, Klaudius Lisias uatapea ano upuku, Feliks. ²⁷ Ia reini, sio Yahudiu osotai, oyo sina ohunui. Ne uhokaku runa sio soratatua umau, oyo usupuso, oyo unanai rerihoni sio Yahudiu rei. Tau sae, au uatinu ata ia ne kawasa sani ia natu Kaisar ne mansiau. ²⁸ Au nanie uanei sio wasoni oamanarui tau sae, reiso uroriki roe sio ona Yahudiu. ²⁹ Uatinu sio oamanarui, oyo uanei ata sio oamanarui pusu sio Yahudiu ruao no maunau akama. Ne sio oamanarui pusu sae isa tewa na ami ahunui te anusui pani pui anoe. ³⁰ Oyo sio osima osiku ata sio Yahudiu umau wasoni oheu nanie ohunui. Reiso mata hun tewa oyo, au uaisosiki poe tanua. Uaisosi sio wasoni oamanarui rei osima osia runa sio wasoni oamanarui runa sae."

³¹ Reiso sio soratatua oeu oautunu Paulus sani ia mainae iaisosiso. Sio oeu okata Paulus tau pumono rei rotu-tu ohokaso poe Antipatris. ³² Hanroe oyo, sio wasoni osaa naitanana osaa okata Paulus. Ne sio soratatua wasoni onena onuniso roe no numa hatu roe Yerusalem honu. ³³ Hoka poe Kaisarea oyo, orui surate rei osi ia waini ia ne kawasa tau otoa rei. Oyo orui Paulus osiki oi. ³⁴ Ia onate rei ipaca tau surate rei, oyo iasei tau Paulus, "Ano me niane sae?" Paulus on poe isima sanrei, "Kilikia." ³⁵ Ia onate iasau, "Mka uatinu runa me parakana rei sirinia. Ne

napa rotu-tu sio wasoni oamanarua ohokaso mai.” Oyo sio oaisosiso osakai pani numa aiau wani Herodes inanai.

Feliks latinu Tau Sio Ona Yahudiu No Parakana Runa Paulus

24¹ Onona nima oyo, ia aihuhue tau sio wasoni okenu makapanau osi Anahatana, Ananias, ihokai ikata sio ona Yahudiu umau runa ia waini iamanaru tumatau pusu maunauna isa nanai Tertulus. Ohokaso on roe Yerusalem rotu-tu ohokaso poe Kaisarea. Hoka poe oyo, oamanaru Paulus osi ia waini ia ne kawasa tau otoi rei waini nanai Feliks. ² Reiso ia onate rei ianaha runa Paulus. Ihokai oyo, Tertulus iamanarui sanrei, “Upuku. Ano aaisosima iake. Reiso aruema aamaturuma mai rei. Ano me iaka panesi osi ami Yahudiu mai mani tuamane rei. Tau sae, ano aheu pusu me aanei panesi. ³ Upuku Feliks. Ano iake! Sui supani-supani mani ami anoma rapeka runa pusire waroni ano auna osima. ⁴ Au nanie uakaremaya potuina tewa, ne uainisi na anomu iake aatinu tau we anamanaya mkana-mkana rai mani.

⁵ Ami asupu ia reini mo iuna neka mansia panesi. Iakarema panesi sui supani-supani mani sui tuniai reini pusiki iuna sio Yahudiu ouna purie. Ia sahoro iaisosi sio wasoni opusu ia waini on pani nia Nasaret. ⁶ Ia iapaputi rea Anahatana ne numa mainisie. Ne ami asotai naone. Ami nanie aapasana pusu ami mani maunau akama mani. ⁷ Ne ia mainae tau ia natu Kaisar ne soratatu iwahui rerihonima, ⁸ oyo iaisosi sio wasoni oamanarui oamananea. Munata ano ruamu aasei tanui, mka aatinu ata pusire ami wani aamanarui tanure waroni titue.” ⁹ Sio Yahudiu oama-amanaru Paulus oi oasau ata Tertulus waini iasau titue.

¹⁰ Oyo ia waini ia ne kawasa rei iatieu osi Paulus na Paulus ianamana. Reiso Paulus iasau sanrei, “Upuku. Au uanei ata ano aasau potuina nea. Aasau sae wani titue, sae wani eresana mai otoi reini rotu-tu musum inasa rai. Reiso uahata iake uanamana unete ruaku mai tanua. ¹¹ Ano ruamu pisa aasei na mka aatinu ata mato ueu roe Yerusalem nanie uainaa runa Anahatana. Mato ueuku we onona hutusa rahana ua. ¹² Sio Yahudiu onooku wani utuntana runa ia isa tewa. Onooku uamanou sio hutue na ouna purie tewa. Roe Anahatana ne numa mainisie, pani numa mananouna osi sio Yahudiu, sui kota rei pusiki, onooku uuna sanrei tewa. ¹³ Reiso sio pisa osima runa sae isa osia tewa na ano aanei ata sio wasoni oamanaruku titue. ¹⁴ Ne uasau ata sae wani titue wani sanrei. Au uainaa runa Anahatana waini mania upu, sio Yahudiu, oainaa runai oi. Au uainaa runai pusu Yesu ne maunauna waroni sio Yahudiu oasau ata waroni titue tewa. Runa uparisaa tau Musa ne maunauna runa sio mamsima runa Anahatana ne anamanaya no maunauna sirinia. ¹⁵ Uparisaa sani sio rei oi, ata mka Anahatana iapuhai sio matana pusiso. Sio wasoni oamanisa runa sio wasoni oamanisa tewa. ¹⁶ Reiso au uawaha tau we mkona pusiki na uamahaiku manisate. Uarinii rerihoni uamahaiku sapani. Uamahaiku manisate. Upusu Anahatana ne maunauna pusire. Au we sanae isa osi tumata tewa.

¹⁷ Ueu uarihoni Yerusalem musum inasa rai, oyo ununiku roe rei honu nanie urori kepeni osi sio mosokinia rerihoni we mansiau runa urehi makapanau osi Anahatana. ¹⁸ Sio Yahudiu onooku roe Anahatana ne numa mainisie urehire upusu monne uatipusi nea. Ukata sio hutue tewa. Au uunasou ouna purie tewa. ¹⁹ Ne sio Yahudiu umau on pani otoi Asia ounaso ouna purie. Sio sahoro kahurae ohokaso mai na oamanaruku kani nanie oahata au we isanae. ²⁰ Ne ohokaso tewa. Reiso kahurae sio Yahudiu rei wasoni oamanaruku mai rei ruao osima osimo runa osupu we kahatene sae pannuhu uanamana unete ruaku osi sio ona Yahudiu. ²¹ Hasae sio pisa oasau ata au uoo uamanane sio onata rei, oyo uasau anamanae osa rei

mani. Uasau, “Omi wani oasei tanuku ranie hatae reini tau au uparisaa ata mka Anahatana iapuhai sio matana.”

²² Feliks, ia waini ia ne kawasa rei, ianei panesi rerihoni sio mampusu Yesus no maunauna. Iasau tewa ia seia titue, ia seia isana rerihoni Paulus runa sio Yahudiu rei. Ne iasau sanrei, “Mka ia mainae tau ia natu Kaisar ne soratatua Lisias ihokai, oyo mato uapamata sou rerihoni parakana rei.” ²³ Oyo iaisosi ia kapitane tau sio soratatua utuni isaka Paulus ne pene iuna mtinte tanui runa itapi ne netau orori apia te, muaine te osiki.

Feliks Runa Sahai Drusila Oatinu Tau Paulus

²⁴ Onona inasa rai oyo, Feliks ihokai ikata sahai Drusila. Drusila ia Yahudi. Feliks ianaha runa Paulus, oyo iatinu tau Paulus ianamana rerihoni sapani na iparisaa tau Yesus, ia Anahatana Iratiki Iapuheuso. ²⁵ Paulus iaunau rerihoni sapani na ita iamanisa, sapani na iamtou hanari, iamtou airi na pene ipalalosa, runa sapani na mka ranie hatae isa Anahatana iapasana pusita. Oyo Feliks ikaitau. Reiso iasau osi Paulus, “Ano pisa aeua nea. Ne munata mka patapariku tewa, au uanaha runaya.” ²⁶ Tau muie rei Feliks inina na Paulus irui kepeni osiki na ialapasiki. Reiso taua-taua ianaha runa Paulus na ianamana runai.

²⁷ Ianaha runa Paulus rotu-tu musum ua oyo, sio okati Feliks. Ohiti Perkius Festus tau ia ne kawasa tau otoa rei. Feliks nanie iuna iake osi sio Yahudiu, reiso ihoka Paulus rerihoni pui anoe tewa.

Paulus Iainisi Na Ia Natu Kaisar Iasei Tanui

25 ¹ Festus ihokai poe otoa rei, oyo onona tonu oyo, ieu iarihoni Kaisarea nanie ieu roe Yerusalem. ² Hoka roe oyo, sio imam onata runa sio ona Yahudiu tamena oama-amanaru Paulus osiki. Sio oai-ainisi ³ na iuna iake osiso na iaisosi sio umau orori Paulus roe Yerusalem. Sio rei oheu nanie osakai poe arena tihue, oyo ohunui. ⁴ Ne Festus on poe iasau, “Sio soratatua wasoni osakai poe Kaisarea. Au oi, potuina tewa nea, oyo ununiku poe rei honu. ⁵ Reiso oaisosi sio wasoni no kawasa umau rerihoni omi rei na sio oeuso poe, okataku. Munata Paulus isana mka sio oamanarui poe rei.”

⁶ Iruei roe Yerusalem roe sio Yahudiu onona wanu te hutusa honu, oyo Festus inuniki poe Kaisarea. Hoka poe, hanu sanrei oyo, iruei tau ne katera wani iatinu parakanau tanui nanie iasau ata kani Paulus isana te tewa. Iruei poe oyo, iaisosiso orori Paulus poe tanui. ⁷ Paulus ihokai poe nea oyo, sio Yahudiu wasoni ohokaso on roe Yerusalem rei, oooso ohoriki. Oamanarui oasau ata ne isanaya mtinta panesi. Ne sio onoo tau matae tewa sae waroni sio oamanarui tanure. ⁸ Oyo Paulus ianamana inete ruai. Iahata, “Upuku. Pusu Musa ne maunauna, au we isanae isa tewa. Pusu Anahatana ne numa mainisie, au we isanae isa tewa. Pusu ia natu Kaisar ne maunauna iae, au we isanae isa tewa oi.”

⁹ Ne Festus nanie inana sio Yahudiu anoo. Reiso iasei tau Paulus sanrei, “Ano nanie aeua roe Yerusalem na au uasei tanua na uanei ata kani sio oamanarua titue te tewa?” ¹⁰ Ne Paulus on poe iasau, “Au wani uoo mai ano me kawasa. Ia natu Kaisar roe Roma irui kawasa osia na aasau ata kani usana te tewa. Kahurae omi oasei tanuku mai rei. Ano ruamu aanei ia-ia ata au we sanae isa osi sio Yahudiu tewa. ¹¹ Au we isanae mtinte isa tewa. Isanae mtinte wani kahurae oapasanaku ohunuku tanui. Sinana au we isanae mtinte na kahurae ohunuku, ohunuku, areimo iake. Au uainisi tewa na pene ohunuku. Ne sio oamanaru oakarota, reiso sio no kawasa oruiku osi sio Yahudiu rei tewa. Au uainisi na ia natu Kaisar roe Roma ruai iasei tanuku na iasau ata kani we isanae te tewa.”

¹²Oyo Festus ianamana runa sio wasoni oau-aunau, oyo iasau osi Paulus, “Ano aainisi na uaisosia roe ia natu Kaisar reiso kahurae ano aeu roe tanui.”

Festus Isima Rerihoni Paulus Ne Parakana Osi Aia Agripa

¹³Potuina tewa oyo, Aia Agripa runa hotai Bernike ohokaso poe Kaisarea nanie oatapea Festus. ¹⁴Hoka poe oyo, orue onona inasa rai, oyo Festus isima runa Paulus ne parakana osi Aia Agripa. Iasau sanrei, “Ia isa waini rei, Feliks iarihoniki pani pui anoe. ¹⁵Ueuku roe Yerusalem, oyo sio imam onata runa sio ona Yahudiu nesia rei osima osiku runa ia rei. Osima oyo, oainisi na uasau ata ia rei isana. ¹⁶Ne uasau osiso ata ami, ia natu Kaisar ne mansiau, piasa atapi ia waini sio oamanarui iamanane sio wasoni oamanarui rei na ianamana inete ruai. Inete ruai samatoro ami aasau ata kani isana te tewa. ¹⁷Reiso sio ona Yahudiu rei ohokaso mai, oyo unapa potuina tewa. Nene hanu roe oyo, urueku tau we katera wani uatinu parakanau tanui. Oyo uaisosiso orori ia rei poe tanuma. ¹⁸Sio wasoni oamanarui rei ohitio roe, oyo uahata kani sio nanie oamanarui tau kahatena mainaya. Aikee oamanarui rerihoni kahatena sanrei tewa. ¹⁹Hasae otuntana runai rerihoni sapani na kahurae sio oainaa runa Anahatana. Otuntana runai rerihoni ia waini nanai Yesus waini imatai. Ne Paulus iasau ata waini iamahaiki. ²⁰Reiso au mo uanei tewa sapani na au mka uasei tanui rerihoni rei. Oyo uasei ata kani nanie ieui roe Yerusalem na sio oasei tanui roe kota rei. ²¹Ne Paulus iainisi na sio soratata oapamesei na mka ia natu Kaisar iasei tanui na iasau ata kani isana te tewa. Oyo au uaisosiso oapa-apamesei rotu-tu mka au pisa uaisosiki roe ia natu Kaisar. ²²Oyo Agripa iasau osi Festus, “Potuina nea au ruaku nanie uatinu ia rei.” Festus on poe iasau, “Hanroe mka ano aatinui.”

Paulus Ianamana Osi Aia Agripa

²³Reiso hanroe oyo, Agripa runa Bernike ohokaso. Ohokaso oyo, sio panesi oamuiru uaso tau maise onate. Onususo pani numa mainae wani sio hutua oamanouso tanui. Onusu okata sio mainaya rerihoni sio soratata runa sio onata rerihoni kota rei oi. Oyo Festus iaisosiso orori Paulus roe tanuso. ²⁴Hoka roe oyo, Festus iasau, “Upuku Aia Agripa runa pusimo utumo wani okatama mai rei. Omi onoo ia reino. Sio Yahudiu pusiso wasoni roe Yerusalem runa mai Kaisarea reini, oainisi runa oakapona oahata kahurae ami ahunui. ²⁵Ne au usupu ne isanae isa tewa na ami ahunui. Ia ruai iainisi na uaisosiki roe ia natu Kaisar roe Roma na natu Kaisar iasei tanui na iasau ata kani isana te tewa. Reiso upamata sou nanie uaisosiki roe ia natu Kaisar. ²⁶Ne uanei tewa mka ukanu tau surate sapani osi upuku Kaisar rerihoni ia reini runa ne parakana rei. Reiso au uaisosiki ihokai mai tanumo reini runa ano ruamu, Aia Agripa, na ita iasei tanui honu na usupu sae isa na ukanu surate rei. ²⁷Uahana iake tewa kani uaisosi ia isa waini sio oaresiki na ieui roe ia natu Kaisar kani usima tewa rerihoni sio oamanarui sapani. Kahurae usima rerihoni ne isanae sae.”

26 ¹Oyo Agripa iasau osi Paulus, “Au utapia aanamana anete ruamu.” Reiso Paulus iatieu, oyo ianamana inete ruai. ²“Tapea, upuku, Aia Agripa. Au uahana au we untu tau au pisa uanamana unete ruaku osia ranie hatae reini. Unete ruaku rerihoni pusire waroni sio Yahudiu oamanaruku tanure. ³Au we untu tau ano aanei panesi rerihoni ita Yahudiu re monna runa sae waroni ami atuntana runare. Reiso uainisi na ano aatinu rerihoni au sapare tanuku.

⁴Sio Yahudiu panesi oanei sapani na uamahaiku on au honue asi. Sio oanei sapani na uamahaiku poe au ruaku we niane runa sapani na uamahaiku roe Yerusalem. ⁵Potuina nea sio oanei rerihoni au. Kani sio nanie, sio pisa osima ata uamahaiku sani ia onate rerihoni akama Yahudi. Upusu monna mtinta pusire

waroni ami rerihoni tikane rei opusure. ⁶ Muie reini mo, au wani uooku mai rei na omi oasau ata kani usana te tewa tau uparisaa mka ami asupu sae wani Anahatana itotoe osi mania upu ata mka iruiki. ⁷ Sio Yahudiu rerihoni sio ipana hutusa rahana ua oainaa runa Anahatana tau onone tau ranie. Sio oparisaa ata mka Anahatana irui sae wani itotoe rei. Aikee, Aia Agripa, sio wasoni oamanaru au reini tau au oi uparisaa ata mka Anahatana irui sae wani itotoe rei. ⁸ Sapani na omi Yahudiu oparisaa tewa ata Anahatana ne kawasa iapuhai sio matana?

⁹ Naone au ruaku uahata kahuraa au unesi sio wasoni oparisaa tau Yesus, ia waini on pani nia Nasaret rei. ¹⁰ Reiso unesiso roe kota Yerusalem. Sio imam onata orui kawasa osiku na unusu Anahatana ne mansiau pani pui anoe. Sio ohunu sio wasoni oparisaa rei, au uasau ata iake. ¹¹ Uuna sinsaraso sui numa mananouna osi sio Yahudiu runa utentene tanuso oanamana kahatene rerihoni Yesus. Anoku titie mainae tau sio reiso ueu sui kotau sui sio rakana usuiso na uuna sinsaraso.

¹² Reiso nai osa wani ueuku poe Damsyik. Urori sura kawasae rerihoni sio imam onata na uuna sinsara sio wasoni oparisaa tau Yesus. ¹³ Au wani ueu sui arena tau ranie katopu, Aia Agripa, oyo unoo itane eresita on roe nante. Eresita mainae erenesi ranie. Wani eresita erehori au runa sio wasoni oeu okataku. ¹⁴ Pusima aamnahuma poe tuamane. Oyo uatinu nioke ereasau osiku tau sou Ibrani sanrei, "Saulus, Saulus. Ano anesi au, areimo auna sinsaraku, nanie ta hae? Ano anesi au, areimo auna ruamu resunia sani koropou ereuna ruae resuniki kani eresiku upue ne kahitate. ¹⁵ Oyo uasau, 'Upuku, ano seia rei?' Upuku on poe iasau osiku, 'Au reini, au Yesus ano wani auna sinsaraku. Auna we mampusua sinsaraso, areimo sani auna au ruaku sinsaraku. ¹⁶ Ahanu na aoo roe. Uatuhete ruaku osia na uhitia na aanori runaku runa asima runa anoo au ranie hatae reini. Asima runa sae waroni mka uatuhetere tanua tau muie oi. ¹⁷ Mka ualapasias rerihoni sio Israel runa sio niana wasoni sio Yahudiu tewa. Au uaisosia aau nau noi sio wasoni sio Yahudiu tewa ¹⁸ na ano auna sio oanei we maunauna sani aheka sio matao usena na onoo. Uaisosia aatuheteso na sani ia isa ieu irihoni nianiai erepumonoi, oyo ihokai pani manahane, ia aia sakahatene iaisosiso tewa nea. Ne Anahatana sahoro iaisosiso na iuna heu no rosau, oyo ouna osa runa sio wasoni Anahatana iuna anoo manisata tau sio oparisaa tau au.

¹⁹ Reiso, Aia Agripa, au upusu Yesus ia-ia. Yesus waini iatuhete ruai osiku on roe noiyaha rei na unooi. ²⁰ Mataanoe uaunauso poe nia Damsyik. Ita uaunauso roe kota Yerusalem. Uaunau sio sui otoo Yudea pusiso. Ita uaunau sio wasoni sio Yahudiu tewa. Uaunauso ata kahuraa sio oarihoni no rosau, oyo opusu Anahatana ne maunauna runa oatuhete ata oarihoni no rosau pusu oamahaiso manisata. ²¹ Reiso tau rei, sio Yahudiu osotaku roe Anahatana ne numa mainisie. Osotaku oyo, ohunu reaku. ²² Ne rotu-tu reini Anahatana iakahaiuku. Reiso wani uooku mai rei na usima rerihoni Yesus osi sio pusiso, sio mainaya runa sio wasoni sio mainaya tewa. Sae waroni uasau rei runa sae waroni sio mamsima runa Anahatana ne anamanaya runa Musa oaunutu anoo tanure, pusire osa. ²³ Pusima aasau ata la Anahatana Iratiku lapuheuso Okarihuru mka sinsarai, oyo iuna tumata waini mataanoe imatai, oyo iamahaiki honu. Iamahaiki na isima osi sio Yahudiu runa sio wasoni sio Yahudiu tewa ata Anahatana mka iapuheuso na oamahaiso rotu-tu ria supani. Sani kamane eresita na onoo pusire, Anahatana iapuheuso pusu iunaso oanei ne maunauna.

²⁴ Paulus waini ianamana inete ruai sanrei, oyo Festus iakapona sanrei, "Paulus, ano amukea nea. Anoo me surata panesi rotu-tu amukea nea." ²⁵ Ne Paulus on poe iasau, "Upuku, Festus. Umukeku tewa. Au wani uasau anamanaya waroni titue runa iaka. ²⁶ Aia Agripa ruai ianei ata au wani uasau rerihoni Yesus titue. Reiso tau ia aia Agripa ianei nea rerihoni sae waroni uasau rei, uanamana umoni tewa. Au

uanei ia-ia ata ianei pusire rerihoni Yesus. Ianei oi ata sio ouna sani uasau rei osi Yesus, oauhuniso tewa. Ounai mai manahane. ²⁷ Aia Agripa. Ano aparisaa tau sae waroni sio mamsima runa Anahatana ne anamanaya oaunutu anoo tanure, tea? Uanei ano aparisaa.”

²⁸ Oyo Agripa iasau osi Paulus, “Ano aahata aaunauku rapu-rapu mani sanrei, oyo nanie auna au unusu Sarane?” ²⁹ Oyo Paulus on poe iasau honu, “Au uainisi tau Anahatana na rapu-rapu mani te, potuina te, ano, Aia Agripa, runa omi pusimo utumo wani oatinu tau au ranie hatae reini ouna Saraneu sani au reini. Ne uainisi tewa na omi, sio okanihoomo tau ranteu sanrei.”

³⁰ Oyo ia aia, ia waini ia ne kawasa tau otoi rei, Bernike, runa sio pusiso wasoni oru-rue okataso, pusiso ohitioso. ³¹ Ohokaso pani manahane, oyo pusiso oasau osi umau, “Ia rei iuna sae isa tewa na kahuræ sio ohunui te osakai pani pui anoe.”

³² Oyo Agripa iasau osi Festus, “Sinana pene iainisi na ia Natu Kaisar iasei tanui, ami ahokai arihoni pui anoe.”

Paulus Sio Osaa Kapane Nanie Oeuso Roe Kota Roma

27 ¹ Sio mainaya oapamata sou nanie oaisosi Paulus isaa kapane ieuu pani otoi Italia. Kota Roma wapani Italia. Reiso sio orui Paulus runa sio umau honu wasoni osakaso pani pui anoe. Oruiso osi ia kapitane tau sio soratatua utuni waini nanai Yulius. Sio oaoi ne tikane soratatua tau, “Ia Natu Kaisar Ne Tikane.”

² Au, Lukas, uhokaku poe Paulus, oyo ami asaa kapane wani erehokai on nau Adramitium. Kapane rei nanie ereeu erehori namana sui otoi Asia. Ami asaa roe, oyo kapane rei ereruma. Aristarkhus, ia Makedonia on pani nia Tesalonika, isaa ikatama oi. ³ Hanroe oyo, ahokama poe namane Sidon. Yulius iake runa Paulus. Reiso itapiki ieuu ria ne netau na sio oakahaiki. ⁴ Asaa on poe Sidon honu. Kapane ereruma erehoha ihute reiso ami asaa aasawari nusa Siprus sui kola atua na nusa rei erenete ihute. ⁵ Oyo kapane ereruma pusu nuæ haineke otoi Kilikia runa otoi Pampilia, oyo ahokama poe nia Mira poe otoi Likia. Hoka poe oyo, kapane remamanui. ⁶ Kapane remamanui oyo, ia kapitane isupu kapane isa honu. Kapane rei mato erehokai on nau kota Aleksandria nanie ereeu pani Italia. Reiso ia kapitane rei ineama asaa kapane rei.

⁷ Kapane rei ereruma manu-manu rotu-tu onona inasa rai, oyo ahokama poe nia Kanidus. Ne ahokama poe susa. Oyo kapane ereruma erehoha ihute reiso kapane ereruma suru poe iake tewa nea. Reiso ereruma suru nau pusu nusa Kreta haineke Tetue Salmone na nusa rei erenete ihute. ⁸ Kapane ereruma haineke kola atua ne ereruma susa. Ereruma-ruma rotu-tu ahokama poe niane isa nanæ Namane lake, haineke nia Lasea.

⁹ Ami asaa potuina reiso kapane ereruma iake tewa nea. Haineke musum mahatane nea reiso nuæ mainæ nea. Reiso Paulus iaunauso sanrei, ¹⁰ “Wea kakau, wea waniu. Au uahata munata ieuu isa kapane muie reini mo, iake tewa. Mka isupu siraka. Mka apia pani kapane anoe ramokoso, kapane eremokoi, runa sio umau omataso oi.” ¹¹ Ne ia kapitane tau sio soratatua utuni iatinu tau ia waini iaisosi sio mamrori kapane runa ia kapane upue no maunaune. Iatinu tau Paulus ne maunaune tewa. ¹² Namane rei iake tewa na kapane ereruei tanui tau musum mahatane. Reiso sio panesi rerihoni sio wasoni osaa kapane rei oapamata sou nanie osaa kapane rei honu oyo, oeu rea rotu-tu ohokaso poe namane Feniks na onapa poe rei rotu-tu musum mahatane pusiki. Feniks areimo namane nau nusa Kreta wani remanæ hæ ranie sinohue napi wanane.

Ihu Mainae Nau Nuae

¹³ Tau muie rei hananunne reuhona on nau haha. Reiso sio wasoni orori kapane rei oahata kapane pisa ereruma iake nea. Reiso nanie osaa poe Feniks nea. Reiso oapusaa kapane nene hatu aie, oyo kapane ereruma suru poe haineke kola atua sui nusa Kreta. ¹⁴ Ne potuina tewa oyo, ihu mainae reuhona makae naiosa on ria muni. Sio oaoi ihute sanrei tau "Ihute On Pani Ranie Eresaa Napi Pante". ¹⁵ Ihu mainae rei erehita ami mani kapane rei reiso pisa ereruma suru pani tewa nea tau kapane ereruma erehoha ihute. Reiso ami atapi ihute rei erehana mani kapane mani. Kapane eremanu erepusu ihute mani. ¹⁶ Ami aniku nusa ikine isa nanae Kauda. Nusa rei erenete ihute mkane reiso ami akua aapamese kapane rei nene haka. Ne susa naiosa aapamesei. ¹⁷ Sio oapusaa haka rei roe kapane, oyo okanhoo awaneu rahori kapane rei na kapane makae. Sio okaitau mka no kapane rei kokiee tau sisia nau Sirtis tau nuae nekete. Reiso oaputunu nane onate, oyo otapi no kapane rei eremanu erepusu ihute mani. ¹⁸ Ihute karihurue rei runa kolau mainaya rai rasa-rasasiru mani kapane rei, rotu-tu hanroe oyo, apesi apia umau waroni kapane ererore. Apesire poe nuae na kapane karahirine mkane. ¹⁹ Oyo hanroe honu oyo, sio ruao opesi kapane nene naneu umau, toka-toka naneu umau, runa awaneu umau. Opesire poe nuae. ²⁰ Onona inasa rai anoo ranie tewa, anoo oneu tewa. Ihu mainae rei runa kolau mainaya rai rasa-rasasiru mani kapane sirinia. Reiso ami aahata kani mka aamahaima tewa nea. Mka amokoma.

²¹ Potuina nea oaiso tewa. Reiso Paulus iooi kua tihue, oyo iasau osiso, "Wea amau, wea kakau, wea waniu. Sinana omi oatinu tau au we maunaune na pene osaa kapane oeu oarihoni Kreta, ita isupu siraka sanrei tewa. Ne omi oatinu tau au tewa reiso ita ruari eresunita runa re apia umau, ipesire nea. ²² Ne au uainisi na oapamese anomo. Mka ia isa iae rerihoni ita reini imatai tewa. Mka pusita iamahaita. Hasae kapane ruae mka eremokoi. ²³ Au uanei nea tau monosi Anahatana waini iaisosiku runa au uainaa runai iaisosi ne maisosie on roe noiya isa ihokai mai tanuku. Ia maisosie rei iooi mai nusuku, ²⁴ oyo iasau, "Paulus. Pene anomu ereuponu. Kahurae ano aamanane ia Natu Kaisar. Aatinu. Anahatana anoi iake tau ano reiso sio wasoni osaa kapane rei okataya mka oamahaiso oi. ²⁵ Reiso wea amau, wea kakau, wea waniu. Oapamese anomo. Oparisaa tau Anahatana ata mka ereeu sani ia maisosie iausau osiku rei. ²⁶ Ne mka kapane rei kokiee ria nusa isa."

Kapane Kokiee Ria Nusa Isa

²⁷ Ihute ererori mani kapane rei onona hutusa rahana ate nea, oyo pumono pani sanrei oyo, mani kapane rei wani eremanu sui Nuae Adria. Saa monon tihu pani sanrei oyo, sio wasoni orori kapane rei oahana ata ami wani haineke muni nea. ²⁸ Reiso sio okanhoo hatu tau awane na orenu nuae. Oyo orati hatu rei ereruma rotu-tu poe nuae nosite. Oyo oapusaa hatu rei honu, oyo orenu ata noa hutu ua. Kapane reatia mkane honu, ita orenu honu. Noa hutusa rahana nima. ²⁹ Sio okaitau mka kapane erekoa hatu. Reiso oausipu hatu aia ate hae kapane muie. Oausipure oyo, oainisi na manahane on sini. ³⁰ Sio wasoni orori kapane rei nanie mene-mene oruma oahuniso oarihoni kapane rei. Reiso orati kapane nene haka poe nuae oakarota ata nanie oausipu hatu aia honu hae kapane uae. ³¹ Ne Paulus iasau osi ia kapitane tau sio soratatu utuni runa sio soratatu, "Munata sio rei okata kapane rei tewa, omi pusimo mka oamahaimo tewa." ³² Reiso sio soratatu oroto roha awaneu waroni rakanihoo haka rei, oyo otapiki remnahui poe nuae, oyo eremanui. ³³ Haineke kinoke nea oyo, Paulus iaisosi sio pusiso oaiso. Iasau sanrei, "Onona hutusa rahana ate nea omi oai tewa. Ne onapa-napa anomo ramaturuso tewa

mani. Oai sae isa tewa. ³⁴ Reiso uaisosimo oai mkane na mka oamkona honu. Oai mkane. Tau sae, mka pusimo oamahaimo. Sinsaramo tewa nea. ³⁵ Iasau pusi sanrei oyo, inana poroti, oyo iasau osi Anahatana sanrei, “Ama, Anahatana. Ano iake. Ano arui muaine rei osima.” Sio pusiso onooi. Oyo ikuparehi poroti rei, oyo iaiki. ³⁶ Reiso pusiso anoo kaia reiso oaiso. ³⁷ Ami pusima noi kapane anoe, ami utuni ua hutu itu rahana nome. ³⁸ Ami aaima rotu-tu tiama pokona, oyo sio opesi maneie wani kapane repuniai na kapane rei karahirine mkane.

³⁹ Ranie eresaa nea oyo, sio onoo muni ne oanei tewa ata sio wasoni sui supa. Ne onoo nua pina runa sisia ria nuae nusue. Reiso sio oheu nanie ouna kapane eresosu ria muni rei kani olaiki. ⁴⁰ Reiso oroto roha awaneu waroni sio okanihoo hatu aia tanure na hatu aia ramokoso poe nuae nosite. Oyo osuha awaneu. Awaneu rai, sio okanihoo kapane nesita tanure. Osuhare na ouni asawari kapane uae. Oyo oapusaa nane roe kapane uae na kapane ereruma pusu ihute. Oapusaa nane oyo, onina ria muni. ⁴¹ Ne kapane rei retaehe tau pupue poe nuae nosite wani ereuna nuae nekete. Kapane uae eremaintiki tau sisia reiso nisue tewa nea. Oyo kolau mainaya rapapa kapane muie rotu-tu wapho pusiki.

⁴² Reiso sio soratatua oheu nanie ohunu sio wasoni sio osakaso na pene oakinanuso rotu-tu ohokaso ria muni, oyo orumaso. ⁴³ Ne ia kapitane tau sio soratatua utuni ipenei tau Paulus imatai. Reiso isopo na pene sio soratatua ohunu sio wasoni sio osakaso. Oyo iaisosi sio pusiso wasoni oanei oakinanu osoman poe nuae na oakinanuso rotu-tu ohokaso ria muni. ⁴⁴ Sio wasoni oanei oakinanu tewa orime ai inata rerihoni kapane rotu-tu ohokaso ria muni. Reiso ahokama ria muni pusima aamahaima.

Paulus Sio Pani Malta

28 ¹ Hoka ria muni pusima aamahaima oyo, ami aatinu rerihoni sio nusa niane ata ahokama ria nusa nanae Malta. ² Sio nusa niane rei oatapeama iake runa oakahaima. Uane. Mahatane. Reiso oakanupu usa osima na aasama haineke usa rei. ³ Paulus ieu imanou menia, oyo iaunutu menia poe usa. Iaunutu menia poe usa oyo, teke minne isa erehokai rerihoni usa rei nanie ererumai rerihoni titie. Oyo ereoto Paulus hanai. Erealapasiki tewa. ⁴ Sio nusa niane onoo ata tekene rei erealapasiki tewa, oyo oasau osi umau, “Ira oe. Titue. Ia rei ihunu tumata. Masike imatai nau nuae tewa iae, ia anahatana isa, anahatana waini iapasana pusita osa nanie ihunui pusu tekene rei. ⁵ Ne Paulus ikunariri hanai, oyo tekene rei erealapasiki rerihoni hanai. Erealapasiki oyo, remnahui poe usa. Paulus iake. ⁶ Sio oahata mka-mka Paulus hanai ereposu te mata hun tewa oyo, iamnohoi imatai. Ne sio onapa potuina, oyo onoo ata ia iake sirinia. Reiso anoo rarini tamene, oasau ata Paulus waini ia anahatana isa.

⁷ Tau otoi rei wani ia mainae tau nusa rei ne tuamane. Ia mainae rei nanai Publius. Iatapeama iake, oyo iainisi ami na aararane ria ne numa. Aararane ria ne numa rei onona tonu. ⁸ Tau muie rei, Publius amai ikupui. Ipusai runa tiai ereoto reiso inekai. Paulus ieu inooi, oyo iainisi runa iahusiei. Iainisi oyo, ia kupue rei iake. Ikupui tewa nea. ⁹ Areimo sanrei oyo, sio kupua pusiso sui nusa rei ohokaso mai Paulus. Paulus isuisene sio pusiso, oyo iake. ¹⁰ Sio oamuirama orui panesi osima. Ami nanie aeu aarisono nea, oyo oautue muaina runa apia roe kapane osima na ami mani apia apakere runa mani muaina tau mani weka roe kapane anoe.

Paulus Sio Oeu Oarihoni Malta Rotu-tu Ohokaso Roe Roma

¹¹ Ami aruema pani nusa Malta hunana tonu oyo, aeuma asaa kapane wani erehokai on nau Aleksandria. Ereruei pani nusa Malta rotu-tu musum mahatane pusiki. Roe kapane uae wani siaie rerihoni sio no anahatanau waroni titue tewa.

Oaoiso tau “Anahatanau Sio Alalekau.”¹² Kapane rei ereruma rotu-tu remamanui pani namane Sirakusa, oyo aamamanuma pani kota rei onona tonu.¹³ Ita asaa kapane rei honu rotu-tu ahokama poe namane Regium. Hanroe oyo, ihute on nau haha. Reiso kapane ereruma rotu-tu nene hanroe sanrei, oyo remamanui poe namane Putioli. Hoka poe oyo, asipuma on roe kapane rei.¹⁴ Poe rei asupu sio umau wasoni oparisaa tau Yesus. Sio rei oainisi na aararane akataso rotu-tu onona itu. Reiso ahokama roe Roma sanrei.¹⁵ Sio wasoni oparisaa roe Roma oatinu ata ami wani ahokama. Reiso sio umau oeu rotu-tu sio umau ohokaso pani Pasar Apius runa sio umau honu ohokaso pani nia Numau Tonu. Ohoka oatapeama. Paulus isupuso, oyo ianamana osi Anahatana sanrei, “Amaku, Anahatana. Ano iake. Ano aaisosi me mansiau rei ohokaso oautunuma rotu-tu ahokama roe Roma.” lasau sanrei, oyo iahana anoi kaie.¹⁶ Ahokama roe Roma oyo, otapi Paulus ruai ruei tau ne numa isa ikata ia soratatie isa waini isaka-sakai.

Paulus Iaunauo Roe Kota Roma

¹⁷ Paulus wairo kota Roma onona tonu nea oyo, ianaha runa sio ona Yahudiu ohokaso noi tanui. Hoka poe oamanouso samatoro Paulus iasau sanrei, “Wea kakau, wea waniu. Masike au uuna sae isa tewa na unesi ita Yahudiu. Masike au uuna sae isa tewa wani rei monna ita isupure rerihoni rea upu rasopota iae, sio Yahudiu roe Yerusalem oaisosiso osotaku, oyo oruiku osi sio wasoni ia Natu Kaisar mai Roma iaisosiso.¹⁸ Ia natu Kaisar ne mansiau oasei tanuku, oyo nanie oalapasiku. Tau sae, osupu sae isa tewa wani au uuna kahatene na mka ohunuku.¹⁹ Sio Yahudiu rei openeso tau ia Natu Kaisar ne mansiau oalapasiku. Reiso otentene tanuku na uainisi na ia Natu Kaisar iatinu we parakana rei na iasau sae wani titue, sae wani eresana. Masike au nanie uamanaru wea kakau, wea waniu wasoni sio Yahudiu tewa, sio otentene tanuku uainisi sanrei.²⁰ Areimo sanrei, reiso uanaha runamo na unoomo, oyo uanamana osimo. Tau sae, sio okanihooku tau rante rei tau uparisaa tau ia waini ita Israel iparisaa ata mka ihokai.”

²¹ Oyo sio ona Yahudiu oasau osiki sanrei, “Ami asupu surate isa on pani Yudea tewa, mai eresima runa ano. Ia Yahudi isa tewa ihokai isima runaya. Ia isa imanaru osi ami reini tewa.²² Ne ami nanie aatinu rerihoni ano aparisaa sapani. Tau sae, ami aanei ata sui supani-supani mani sio oanamana kahatene rerihoni sio Saraneu wasoni opusu ano me maunauna.”

²³ Reiso ohete umetene na oamanouso honu. Tau ranie hatae rei sio ohetei nea, sio panesi ohokaso noi Paulus ne numa erenesi sio wasoni ohokaso mataano. Ohokaso tau omnanoe oyo, Paulus iatuhetesu rotu-tu ranie manne. Iatuhetesu runa isima osiso runa sapani na Anahatana iuna natu mai tuniai reini. Paulus iaunauo pusu Musa ne maunauna runa sio mamsima runa Anahatana ne anamanaya no surata na iunisi reaso na oparisaa ata Yesu waini Ia Anahatana Iratiki lapuheuso.²⁴ Sio umau oparisaa tau Paulus ne anamanaya. Ne sio umau honu openeso oparisaa.²⁵ Sio Yahudiu otuntana runa umau nanie onuniso nea. Reiso Paulus iasau osiso sanrei, “Masuae Anahatana Ne Inaha iuna Yesaya, ia mamsima runa Anahatana ne anamanaya isa, iasau titue. lasau osi moa upu sani Anahatana iasau sanrei,

²⁶ ‘Aeua sui me mansiau rei, oyo aasau,
“Mka tinamo ukuna raatinu we maunauna,
ne omi oaneire tewa.

Mka matamo usena ranoo sae waroni au uunare,
ne omi oaneire tewa.”

²⁷ Mka sio oanei tewa tau openeso oarinii manisate.
Openeso oatinu tau tinao ukuna.

Openeso onoo tau matao usena.

Munata openeso tewa, mka matao usena ranoo oyo oanei.

Munata openeso tewa, mka tinao ukuna raatinu oyo oanei.

Munata openeso tewa, mka oarinii manisate oyo oanei.

Oanei, oyo anoo rauni rapusu au

na au uuna heu no rosau.”

²⁸ Reiso kahurae omi oanei ata maunaune rei rerihoni sapani na Anahatana iapuheuso na oamahaiso rotu-tu ria supani haineke Anahatana, iruiki osi sio wasoni sio Yahudiu tewa. Mka sio oatinu.” ²⁹ Paulus iasau sanrei, oyo sio Yahudiu rei onuniso. Oeu otuntana runa umau.

³⁰ Paulus iruei roe Roma musum ua. Iruei tau numa wani isehai. Iatapea sio pusiso wasoni ohokaso onooi runa oanamana osiki. ³¹ launauso rerihoni sapani na Anahatana iuna natu mai tuniai reini. launauso rerihoni Uपुरi Yesus Kristus. launauso mai manahane, iauhuniki tewa. Ikaitau tewa. Sio osopoi tewa.